

# 大乘本生心地觀經

唐罽賓國三藏般若等譯



南無本師釋迦牟尼佛

## 說明

本繁體校正版《大乘本生心地觀經》電子書，根據《乾隆大藏經》宋元入藏諸大小乘經，第 0950，唐罽賓國三藏般若等譯《大乘本生心地觀經》原藏影印本校正，句讀僅供參考。

本電子書是免費結緣品。特此說明。

仁慧草堂

二〇一八年八月

## 目錄

大乘本生心地觀經序 .....	- 1 -
起誦儀 .....	- 3 -
香讚 .....	- 3 -
開經偈 .....	- 3 -
大乘本生心地觀經卷第一 .....	- 4 -
序品第一 .....	- 4 -
大乘本生心地觀經卷第二 .....	- 26 -
報恩品第二上 .....	- 26 -
大乘本生心地觀經卷第三 .....	- 43 -
報恩品第二下 .....	- 43 -
大乘本生心地觀經卷第四 .....	- 66 -
獸捨品第三 .....	- 66 -
大乘本生心地觀經卷第五 .....	- 91 -
無垢性品第四 .....	- 91 -
阿蘭若品第五 .....	- 104 -
大乘本生心地觀經卷第六 .....	- 111 -
離世間品第六 .....	- 111 -
獸身品第七 .....	- 124 -
大乘本生心地觀經卷第七 .....	- 129 -
波羅蜜多品第八 .....	- 129 -
功德莊嚴品第九 .....	- 138 -
大乘本生心地觀經卷第八 .....	- 147 -
觀心品第十 .....	- 147 -
發菩提心品第十一 .....	- 154 -
成佛品第十二 .....	- 158 -
囑累品第十三 .....	- 162 -
結誦儀 .....	- 168 -
補闕真言 .....	- 168 -
發願文 .....	- 168 -
迴向偈 .....	- 169 -
迴向偈 .....	- 169 -
三皈依 .....	- 170 -

# 大乘本生心地觀經序

唐憲宗皇帝製

噫夫！物我既殊，嗜欲方熾。六根陷因緣之境，七情奔利害之場。蓋纏其真，執縛於妄愛，惡攻內紛華蕩前。心類騰猿，身若狂象，豈復悟菩提之性？息塵埃以自明了。真如之理，本空寂而為樂。不有妙覺，其孰拯斯溺乎？由是至人開法大士傳教，濟羣迷於彼岸，漸諸妄於此門。不滅不生，視色空而俱泯；無來無去，觀性相以皆如。然則泯色空者，非言無以極其致；如性相者，非文無以會其歸。設此筌蹄，納諸達<sup>1</sup>路，此蓋西方神人之大教也！

大乘本生心地觀經者，釋迦如來於耆闍崛山，與文殊師利、彌勒等諸大菩薩之所說也。其梵夾，我烈祖高宗之代，師子國之所獻也。寶之歷年，祕于中禁。朕嗣守丕業，虔奉昌圖，聽政之暇，澡心於此以為攝念之旨，有輔於時潛導之功。或裨於理，且大雄以慈悲致化，而朕生而不傷；法王以清淨為宗，而朕安而不擾，敷教于下，用符方便之門勵精以思。是叶修行之地，無為之益，

<sup>1</sup> 大正藏：達；永樂北藏：達；龍藏：達

不其至乎？夫如是得不演暢真宗闡弘奧義者也！乃出其梵本，於醴泉寺詔京師義學大德闍賓三藏般若等八人翻譯其旨，命諫議大夫孟簡等四人潤色其文，列爲八卷勒成一部。如來祕藏歷塵劫而初開，大乘真理超沙界而方證，燭其昏昧示以津梁。俾披閱之者，甘露灑於心田；曉悟之者，醍醐流於性境。嗟嘆不足披翫，豈忘亦既書寫聊爲序引？雖離諸文字，詎假發揮而啓其宗源。式存年代，時我唐御天下一百九十有四年也。

## ●起誦儀

### 香讚

(一編)

爐香乍爇. 法界蒙薰. 諸佛海會悉遙聞. 隨處結  
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

### 開經偈

(一編)

無上甚深微妙法 百千萬劫難遭遇  
我今見聞得受持 願解如來真實義

# 大乘本生心地觀經卷第一

唐罽賓國三藏般若等譯<sup>2</sup>

## 序品第一

如是我聞：

一時，佛住王舍城耆闍崛山中，與大比丘眾三萬二千人，皆是阿羅漢，心善解脫，慧善解脫，所作已辦，離諸重擔，逮得己利，盡諸有結，得大自在，住清淨戒，善巧方便智慧莊嚴，證八解脫到於彼岸，其名曰：具壽阿若憍陳如、阿史彼<sup>3</sup>室多、摩訶那摩、波帝利迦、摩訶迦葉、憍梵波提、離波多、優樓頻螺迦葉、那提迦葉、伽耶迦葉、舍利弗、大目犍連、摩訶迦旃延、摩訶迦毗那、真提那、富樓那彌多羅尼子、阿尼樓駄、微妙臂、須菩提、薄拘羅、孫陀羅難陀、羅睺羅。如是具壽阿羅漢，有學阿難陀等，各與若干百千眷屬俱，各禮佛足退坐一面。

復有菩薩摩訶薩，八萬四千人俱，皆是一生補處大法王子，有大威德如大龍王，百福圓滿身

<sup>2</sup> 大正藏：大唐罽賓國三藏般若奉詔譯

<sup>3</sup> 大正藏：波

光照曜，猶如千日破諸昏闇，智慧澄徹<sup>4</sup>逾於大海，了達諸佛祕密境界。然大法炬引導眾生，於生死海作大船師，憐愍眾生猶如赤子，於一切時恒施安樂，名稱普聞十方世界，自在遊戲微妙神通。已能善達諸總持門，具四無礙辯才自在，已得圓滿大願自在，妙善成就事業自在，已能善入三昧自在，具足圓滿福德自在，常為眾生不請之友。經無量劫勤修六度，歷事諸佛不住涅槃，斷諸煩惱講說妙法，無量世界化利群生，制諸外道摧伏邪心，離斷常因令生正見，而無往來動搖之相。非嚴而嚴十方佛土，不說而說妙理寂然，住無所住度人天眾，無所不<sup>5</sup>受廣大法樂，披精進甲，執智慧劍，破魔軍眾而擊法鼓，身恒徧坐一切道場，吹大法螺覺悟群品，一切有情悉蒙利益，聞名見身無空過者。具三達智，悟三世法，善知眾生諸根利鈍，應病與藥無復疑惑。布大法雲，澍甘露雨，轉不退轉智印法輪，閉生死獄，開涅槃門，發弘誓願，盡未來際度脫群生。此諸菩薩不久當得阿耨多羅三藐三菩提，其名曰：無垢菩薩<sup>6</sup>、彌勒菩薩、師子吼菩薩、妙吉祥菩薩、維

<sup>4</sup> 大正藏：澈

<sup>5</sup> 大正藏：受無所

<sup>6</sup> 大正藏：無垢

摩詰菩薩、觀自在菩薩、得大勢菩薩、金剛藏王菩薩、地藏王菩薩、虛空藏王菩薩、陀羅尼自在王菩薩、三昧自在王菩薩、妙高山王菩薩、大海深王菩薩、妙辯嚴王菩薩、歡喜高王菩薩、大神變王菩薩、法自在王菩薩、清淨雨王菩薩、藥王菩薩、藥上菩薩、療煩惱病菩薩、寶山菩薩、寶財菩薩、寶上菩薩、寶德菩薩、寶藏菩薩、寶積菩薩、寶手菩薩、寶印手菩薩、寶光菩薩、寶施菩薩、寶幢菩薩、大寶幢菩薩、寶雨菩薩、寶達菩薩、寶杖菩薩、寶髻菩薩、寶吉祥菩薩、寶自在菩薩、栴檀香菩薩、大寶炬菩薩、大寶嚴菩薩、日光菩薩、月光菩薩、星光菩薩、火光菩薩、電光菩薩、能念慧菩薩、破魔菩薩、勝魔菩薩、常精進菩薩、不休息菩薩、不斷大願菩薩、大名稱菩薩、無礙辯才菩薩、無礙轉法輪菩薩，如是無垢菩薩摩訶薩等，各與若干百千眷屬俱。

復有億萬六欲天子，其名曰：善住天子、威德天子、普光天子、清淨慧天子、吉祥天子、大吉祥天子、自在天子、大自在天子、日光天子、月光天子。如是等天子，釋提桓因而為上首，悉皆愛樂大乘妙法，願隨奉事三世如來，入不思議祕密境界，莊嚴諸佛眾會道場；各與若干百千眷

屬俱。

復有恒河沙色界天子，其名曰：大光普照天子、無垢莊嚴天子、神通遊戲天子、三昧自在天子、陀羅尼自在天子、大那羅延天子、圓滿上願天子、無礙辯才天子、吉祥福慧天子、常發大願天子。如是等天子，光明大梵天王而為上首，悉皆具足三昧神通樂說辯才，歷事諸佛三世如來，菩提樹下坐金剛座，破魔軍已證菩提時，徧至眾會，皆於最初，勸請如來轉妙法輪，開甘露門度人天眾，善悟諸佛祕密意趣，於大菩提不復退轉；各與若干百千眷屬俱。

復有四萬八千諸大龍王：摩那斯龍王、德叉迦龍王、難陀龍王、跋難陀龍王、阿耨達池龍王、大金面龍王、如意寶珠龍王、雨妙珍寶龍王、常澍甘雨龍王、有大威德龍王、彊力自在龍王。如是等龍王，娑竭羅龍王而為上首，悉皆愛樂大乘妙法，發弘誓願恭敬護持；各與若干百千眷屬俱。

復有五萬八千諸藥叉神：大師子王藥叉神、轉輪<sup>7</sup>光照藥叉神、妙那羅延藥叉神、甚可怖畏藥叉神、蓮華光色藥叉神、諸根美妙藥叉神、外護正法藥叉神、供養三寶藥叉神、雨眾珍寶藥叉

<sup>7</sup> 大正藏：日輪

神、摩尼鉢羅藥叉神。如是等諸藥叉神，僧慎爾邪藥叉神而為上首，悉皆具足難思智光，難思智炬，難思智行，難思智聚，而為眾生制伏惡鬼，使得安樂能延福智，守護大乘令不斷絕；各與若干百千眷屬俱。

復有八萬九千乾闥婆王：頂上寶冠乾闥婆王、普放光明乾闥婆王、金剛寶幢乾闥婆王、妙音清淨乾闥婆王、徧至眾會乾闥婆王、普現諸方乾闥婆王、愛樂大乘乾闥婆王、轉不退輪乾闥婆王。如是等乾闥婆王，諸根清淨乾闥婆王而為上首，皆於大乘深生愛敬，利樂眾生恒無懈倦；各與若干百千眷屬俱。

復有千億阿脩羅王：羅睺羅阿脩羅王、毗摩質多羅阿脩羅王、出現威德阿脩羅王、大堅固力阿脩羅王、美妙音聲阿脩羅王、光明徧照阿脩羅王、鬪戰恒勝阿脩羅王、善巧幻化阿脩羅王。如是等阿脩羅王，廣大妙辯阿脩羅王而為上首，善能修習離諸我慢，受持大乘尊重三寶；各與若干百千眷屬俱。

復有五億迦樓羅王：寶髻迦樓羅王、金剛淨光迦樓羅王、速疾如風迦樓羅王、虛空淨慧迦樓羅王、妙身廣大迦樓羅王、心不退轉迦樓羅王、

廣目清淨迦樓羅王、大腹飽滿迦樓羅王、有大威德迦樓羅王、智慧光明迦樓羅王。如是等迦樓羅王，寶光迦樓羅王而為上首，悉皆成就不起法忍，善獲<sup>8</sup>饒益一切眾生；各與若干百千眷屬俱。

復有九億緊那羅王：動地緊那羅王、妙寶華幢緊那羅王、寶樹光明緊那羅王、善法光明緊那羅王、最勝莊嚴緊那羅王、火<sup>9</sup>法光明緊那羅王、受持妙法緊那羅王、妙寶嚴飾緊那羅王、成就妙觀緊那羅王。如是等緊那羅王，悅意樂聲緊那羅王而為上首，皆悉具於清淨妙慧，身心快樂自在遊戲；各與若干百千眷屬俱。

復有九萬八千摩睺羅伽王：妙髻摩睺羅伽王、具大威德摩睺羅伽王、莊嚴寶髻摩睺羅伽王、淨眼微妙摩睺羅伽王、光明寶幢摩睺羅伽王、師子胷臆摩睺羅伽王、如山不動摩睺羅伽王、可愛光明摩睺羅伽王。如是等摩睺羅伽王，遊戲神通摩睺羅伽王而為上首，已能修習善巧方便，令諸眾生永離愛纏；各與若干百千眷屬俱。

復有他方萬億國土轉輪聖王：金輪轉輪聖王、銀輪轉輪聖王、銅輪轉輪聖王、鐵輪轉輪聖王，

<sup>8</sup> 大正藏：權

<sup>9</sup> 大正藏：大

及與七寶千子眷屬，莊嚴無量象馬車乘，無數寶幢懸大寶旛，華鬘寶蓋繒綵白拂，種種珍奇妙寶瓔珞，塗香末香，和合萬種微妙殊香，各執無價眾寶香鑪，燒大寶香供養世尊，以妙言詞稱讚如來甚深智海，而白佛言：「世尊！我今不求三界有漏人天果報，唯求出世阿耨多羅三藐三菩提。所以者何？三界之中人天福樂，雖處尊位，先世福盡還生惡趣受無量苦。誰有智者樂世間樂？」作是語已一心合掌，各與若干百千眷屬俱。

復有十六諸大國王：迦毗羅國淨飯大王、摩伽陀國頻婆娑羅王、波羅柰國迦斯大王、有于陀國于闐大王、娑羅國主迦毗那王。如是等十六大王及諸小王，舍衛國主波斯匿王，名曰月光而為上首，悉皆具足福智神通，有大威德如轉輪王，一切怨敵自然降伏，人民熾盛國土豐樂，無量佛所種諸善根，常為諸佛之所護念。莊嚴劫中千佛出現，如是諸王常為施主；賢劫之中千佛出現，如是諸王亦為施主；於當來世星宿劫中，千佛出現當為施主；乃至未來一切諸佛出現世間，如是諸王以本願力，常行檀施饒益有情，隨宜善入諸方便門，雖作國王不貪世樂，厭離生死修解脫因，勤求佛道愛樂大乘，化利群生不著諸相，紹三寶

種使不斷絕。為聽法故供養如來，廣修珍膳嚴持香華，來至佛所，各與一萬二萬乃至千萬諸眷屬俱。

復有十六大國王夫人：韋提希夫人、妙勝鬘夫人、甚可愛樂夫人、三界無比夫人、福報光明夫人、如意寶光夫人、末利夫人、妙德夫人。如是等夫人，殊勝妙顏夫人而為上首，已能善入無量正定，為度眾生示現女身，以三解脫修習其心，有大智慧福德圓滿，無緣大慈無礙大悲，憐愍眾生猶如赤子，以本願力得值世尊。為欲聽法來詣佛所，瞻仰尊顏目不暫捨，以無量種人中上供，奉獻世尊，及以無數妙寶瓔珞，供養如來，各與若干百千眷屬俱。

復有百千無央數人，比丘、比丘尼，優婆塞、優婆夷，諸婆羅門、刹帝利、薜舍、戍<sup>10</sup>達羅，及諸國界長者居士，一切人民。是諸大眾，發清淨信起殷重心，宿種善根，生值佛法，為求出世起難遭想，來詣佛所一心合掌，各與若干百千眷屬俱。

復有無數諸外道眾：苦行外道、多聞外道、

<sup>10</sup> 大正藏：戍

世智外道、樂遠離外道、路伽耶<sup>11</sup>陀外道，路伽耶治迦儻外道而為上首，成就五通飛行自在，發希有心，為聽法故來詣佛所，各與若干百千眷屬俱。

復有無量無數非人餓鬼，謂：無財鬼、食人吐鬼、惱眾生鬼、食洩唾鬼、食不飽鬼、毗舍闍鬼、臭極臭鬼、食糞穢鬼、食人胎鬼、食生子鬼、食不淨鬼、生吉祥鬼。如是諸鬼，毗盧陀伽大鬼神王而為上首，捨離毒心歸佛法僧，悉皆衛護如來正法，為聽法故來詣佛所，五體投地渴仰世尊，各與若干百千眷屬俱。

復有無量無數禽獸諸王：命命鳥王、鸚鵡鳥王，及師子王、象王、鹿王。如是一切諸禽獸王，金色師子王而為上首，悉皆歸命如來大師，為欲聽法來詣佛所，各隨願力供養世尊，而白佛言：「惟願如來哀受我等微少供養，永離三塗惡業種子，得受人天福樂果報，開闡大乘甘露法門，速斷愚癡當得解脫。」時諸鳥王作是語已，一心合掌瞻仰如來，各與若干百千眷屬俱。

復有百千琰魔羅王，與無央數諸大羅刹，種種形類及諸惡王，幽冥官屬，校計罪福獄吏刑司，

<sup>11</sup> 大正藏：邪

承佛威力捨離惡心，與琰魔羅王同來聽法，而白佛言：「一切眾生以愚癡故，貪五欲樂造五逆罪，入諸地獄輪轉無窮，自業所因受大苦惱，如世蠶繭自為縈纏。惟<sup>12</sup>願如來！雨大法雨，滅地獄火，施清涼風，開解脫門，閉三惡趣。」時琰魔羅王，作是語已，種種珍寶供養如來，一心恭敬遶百千帀，與若干百千眷屬俱，各禮佛足退坐一面。

爾時，世尊坐寶蓮華師子座上，其師子座色紺瑠璃，種種珍奇間錯嚴飾，玻瓈<sup>13</sup>寶珠以為其莖，紫磨黃金作蓮華葉，其蓮華臺以摩尼寶而為華鬚，八萬四千閻浮檀金大寶蓮華而為眷屬，為諸大眾前後圍遶，供養恭敬尊重讚歎。時，薄伽梵於師子座結跏趺坐，威儀殊特，猶如四寶蘇迷盧山處于大海自然迥出，如百千日照曜虛空，放無量光破諸昏暗，亦如俱胝圓滿月輪獨處眾星，放清涼光明朗世界。入有頂天極善三昧，名心瓔珞寶莊嚴王，住此定已，身心不動。時，無色界一切天子，雨無量種微妙華香，於虛空中如雲而下。色界諸天十八梵王，雨眾雜色無數天華百千萬種，梵天妙香徧滿虛空如雲而下。六欲諸天及

<sup>12</sup> 大正藏：唯

<sup>13</sup> 大正藏：頗梨

天子眾，以天福力雨種種華，優鉢羅華、波頭摩華、拘物頭華、芬陀利華、瞻蔔迦華、阿提目多華、波利尸迦華、蘇摩那華、曼陀羅華、摩訶曼陀羅華、曼殊沙華、摩訶曼殊沙華，於虛空中繽紛亂墜，而供養佛及眾法寶。又雨天上無價寶香，其香如雲作百寶色，以天神力香氣徧滿此諸世界，供養大會。

爾時，世尊從三昧起，即於本座，復入師子奮迅三昧，現大神通，令此三千大千世界六種震動，謂：動、極動、徧極動；涌、極涌、徧極涌；振、極振、徧極振；擊、極擊、徧極擊；吼、極吼、徧極吼；爆、極爆、徧極爆。又此世界，東涌西沒，西涌東沒，南涌北沒，北涌南沒，中涌邊沒，邊涌中沒，其地巖淨悉皆柔軟，滋長卉木，利益群生，令三千界無有地獄、餓鬼、畜生，及餘無暇惡趣眾生皆得離苦，捨此身已，生於人道及六欲天，皆識宿命歡喜踊躍，同詣佛所，以殷重心頂禮佛足，持諸珍寶無數瓔珞，悟三輪空以報佛恩。

爾時，如來於霄臆間及諸毛孔放大光明，名諸菩薩遊戲神通使不退轉阿耨多羅三藐三菩提。其光明色如閻浮檀金，此金色光普照三千大千世

界及餘他界，乃至百億妙高山王，一切雪山、香山、黑山、金山、寶山，及彌樓山、大彌樓山、目真隣陀山、摩訶目真隣陀山、小鐵圍山、大鐵圍山，江河大海流泉浴池，及以百億四大洲界，日月星辰，天宮龍宮諸尊神宮，并諸國邑王宮聚落，琰魔羅界，所有一切八寒八熱諸地獄中罪業眾生受苦之相，乃至十方畜生、餓鬼受苦之相，一切世間五趣眾生受苦樂相，如是皆現於此金色大光明中。又此光中，影現菩薩修行佛道種種相貌，釋迦菩薩於往昔時作光明王，最初發於阿耨多羅三藐三菩提心，乃至菩提樹下得成佛道，娑羅林中入於涅槃。於其中間三僧企邪百萬劫中，所有一切慈悲喜捨，八萬四千波羅蜜，乃於過去作金輪王，王四天下，盡大海際，人民熾盛，國土豐樂，正法化世經無量劫，一切珍寶充滿國界。時，彼輪王觀諸世間皆悉無常，厭五欲樂，捨輪王位出家學道。或於大國為王愛子，棄捨身命投於餓虎；或作尸毗王割身救鴿；或救孕鹿捨鹿王身；或於雪山為求半偈而捨全身；或現受生於淨飯王家，捨後宮六萬嫫女，及捨種種上妙妓<sup>14</sup>樂，踰城出家，六年苦行，日食麻麥降諸外道，菩提

<sup>14</sup> 大正藏：伎

樹下破魔軍已，得阿耨多羅三藐三菩提。有如是等百千恒沙難思行願一切相貌，悉皆頓現於此金色大光明中。

又此光中，影現如來不可思議八大寶塔：拘娑羅國淨飯王宮，生處寶塔；摩伽陀國伽耶城邊菩提樹下，成佛寶塔；波羅柰國鹿野園中，初轉法輪度人寶塔；舍衛國中給孤獨園，與諸外道六月論議，得一切智聲名寶塔；安達羅國曲女城邊，昇忉利天為母說法，共梵天王及天帝釋十二萬眾，從三十三天現三道寶階，下閻浮時神異寶塔；摩竭陀國王舍城邊耆闍崛山，說《大般若》、《法華》、《一乘心地經》等大乘寶塔；毗舍離國菴羅衛林，維摩長者不可思議現疾寶塔；拘尸那國跋提河邊，娑羅林中圓寂寶塔。如是八塔大聖化儀，人天有情所歸依處，供養恭敬為成佛因。如是音聲及諸影像<sup>15</sup>，而於三世難思議事，悉皆影現大光明中。

又十方界三世諸佛，及大菩薩道場眾會，神通變化希有之事，及諸如來所說妙法，皆如響應，於此金色大光明中無不見聞。一切眾生遇此光明、見彼瑞相，皆發無等等阿耨多羅三藐三菩提心。時，諸大眾覩佛神力不可思議，歎未曾有，各相

<sup>15</sup> 大正藏：塔影

謂言：「如來今日入於三昧，放大光明照十方界，得見如來往昔所有難思議事，調伏惡世邪見眾生，令生信<sup>16</sup>解趣向菩提。希有如來！能為一切世間之父，無量劫中難可得見，我等累劫修諸行願，得遇三界人天大師。惟<sup>17</sup>願慈尊，哀愍世間，從定而起，說甚深法，示教利喜一切眾生。」作是語已，瞻仰尊顏，默然而住。

爾時，會中有一菩薩名師子吼，三僧企耶修行福智，於賢劫中次補佛處，受灌頂位作大法王，四向觀視海會大眾，發大音聲，而作是言：「我於往昔無量劫中，已發阿耨多羅三藐三菩提心，歷事恒沙一切諸佛，曾於第一眾會道場，見不思議神通變化，未嘗覩此金色光明，影現一切菩薩行願，及現如來種種相貌，令見三世難思議事。惟願仁者，一心合掌，瞻仰尊顏，從定而起，授甘露藥，除熱惱病，令證法身，常樂我淨。是諸如來有二種法，於三昧中不復久住：一者大慈，二者大悲。依大慈故與眾生樂，依大悲故拔眾生苦，以是二法於無數劫熏修其心而成正覺。世間眾生多諸苦惱，以是因緣，如來不久從三昧起，

<sup>16</sup> 大正藏：正

<sup>17</sup> 大正藏：唯

當為演說心地觀門大乘妙法。」告諸大眾：「無求一切人天福樂，速求出世阿耨多羅三藐三菩提。所以者何？今日世尊，從霄臆中放金色光，所照之處皆如金色，佛所顯示意趣甚深，一切世間聲聞、緣覺，盡思度量所不能知。汝等凡夫不觀自心，是故漂流生死海中；諸佛菩薩能觀心故，度生死海到於彼岸。三世如來法皆如是，放此光明非無因緣。」是諸眾會聞大士言，心懷踊躍，得未曾有。

爾時，師子吼菩薩摩訶薩，欲重宣此義，而說偈言：

敬禮天人大覺尊	恒沙福智皆圓滿
金光百福莊嚴相	發起眾生愛樂心
超過三界獨居尊	功德最勝無倫匹
普用神通自在力	隨所造業現其前
我以天眼觀世間	一切無有如佛者
希有金容如滿月	希有過於優曇華
無邊福智利群生	大光普照如千日
愚癡眾生長夜苦	蒙光所照悉皆除
我觀如來昔所行	親近供養無數佛
經歷僧祇無量劫	為眾生故趣菩提
常於生死苦海中	作大船師濟群品

演說甘露真淨法 令入無為解脫門  
三僧祇劫度眾生 勤修八萬波羅蜜  
因圓果滿成正覺 住壽凝然無去來  
一一相好周法界 十方諸佛相皆然  
甚深境界難思議 一切人天莫能測  
諸佛體用無差別 如千燈照互增明  
智慧如空無有邊 應物現形如水月  
無邊法界常寂然 如如不動等虛空  
如來清淨妙法身 自然具足恒沙德  
周徧法界無窮盡 不生不滅無去來  
法王常住妙法宮 法身光明靡不照  
如來法性無罣礙 隨緣普應利群生  
眾生各見在其前 為我宣說甘露法  
隨心能滅諸煩惱 人天眾苦悉皆除  
破有法王甚奇特 光明照曜如金山  
為度眾生出世間 能然法炬破昏暗  
眾生沒在生死海 輪迴五趣無出期  
善逝恒為妙法船 能截愛流超彼岸  
大智方便不可量 恒與眾生無盡樂  
能為世間大慈父 憐愍一切諸有情  
如來出世甚難值 無數億劫時一現  
譬如優曇妙瑞華 一切人天所希有

於無量劫時一現 覩佛出世亦同然  
是諸眾生無福慧 恒處沈淪生死海  
億劫不見諸如來 隨諸惡業恒受苦  
我等無數百千劫 修四無量三解脫  
今見大聖牟尼尊 猶如盲龜值浮木  
願於來世恒沙劫 念念不捨天人師  
如影隨形不暫離 晝夜勤修於種智  
惟願世尊哀愍我 常令得見大慈尊  
三業無倦常奉持 願共眾生成正覺  
今者三界大導師 座上跏趺入三昧  
獨處凝然空寂舍 身心不動如須彌  
世間一切梵天魔 莫能警覺如來定  
此界他方凡聖眾 悉知調御住於禪  
廣設無邊微妙供 奉獻能仁最勝德  
六欲諸天來供養 天華亂墜徧虛空  
十善報應無價香 變化香雲百寶色  
徧覆人天無量眾 雨雜妙寶獻如來  
香氣氤氳三寶前 百千伎<sup>18</sup>樂臨空界  
不鼓自鳴成妙曲 供養人中兩足尊  
十八梵眾雨天華 及雨雜寶千萬種  
梵摩尼珠妙瓔珞 眾寶嚴飾天妙衣

<sup>18</sup> 大正藏：伎

大寶華幢懸勝旛<sup>19</sup> 持以供養牟尼尊  
無色界天雨寶華 其華廣大如車輪  
雨微細香滿世界 供養三昧難思議  
龍王脩羅人非人 奉獻所感珍妙寶  
各以供養天中人<sup>20</sup> 樂聞最勝菩提道  
時薄伽梵大醫王 善治世間煩惱苦  
師子頻伸三昧力 六種震動徧三千  
以此覺悟諸有緣 於此無緣了不覺  
隨彼人天應可度 見佛種種諸神通  
瞻仰月面牟尼尊 以淨三業皆雲集  
如來能以無緣慈 饒益眾生成勝德  
曾臆放此大光明 名諸菩薩不退轉  
如劫盡時七日現 熾然照曜放千光  
世間所有諸光明 不及一佛毛孔光  
無量無礙大神光 徧照十方諸佛刹  
如來福智皆圓滿 所放神光亦無比  
其光赫奕如金色 徧照十方諸國土  
大聖金光影現中 悉見世間諸色像  
三千大千諸世界 所有一切諸山王  
四寶所成妙高山 雪山香山七金山

<sup>19</sup> 大正藏：旛

<sup>20</sup> 大正藏：天

目真隣陀彌樓山 大鐵圍山小山等  
大海江河及浴池 無數百億四大洲  
日月星辰眾寶宮 天宮龍宮諸神宮  
國邑王宮諸聚落 如是光中悉顯現  
又現如來往昔因 積功累德求佛道  
如來昔在尸毗國 曾居尊位作人王  
國界珍寶皆充盈 常以正法化於世  
慈悲喜捨恒無倦 能捨難捨趣菩提  
割身救鴿嘗無悔 深心悲愍救眾生  
時佛往昔在凡夫 入於雪山求佛道  
攝心勇猛勤精進 為求半偈捨全身  
以求正法因緣故 十二劫超生死苦  
昔為摩納仙人時 布髮供養然燈佛  
以是精進因緣故 八劫超於生死海  
昔為薩埵王子時 捨所愛身投餓虎  
自利利他因緣故 十一劫超生死因  
流水長者大醫王 平等救護眾生故  
濟魚各得生天上 天雨瓔珞來報恩  
七日翹足讚如來 以精進故超九劫  
昔為六牙白象王 其牙殊妙無能比  
捨身命故投獵者 求佛無上大菩提  
或作圓滿福智王 施眼精進求佛道

又作金色大鹿王 捨身精進求佛道  
為迦尸國慈力王 全身施與五夜叉  
又作大國莊嚴王 以妻子施無悋惜  
或為最上身菩薩 頭目髓腦施眾生  
如是菩薩行慈悲 皆願求證菩提道  
佛昔曾作轉輪王 四洲珍寶皆充滿  
具足千子諸眷屬 十善化人百千劫  
國土安隱如天宮 受五欲樂無窮盡  
時彼輪王覺自身 及以世間不牢固  
無想諸天八萬歲 福盡還歸諸惡道  
猶如夢幻與泡影 亦如朝露及電光  
了達三界如火宅 八苦充滿難可出  
未得解脫超彼岸 誰有智者樂輪迴  
唯有出世如來身 不生不滅常安樂  
如是難行菩薩行 一切悉現金光內  
又此光中現八塔 皆是眾生良福因<sup>21</sup>  
淨飯王宮生處塔 菩提樹下成佛塔  
鹿野園中法輪塔 給孤獨園名稱塔  
曲女城邊寶堦塔 耆闍崛山般若塔  
菴羅衛林維摩塔 娑羅林中圓寂塔  
如是世尊八寶塔 諸天龍神常供養

<sup>21</sup> 大正藏：田

金剛密跡四天王 晝夜護持恒不離  
若造八塔而供養 現身福壽自延長  
增長智慧眾所尊 世出世願皆圓滿  
若人禮拜及心念 如是八塔不思議  
二人獲福等無差 速證無上菩提道  
如是三世利益事 於此光中無不見  
十方佛土諸菩薩 神通遊戲眾靈仙  
萬億國土轉輪王 尋此光明普雲集  
各以神力來供養 雨如意寶奉慈尊  
諸天妓<sup>22</sup>樂百千種 不鼓自然出妙音  
天華亂墜滿虛空 眾香普熏於大會  
寶幢無數諸瓔珞 持以供養人中尊  
微妙伽陀讚如來 善哉能入於三昧  
現不思議大神力 調伏難化諸有情  
惟願世尊從定起 為諸眾生轉法輪  
永斷一切諸煩惱 令住無住大涅槃  
如我等類心清淨 從萬億國來聽法  
以三昧力常諦觀 於我微供哀納受  
能施所施及施物 於三世中無所得  
我等安住最勝心 供養一切十方佛  
世世親近大悲主 恒常奉事大慈尊

<sup>22</sup> 大正藏：伎

以無所得妙善根 圓融法界趣真覺  
過去如來入寂定 現大神通轉法輪  
今佛世尊亦復然 入定放光同彼佛  
是故惟忖釋師子 決定欲說心地門  
若欲遠離生死因 必獲三世真常果  
諸人合掌一心待 當入如來安樂宮<sup>23</sup>

大乘本生心地觀經卷第一

<sup>23</sup> 從“世世親近大悲主”至“當入如來安樂宮”，大正藏及麗藏有，永樂北藏與龍藏則無。

# 大乘本生心地觀經卷第二

唐罽賓國三藏般若等譯

## 報恩品第二上<sup>24</sup>

爾時，世尊從三昧安詳而起，告彌勒菩薩摩訶薩言：「善哉善哉！汝等大士，諸善男子，為欲親近世間之父，為欲聽聞出世之法，為欲思惟如如之理，為欲修習如如之智，來詣佛所供養恭敬。我今演說心地妙法，引導眾生令入佛智。如是妙法，諸佛如來過無量劫時乃說之。如來世尊出興於世，甚難值遇如優曇華，假使如來出現於世，說此妙法亦復為難。所以者何？一切眾生遠離大乘菩薩行願，趣向聲聞、緣覺菩提，猷離生死永入涅槃，不樂大乘常樂妙果。然諸如來轉於法輪，遠離四失說相應法：一無非處，二無非時，三無非器，四無非法。應病與藥令得復除，即是如來不共之德。聲聞、緣覺未得自在，諸菩薩眾不共之境，以是因緣，難見難聞菩提正道心地法門。若有善男子、善女人，聞是妙法一經於耳，須臾之頃攝念觀心，熏成無上大菩提種，不

<sup>24</sup> 大正藏：報恩品第二之上

久當坐菩提樹王金剛寶座，得成阿耨多羅三藐三菩提。」

爾時，王舍大城，有五百長者，其名曰：妙德長者、勇猛長者、善法長者、念佛長者、妙智長者、菩提長者、妙辯長者、法眼長者、光明長者、滿願長者。如是等大富長者成就正見，供養如來及諸聖眾。是諸長者，聞是世尊讚歎大乘心地法門，而作是念：「我見如來放金色光，影現菩薩難行苦行，我不愛樂行苦行心，誰能永劫住於生死，而為眾生受諸苦惱？」作是念已，即從座起，偏袒右肩，右膝著地，合掌恭敬，異口同音，前白佛言：「世尊！我等不樂大乘諸菩薩行，亦不喜聞苦行音聲。所以者何？一切菩薩所修行願，皆悉不是知恩報恩。何以故？遠離父母趣於出家，以自妻子施於所欲，頭目髓腦隨其願求，悉皆布施受諸逼惱，三僧祇劫具修諸度八萬四千波羅蜜行，越生死流，方至菩提大安樂處。不如趣向二乘道果，三生百劫修集資糧，斷生死因證涅槃果，速至安樂，方名報恩。」

爾時，佛告五百長者：「善哉善哉！汝等聞於讚歎大乘，心生退轉發起妙義，利益安樂未來世中，不知恩德一切眾生。諦聽諦聽，善思念之，

我今為汝分別演說世出世間有恩之處。善男子，汝等所言未可正理。何以故？世間之<sup>25</sup>恩有其四種：一父母恩，二眾生恩，三國王恩，四三寶恩。如是四恩，一切眾生平等荷負。善男子，父母恩者，父有慈恩，母有悲恩。母悲恩者，若我住世於一劫中說不能盡，我今為汝宣說少分。假使有人為福德故，恭敬供養一百淨行大婆羅門、一百五通諸大神仙、一百善友，安置七寶上妙堂內，以百千種上妙珍膳，垂諸瓔珞眾寶衣服，梅檀沈香立諸房舍，百寶莊嚴床卧敷具，療治眾病百種湯藥，一心供養滿百千劫；不如一念住孝順心，以微少物色養悲母，隨所供侍，比前功德，百千萬分不可校量。

「世間悲母念子無比，恩及未形，始自受胎經<sup>26</sup>於十月，行住坐卧受諸苦惱非口所宣，雖得欲樂、飲食、衣服而不生愛，憂念之心恒無休息，但自思惟將欲生產，漸受諸苦晝夜愁惱；若產難時，如百千刃競來屠割，遂<sup>27</sup>致無常。若無苦惱，諸親眷屬喜樂無盡。猶如貧女得如意珠，其子發聲如聞音樂，以母胷臆而為寢處，左右膝

<sup>25</sup> 大正藏：出世

<sup>26</sup> 大正藏：終

<sup>27</sup> 大正藏：或

上常為遊履，於宵臆中出甘露泉，長養之恩彌於普天，憐愍之德廣大無比。世間所高莫過山岳，悲母之恩逾於須彌；世間之重大地為先，悲母之恩亦過於彼。若有男女背恩不順，令其父母生怨念心，母發惡言子即隨墮，或在地獄、餓鬼、畜生。世間之疾莫過猛風，怨念之微<sup>28</sup>復速於彼；一切如來、金剛、天等，及五通仙，不能救護。若善男子、善女人，依悲母教承順無違，諸天護念福樂無盡。如是男女即名尊貴天人種類，或是菩薩為度眾生，現為男女饒益父母。

「若善男子、善女人，為報母恩經於一劫，每日三時割自身肉以養父母，而未能報一日之恩。所以者何？一切男女處于胎中，口吮乳根飲噉母血，及出胎已幼稚之前，所飲母乳百八十斛，母得上味皆<sup>29</sup>與其子，珍妙衣服亦復如是，愚癡鄙陋，情愛無二。昔有女人遠遊佉國，抱所生子渡菟伽河，其水暴漲力不能前，愛念不捨，母子俱沒。以是慈心善根力故，即得上生色究竟天作大梵王。以是因緣，母有十德：一名大地，於母胎中為所依故。二名能生，經歷眾苦而能生故。三

<sup>28</sup> 大正藏：徵

<sup>29</sup> 大正藏：先

名能正，恒以母手理五根故。四名養育，隨四時宜能長養故。五名智者，能以方便生智慧故。六名莊嚴，以妙瓔珞而嚴飾故。七名安隱，以母懷抱為止息故。八名教授，善巧方便導引子故。九名教誡，以善言辭離眾惡故。十名與業，能以家業付囑子故。

「善男子，於諸世間何者最富？何者最貧？悲母在堂名之為富，悲母不在名之為貧；悲母在時名為日中，悲母死時名為日沒；悲母在時名為月明，悲母亡時名為闇夜。是故汝等，勤加修習孝養父母，若人供佛福等無異。應當如是報父母恩。

「善男子，眾生恩者，即無始來，一切眾生輪轉五道經百千劫，於多生中互為父母；以互為父母故，一切男子即是慈父，一切女人即是悲母，昔生生中有大悲<sup>30</sup>故，猶如現在父母之恩等無差別。如是昔恩猶未能報，或因妄業生諸違順，以執著故反為其怨。何以故？無明覆障宿住智明，不了前生曾為父母，所可報恩互為饒益，無饒益者名為不孝。以是因緣。諸眾生類於一切時亦有大恩，實為難報。如是之事名眾生恩。

<sup>30</sup> 大正藏：恩

「國王恩者，福德最勝，雖生人間得自在故，三十三天諸天子等，恒與其力常護持故，於其國界山河大地，盡大海際屬於國王，一人福德勝過一切眾生福故。是大聖王以正法化，能使眾生悉皆安樂。譬如世間一切堂殿，柱為根本；人民豐樂，王為根本，依王有故。亦如梵王能生萬物，聖王能生治國之法利眾生故。如日天子能照世間，聖王亦能觀察天下人安樂故。王失正治，人無所依。若以正化，八大恐怖不入其國，所謂佗國侵逼，自界叛逆，惡鬼疾病，國土飢饉，非時風雨，過時風雨，日月薄蝕，星宿變怪。人王正化利益人民，如是八難不能侵故。譬如長者，唯有一子，愛念無比，憐愍饒益，常與安樂，晝夜不捨。國大聖王，亦復如是，等示羣生，如同一子，擁護之心晝夜無捨。如是人王，令修十善，名福德王<sup>31</sup>；若不令修，名非福主。所以者何？若王國內一人修善，其所作福皆為七分，造善之人得其五分，於彼國王常獲二分，善因王修，同福利故。造十惡業，亦復如是，同其事故。一切國內田地園林所生之物，皆為七分，亦復如是。若有人王成就正見，如法化世，名為天主。以天

<sup>31</sup> 大正藏：主

善法化世間故，諸天善神及護世王，常來加護守王宮故。雖處人間修行天業，賞罰之心無偏黨故。一切聖王法皆如是，如是聖主名正法王。以是因緣，成就十德：一名能照，以智慧眼照世間故。二名莊嚴，以大福智莊嚴國故。三名與樂，以大安樂與人民故。四名伏怨，一切怨敵自然伏故。五名離怖，能卻八難離恐怖故。六名住<sup>32</sup>賢，集諸賢人評國事故。七名法本，萬姓安住依國王故。八名持世，以天王法持世間故。九名業主，善惡諸業屬國王故。十名人主，一切人民王為主故。一切國王以先世福，成就如是十種勝德。大梵天王及忉利天，常助人王受勝妙樂，諸羅刹王及諸神等，雖不現身，潛來衛護王及眷屬。王見人民造諸不善不能制止，諸天神等悉皆遠離。若見修善歡喜讚歎，盡皆唱言：『我之聖王。』龍天喜悅，澍甘露雨，五穀成熟，人民豐樂。若不親近諸惡人等，普利世間咸從正化，如意寶珠必現王國，於王隣國咸來歸服，人與非人無不稱歎。

「若有惡人於王國內，而生逆心，於須臾頃，如是之人福自衰滅，命終當墮地獄之中，經歷畜生備受諸苦。所以者何？由於聖王不知恩故，

<sup>32</sup> 大正藏：任

起諸惡逆得如是報。若有人民能行善心，敬輔仁王尊重如佛，是人現世安隱豐樂，有所願求無不稱心。所以者何？一切國王於過去時，曾受如來清淨禁戒，常為人王安隱快樂。以是因緣，違順果報皆如響應。聖王恩德廣大如是。

「善男子，三寶恩者，名不思議利樂眾生無有休息。是諸佛身真善無漏，無數大劫修因所證，三有業果永盡無餘，功德寶山巍巍無比，一切有情所不能知；福德甚深猶如大海，智慧無礙等於虛空，神通變化充滿世間，光明遍照十方三世。一切眾生煩惱業障，都不覺知，沈淪苦海生死無窮，三寶出世作大船師，能截愛流超昇彼岸，諸有智者悉皆瞻仰。

「善男子等，唯一佛寶具三種身：一自性身，二受用身，三變化身。第一佛身有大斷德，二空所顯，一切諸佛悉皆平等。第二佛身有大智德，真常無漏，一切諸佛悉皆同意。第三佛身有大恩德，定通變現，一切諸佛悉皆同事。善男子，其自性身無始無終，離一切相絕諸戲論，周圓無際凝然常住。其受用身，有二種相，一自受用，二他受用。自受用身，三僧祇劫所修萬行，利益安樂諸眾生已，十地滿心，運身直往色究竟天，

出過三界，淨妙國土坐無數量大寶蓮華，而不可說海會菩薩前後圍遶，以無垢繒繫於頂上，供養恭敬尊重讚歎，如是名為後報利益。爾時，菩薩入金剛定，斷除一切微細所知諸煩惱障，證得阿耨多羅三藐三菩提，如是妙果名現利益。是真報身有始無終，壽欲<sup>33</sup>劫數無有限量，初成正覺窮未來際，諸根相好徧周法界，四智圓滿。是真報身受用法樂：一、大圓鏡智，轉異熟識得此智慧，如大圓鏡現諸色像。如是如來鏡智之中，能現眾生諸善惡業，以是因緣，此智名為大圓鏡智。依大悲故恒緣眾生，依大智故常如法性，雙觀真俗無有間斷，常能執持無漏根身，一切功德為所依止。二、平等性智，轉我見識得此智慧，是以能證自佗平等無二<sup>34</sup>我性，如是名為平等性智。三、妙觀察智，轉分別識得此智慧，能觀諸法自相共相，於眾會前說諸妙法，能令眾生得不退轉，以是名為妙觀察智。四、成所作智，轉五種識得此智慧，能現一切種種化身，令諸眾生成熟善業，以是因緣，名為成所作智。如是四智而為上首，具足八萬四千智門，如是一切諸功德法，名為如

<sup>33</sup> 大正藏：命

<sup>34</sup> 大正藏：二無

來自受用身。

「諸善男子，二者如來佉受用身，具足八萬四千相好，居真淨土說一乘法，令諸菩薩受用大乘微妙法樂。一切如來為化十地諸菩薩眾，現於十種佉受用身。第一佛身，坐百葉蓮華，為初地菩薩說百法明門，菩薩悟已起大神通，變化滿於百佛世界，利益安樂無數眾生。第二佛身，坐千葉蓮華，為二地菩薩說千法明門，菩薩悟已起大神通，變化滿於千佛世界，利益安樂無量眾生。第三佛身，坐萬葉蓮華，為三地菩薩說萬法明門，菩薩悟已起大神通，變化滿於萬佛國土，利益安樂無數眾生。如是如來漸漸增長，乃至十地佉受用身，坐不可說妙寶蓮華，為十地菩薩說不可說諸法明門，菩薩悟已起大神通，變化滿於不可說佛微妙國土，利益安樂不可宣說不可宣說無量無邊種類眾生。

「如是十身，皆坐七寶菩提樹王，證得阿耨多羅三藐三菩提。諸善男子，一一華葉各各為一三千世界，各有百億妙高山王，及四大洲、日月星辰，三界諸天無不具足。一一葉上諸瞻部洲，有金剛座菩提樹王，其百千萬至不可說大小化佛，各於樹下破魔軍已，一時證得阿耨多羅三藐三菩

提。如是大小諸化佛身，各各具足三十二相、八十種好，為諸資糧及四善根諸菩薩等、二乘、凡夫，隨宜為說三乘妙法。為諸菩薩說應六波羅蜜，令得阿耨多羅三藐三菩提究竟佛慧。為求辟支佛者，說應十二因緣法；為求聲聞者，說應四諦法，度生老病死究竟涅槃。為餘眾生說人天教，令得人天安樂妙果。諸如是等大小化佛，皆悉名為佛變化身。善男子，如是二種應化身佛，雖現滅度，而此佛身相續常住。

「諸善男子，如一佛寶，有如是等無量無邊不可思議利樂眾生廣大恩德，以是因緣，名為如來、應、正遍知、明行圓滿、善逝、世間解、無上士、調御丈夫、天人師、佛、世尊。善男子，一佛寶中具足六種微妙功德：一者，無上大功德田；二者，無上有大恩德；三者，無足二足及以多足眾生中尊；四者，極難值遇如優曇華；五者，獨一出現三千大千世界；六者，世出世間功德滿一切義依。具如是等六種功德，常能利樂一切眾生，是名佛寶不思議恩。」

爾時，五百長者白佛言：「世尊！如佛所說，一佛寶中，無量化佛充滿世界利樂眾生。以何因緣，世間眾生多不見佛，受諸苦惱？」

佛告五百長者：「譬如日光天子放百千光照明世界，而有盲者不見光明。汝善男子，於意云何？日光天子而有過否？」

時長者言：「不也。世尊！」

佛言：「善男子，諸佛如來常演正法利樂有情，是諸眾生，常造惡業，都不覺知，無慚愧心，於佛法僧，不樂親近。如是眾生，罪根深重，經無量劫，不得見聞三寶名字，如彼盲者不覩日光。若有眾生，恭敬如來，愛樂大乘，尊重三寶，當知是人，業障銷除，福智增長，成就善根，速得見佛，永離生死，當證菩提。

「諸善男子，如一佛寶有無量佛，如來所說法寶亦然，一法寶中有無量義。善男子，於法寶中有其四種：一者，教法；二者，理法；三者，行法；四者，果法。一切無漏能破無明煩惱業障，聲、名、句、文名為教法；有無諸法名為理法；戒、定、慧行名為行法；無為妙果<sup>35</sup>名為果法。如是四種名為法寶，引導眾生，出生死海，到於彼岸。善男子，諸佛所師即是法寶。所以者何？三世諸佛，依法修行，斷一切障，得成菩提，盡未來際，利益眾生，以是因緣，三世如來，常能

<sup>35</sup> 大正藏：為無為果

供養諸波羅蜜微妙法寶，何況三界一切眾生未得解脫，而不能敬微妙法寶？

「善男子，我昔曾為求法人王，入大火坑而求正法，永斷生死得大菩提。是故法寶能破一切生死牢獄，猶如金剛能壞萬物；法寶能照癡闇眾生，如日天子能照世界；法寶能救貧乏眾生，如摩尼珠雨眾寶故；法寶能與眾生喜樂，猶如天鼓樂諸天故；法寶能為諸天寶階，聽聞正法得生天故；法寶能為堅牢大船，渡生死海到彼岸故；法寶猶如轉輪聖王，能除三毒煩惱賊故；法寶能為珍妙衣服，覆蓋無慚諸眾生故；法寶猶如金剛甲冑，能破四魔證菩提故；法寶猶如智慧利劍，割斷生死離繫縛故；法寶正是三乘寶車，運載眾生出火宅故；法寶猶如一切明燈，能照三塗黑闇處故；法寶猶如弓箭矛稍，能鎮國界摧怨敵故；法寶猶如險路導師，善誘眾生達寶所故。善男子，三世如來所說妙法，有如是等難思議事，是名法寶不思議恩。

「善男子，世出世間有三種僧：一、菩薩僧，二、聲聞僧，三、凡夫僧。文殊師利及彌勒等，是菩薩僧；如舍利弗、目犍連等，是聲聞僧；若有成就別解脫戒真善凡夫，乃至具足一切正見，

能廣為佗演說開示眾聖道法利樂眾生，名凡夫僧；雖未能得無漏戒定及慧解脫，而供養者獲無量福。如是三種名真福田僧。復有一類名福田僧，於佛舍利及佛形像，并諸法僧聖所制戒深生敬信，自無邪見令佗亦然，能宣正法讚歎一乘，深信因果常發善願，隨其過犯悔除業障。當知是人信三寶力，勝諸外道百千萬倍，亦勝四種轉輪聖王，何況餘類一切眾生？如鬱金華雖然萎悴，猶勝一切諸雜類華。正見比丘亦復如是，勝餘眾生百千萬倍，雖毀禁戒不壞正見，以是因緣名福田僧。若善男子善女人等，供養如是福田僧者，所得福德無有窮盡，供養前三真實僧寶，所獲功德正等無異。如是四類聖凡僧寶，利樂有情恒無暫捨，是名僧寶不思議恩。」

爾時，五百長者白佛言：「世尊！我等今日聞佛法音，得悟三寶利益世間。然今不知以何義故，說佛法僧得名為寶？願佛解說，顯示眾會及未來世敬信三寶一切有情，永斷疑網，得不壞信，令入三寶不思議海。」

爾時，佛告諸長者言：「善哉，善哉！汝善男子，能問如來甚深妙法，於未來世利益安樂一切眾生。譬如世間第一珍寶具足十義，莊嚴國界

饒益有情，佛法僧寶亦復如是。一者堅牢，如摩尼寶無人能破，佛法僧寶亦復如是，外道天魔不能破故。二者無垢，世間勝寶清淨光潔不雜塵穢，佛法僧寶亦復如是，悉能遠離煩惱塵垢。三者與樂，如天德瓶能與安樂，佛法僧寶亦復如是，能與眾生世出世樂。四者難遇，如吉祥寶希有難得，佛法僧寶亦復如是，業障有情億劫難遇。五者能破，如如意寶能破貧窮，佛法僧寶亦復如是，能破世間諸貧苦故。六者威德，如轉輪王所有輪寶能伏諸怨，佛法僧寶亦復如是，具六神通降伏四魔。七者滿願，如摩尼珠隨心所求能雨眾寶，佛法僧寶亦復如是，能滿眾生所修善願。八者莊嚴，如世珍寶莊嚴王宮，佛法僧寶亦復如是，莊嚴法王菩提寶宮。九者最妙，如天妙寶最為微妙，佛法僧寶亦復如是，超諸世間最勝妙寶。十者不變，譬如真金入火不變，佛法僧寶亦復如是，世間八風不能傾動。佛法僧寶具足無量神通變化，利樂有情暫無休息。以是義故，諸佛法僧說名為寶。善男子，我為汝等略說四種世出世間有恩之處，汝等當知，修菩薩行應報如是四種之恩。」

爾時，五百長者白佛言：「世尊！如是四恩甚為難報，當修何行而報是恩？」

佛告諸長者言：「善男子，為求菩提，有其三種十波羅蜜：一者，十種布施波羅蜜多；二者，十種親近波羅蜜多；三者，十種真實波羅蜜多。若有善男子、善女人，發阿耨多羅三藐三菩提心，能以七寶滿於三千大千世界，布施無量貧窮眾生，如是布施但名布施波羅蜜多，不名真實波羅蜜多。若有善男子、善女人，發大悲心為求無上正等菩提，以自妻子施與他人心無憍惜，身肉手足頭目髓腦，乃至身命施來求者，如是布施但名親近波羅蜜多，未名真實波羅蜜多。若善男子、善女人，發起無上大菩提心，住無所得，勸諸眾生同發此心，以真實法一四句偈，施一眾生，使向無上正等菩提，是名真實波羅蜜多。前二布施未名報恩，若善男子、善女人能修如是第三真實波羅蜜多，乃名真實能報四恩。所以者何？前二布施有所得心，第三施者無所得心。以真法施一切<sup>36</sup>有情，令發無上大菩提心，是人當得證菩提時，廣度眾生無有窮盡，紹三寶種使不斷絕，以是因緣名為報恩。」

爾時，五百長者，從佛聞是昔所未聞報恩之法，心懷踊躍，得未曾有，發心求趣無上菩提，

<sup>36</sup> 大正藏：一

得忍辱三昧，入不思議智，永不退轉。

爾時，會中八萬四千眾生，發菩提心，得堅固信，及此三昧海會大眾，悉得金剛忍辱三昧，悟無生忍及柔順忍，或證初地得不起忍，無量眾生發菩提心，住不退位。

爾時，佛告五百長者：「未來世中一切眾生，若有得聞此心地觀報四恩品，受持讀習，解說書寫，廣令流布，如是人等福智增長，諸天衛護，現身無疾，壽命延長；若命終時，即得往生彌勒內宮，覩白毫相，超越生死，龍華三會當得解脫，十方淨土隨意往生，見佛聞法入正定聚，速成阿耨多羅三藐三菩提如來智慧。」

大乘本生心地觀經卷第二

# 大乘本生心地觀經卷第三

唐罽賓國三藏般若等譯

## 報恩品第二<sup>37</sup>下

爾時，王舍大城東北八十由旬，有一小國名增長福。於彼國中，有一長者名曰智光，其年衰邁，唯有一子，其子惡性不順父母，所有教誨皆不能從。遙聞釋迦牟尼如來在王舍城耆闍崛山，為濁惡世無量眾生，宣說大乘報恩之法，父母及子并諸眷屬，為聽法故，齎持供具來詣佛所，供養恭敬而白佛言：「我有一子其性弊惡，不受父母所有教誨，今聞佛說報四種恩，為聽法故來詣佛所。惟<sup>38</sup>願世尊！為我等類及諸眷屬，宣說四恩甚深妙義，令彼惡子生孝順心，此世當生令得安樂。」

爾時，佛告智光：「善哉！善哉！汝為法故來至我所，供養恭敬樂聞是法。汝等諦聽，善思念之。若有善男子、善女人，發菩提心為聞法要，舉足下足，隨其遠近所踐之地微塵數量，以是因

<sup>37</sup> 大正藏：第二之

<sup>38</sup> 大正藏：唯

緣，感得金輪轉輪聖王；聖王報盡作欲天王，欲天報盡作梵天王，見佛聞法速證妙果。汝大長者及餘眾等，為於法故來至我所，如是經過八十由旬，大地微塵一一塵數，能感人天輪王果報。既聞法已，當來證得阿耨多羅三藐三菩提。我雖先說甚深四恩微妙義趣，今復為汝重宣此義。」而說偈言：

最勝法王大聖主 一切人天非<sup>39</sup>等倫  
具諸相好以嚴身 智海如空無有量  
自他利行皆圓滿 名稱普聞諸國土  
永斷煩惱餘習氣 善持密行護諸根  
百四十種不共德 廣大福海悉圓滿  
三昧神通皆具足 八自在宮常遊樂  
十方人天及外道 無有能難調御師  
金口能宣無礙辯 雖無能問而自說  
如大海潮時不失 亦如天鼓稱天心  
如是自在唯佛有 非五通仙魔梵等  
難思劫海修行願 證獲如是大神通  
我入三昧大寂室 觀察諸根及藥病  
自出禪定而讚歎 三世佛法心地門

<sup>39</sup> 大正藏：無

時諸長者退大心 樂住二乘自利行  
我開大智方便教 引入三空解脫門  
如來意趣莫能量 唯佛能知真祕密  
利根聲聞及獨覺 勤求不退諸菩薩  
十二劫數共度量 無有能知其少分  
假使十方凡聖智 受<sup>40</sup>與一人為智者  
如是智者如竹林 不能測量其少分  
世間凡夫無慧眼 迷於恩處失妙果  
五濁惡世諸眾生 不悟深恩恒背德  
我為開示於四恩 令入正見菩提道  
慈父悲母長養恩 一切男女皆安樂  
慈父恩高如山王 悲母恩深如大海  
若我住世於一劫 說悲母恩不能盡  
我今略說於少分 猶如蚊虻飲大海  
假使有人為福德 供養淨行婆羅門  
五通神仙自在者 大智師長及善友  
安置七珍為堂殿 及以牛頭梅檀房  
百寶卧具各敷陳 世間美味如甘露<sup>41</sup>  
療治萬病諸湯藥 盛滿金銀器物中  
如是供養日三時 乃至數盈於百劫

<sup>40</sup> 大正藏：授

<sup>41</sup> 「百寶卧具各敷陳，世間美味如甘露」大正藏及麗藏本有，永樂北藏及龍藏本則無。

不如一念申少分 供養悲母大恩田  
福德無邊不可量 算分喻分皆無比  
世間悲母孕其子 十月懷胎長受苦  
於五欲樂情不著 隨時飲食亦同然  
晝夜常懷悲愍心 行住坐卧受諸苦  
若正誕其胎藏子 如攢鋒刃解肢節  
迷惑東西不能辯 遍身疼痛無所堪  
或因此難而命終 六親眷屬咸悲惱  
如是眾苦皆由子 憂悲痛切非口宣  
若得平復身安樂 如貧獲寶喜難量  
顧視容顏無馱足 憐念之心不暫捨  
母子恩情常若是 出入不離宵臆前  
母乳猶如甘露泉 長養及時曾無竭  
慈念之恩實難比 鞠育之德亦難量  
世間大地稱為重 悲母恩重過於彼  
世間須彌稱為高 悲母恩高過於彼  
世間速疾唯猛風 舉<sup>42</sup>心一念過於彼  
若有眾生行不孝 令母暫時起恨心  
怨念之辭少分生 子乃隨言遭苦難  
一切佛與金剛天 神仙祕法無能救  
若有男女依母教 承順顏色不相違

<sup>42</sup> 大正藏：母

一切災難盡消除 諸天擁護常安樂  
若能承順於悲母 如是男女悉非凡  
大悲菩薩化人間 示現報恩諸方便  
若有男子及女人 為報母恩行孝養  
割肉刺血常供給 如是數盈於一劫  
種種勤修於孝道 猶未能報暫時恩  
十月處於胎藏中 常銜乳根飲胎<sup>43</sup>血  
自為嬰孩及童子 所飲母乳百斛餘  
飲食湯藥妙衣服 子先母後為常則  
子若愚癡人所惡 母亦恩憐不棄遺  
昔有女人抱其子 渡於恒河水瀑流  
以沈<sup>44</sup>水故力難前 與子俱沒無能捨  
為是慈念善根力 命終上生於梵天  
長受梵天三昧樂 得遇如來受佛記  
是故悲母有十德 隨應義利立其名<sup>45</sup>  
一名大地二能生 三能正者四養育  
五與智者六莊嚴 七名安隱八教授  
九教誡者十與業 餘恩不過於母恩  
何法世間最富有 何法世間最貧無  
母在堂時為最富 母不在時為最貧

<sup>43</sup> 大正藏：脂

<sup>44</sup> 大正藏：汎

<sup>45</sup> 「是故悲母有十德，隨應義利立其名」大正藏及麗藏本有，永樂北藏及龍藏本則無。

母在之時為日中 悲母亡時為日沒  
母在之時皆圓滿 悲母亡時悉空虛  
世間一切善男子<sup>46</sup> 恩重父母如丘山  
應當孝敬恒在心 知恩報恩是聖道  
不惜身命奉甘旨 未曾一念虧色養  
如其父母奄喪時 將欲報恩誠不及  
佛昔修行為慈母 感得相好金色身  
名聞廣大遍十方 一切人天咸稽首  
人與非人皆恭敬 自緣往昔報慈恩  
我昇三十三天宮 三月為母說真法  
令母聽聞歸正道 悟無生忍常不退  
如是皆為報悲恩 雖報恩深猶未足  
神通第一目犍連 已斷三界諸煩惱  
以神通力觀慈母 見在受苦餓鬼中  
目連自往報母恩 救免慈親所受苦  
上生他化諸天眾 共為遊樂處天宮  
當知父母恩最深 諸佛聖賢咸報德  
若人至心供養佛 復有精勤修孝養  
如是二人福無異 三世受報亦無窮  
世人為子造諸罪 墮在三塗長受苦  
男女非聖無神通 不見輪迴難可報

<sup>46</sup> 大正藏：女

哀哉世人無聖力 不能拔濟於慈母  
以是因緣汝當知 勤修福利諸功德  
以其男女追勝福 有大金光照地獄  
光中演說深妙音 開悟父母令發意  
憶昔所生常造罪 一念悔心悉除滅  
口稱南無三世佛 得脫無暇苦難身  
往生人天長受樂 見佛聞法當成佛  
或生十方淨土中 七寶蓮華為父母  
華開見佛悟無生 不退菩薩為同學  
獲六神通自在力 得入菩提微妙宮  
皆是菩薩為男女 乘大願力化人間  
是名真報父母恩 汝等眾生共修學  
有情輪迴生六道 猶如車輪無始終  
或為父母為男女 世世生生互有恩  
如見父母等無差 不證聖智無由識  
一切男子皆是父 一切女人皆是母  
如何未報前世恩 却生異念成怨嫉  
常須報恩互饒益 不應打罵致怨嫌  
若欲增修福智門 晝夜六時當發願  
願我生生無量劫 得宿住智大神通  
能知過去百千生 更相憶識為父母  
循環六趣四生中 令我一念常至彼

為說妙法離苦因 使得人天長受樂  
勸發堅固菩提願 修行菩薩六度門  
永斷二種生死因 疾證涅槃無上道  
十方一切諸國王 正法化人為聖主  
國王福德為最勝 所作自在名為天  
三十三天及餘天 恒將福力助王化  
諸天擁護如一子 以是得稱天子名  
世間以王為根本 一切人民為所依  
猶如世間諸舍宅 柱為根本而成立  
王以正法化人民 如大梵王生萬物  
王行非法無政理 如琰魔王滅世間  
王所容受姦邪人 象蹋華池等無異  
勿謂時逢濁惡世 當知善惡是王修<sup>47</sup>  
如日天子照世間 國王化世亦如是  
日光夜分雖不照 能使有情得安樂  
王以非法化於世 一切人民無所依  
世間所有諸恐怖 依王福力不能生  
人民所成安隱樂 當知是王福所及  
世間所有勝妙華 依王福力而開敷  
世間所有妙園林 依王福力皆滋茂  
世間所有諸藥草 依王福力差諸疾

<sup>47</sup> 「勿謂時逢濁惡世，當知善惡是王修」大正藏及麗藏本有，永樂北藏及龍藏本則無。

世間百穀及苗稼 依王福力皆成實  
世間人民受豐樂 依王福力常自然  
譬如長者有一子 智慧端嚴世無比  
父母恩愛如眼目 晝夜常生護念心  
國大聖王亦如是 愛念眾生如一子  
養育耆年拯孤獨 賞罰之心常不二  
如是仁王為聖主 羣生敬仰等如來  
仁王化治國無災 萬姓恭勤常安隱  
國王無法化於世 疾疫流行災有情  
如是一切人非人 罪福昭然無所覆  
善惡法中分七分 造者獲五王得二  
園林田宅悉皆然 所稅等分亦如是  
轉輪聖王出現時 分作六分王得一  
時諸人民得五分 善惡業報亦皆然  
若有人王修正見 如法化世名天主  
以依天法化世間 毗沙門王常擁護  
及餘三天羅刹眾 皆當守護聖王宮  
聖王出世理國時 饒益眾生成十德  
一名能照於國界 二名莊嚴於國土  
三名能與諸安樂 四名能伏諸怨敵  
五名能遮諸恐怖 六名修集諸聖賢  
七名諸法為根本 八名護持於世間

九名能作造化功 十名國界人民主  
若王成就十勝德 梵王帝釋及諸天  
夜叉羅刹鬼神王 隱身常來護國界  
龍王歡喜降甘雨 五穀成熟萬姓安  
國中處處生珍寶 人馬彊力無怨敵  
如意寶珠現王前 境外諸王自賔伏  
若生不善於王國 一念起心成眾惡  
是人命終墮地獄 受苦永劫無出期  
若有勤神<sup>48</sup>助國王 諸天護念增榮祿  
智光長者汝應知 一切人王業所感  
諸法無不因緣成 若無因緣無諸法  
說無生天及惡趣 如是之人不了因  
無因無果大邪見 不知罪福生妄計  
王今所受諸福樂 往昔曾持三淨戒  
戒德熏修所招感 人天妙果獲王身  
若人發起菩提心 願力資成無上果  
堅持上品清淨戒 起居自在為法王  
神通變化滿十方 隨緣普濟諸羣品  
中品受持菩薩戒 福得自在轉輪王  
隨心所作盡皆成 無量人天悉遵奉  
下上品持大鬼王 一切非人咸率伏

<sup>48</sup> 大正藏：誠

受持戒品雖缺犯 由戒勝故得為王  
下中品持禽獸王 一切飛走皆歸伏  
於清淨戒有缺犯 由戒勝故得為王  
下下品持琰魔王 處地獄中常自在  
雖毀禁戒生惡道 由戒勝故得為王  
以是義故諸眾生 應受菩薩清淨戒  
善能護持無缺犯 隨所生處作人王  
若有不受如來戒 尚<sup>49</sup>不能得野干身  
何況能感人天中 最勝快樂居王位  
是故王者非無因 戒業精勤成妙果  
國王自是人民主 慈恤如母養嬰兒  
如是人王有大恩 撫育之心難可報  
以是因緣諸有情 若能修證大菩提  
於諸眾生起大悲 應受如來三聚戒  
若欲如法受戒者 應當懺罪令消滅  
起罪之因有十緣 身三口四及意三  
生死無始罪無窮 煩惱大海深無底  
業障峻極如須彌 造業由因二種起  
所謂現行及種子 藏識持緣一切種  
如影隨形不離身 一切時中障聖道  
近障人天妙樂果 遠障無上菩提果

<sup>49</sup> 大正藏：終

在家能招煩惱因 出家亦破清淨戒  
若能如法懺悔者 所有煩惱悉皆除  
猶如劫火壞世間 燒盡須彌并巨海  
懺悔能燒煩惱薪 懺悔能往生天路  
懺悔能得四禪樂 懺悔雨寶摩尼珠  
懺悔能延金剛壽 懺悔能入常樂宮  
懺悔能出三界獄 懺悔能開菩提華  
懺悔見佛大圓鏡 懺悔能至於寶所  
若能如法懺悔者 當依二種觀門修  
一者觀事滅罪門 二者觀理滅罪門  
觀事滅罪有其三 上中下根為三品  
若有上根求淨戒 發大精進心無退  
悲淚泣血常精懇 哀感徧身皆血現  
繫念十方三寶所 并餘六道諸眾生  
長跪合掌心不亂 發露洗心求懺悔  
惟<sup>50</sup>願十方三世佛 以大慈悲哀愍我  
我處輪迴無所依 生死長夜常不覺  
我在凡夫具諸縛 狂心顛倒徧攀緣  
我處三界火宅中 妄染六塵無救護  
我生貧窮下賤家 不得自在常受苦  
我生邪見父母家 造罪依於惡眷屬

<sup>50</sup> 大正藏：唯

唯願諸佛大慈尊 哀愍護念如一子  
一懺不復造諸罪 三世如來當證明  
如是勇猛懺悔者 名為上品求淨戒  
若有中根求戒者 一心勇猛懺諸罪<sup>51</sup>  
若<sup>52</sup>淚交橫不覺知 徧身流汗哀求佛  
發露無始生死業 願大悲水洗塵勞  
滌除罪障淨六根 施我菩薩三聚戒  
我願堅持不退轉 精修度脫苦眾生  
自未得度先度他 盡未來際常無斷  
如是精勤勇猛者 不惜身命求菩提  
能感三寶靈異相 是名中品大懺悔<sup>53</sup>  
若有下根求淨戒 發是<sup>54</sup>無上菩提心  
涕淚悲泣身毛豎 於所造罪深慚愧  
對於十方三寶所 及以六道眾生前  
至誠發露無始來 所有惱亂諸眾生  
起於無礙大悲心 不惜身命悔三業  
已作之罪皆發露 未作之惡更不造  
如是三品懺諸罪 皆名第一清淨戒  
以慚愧水洗塵勞 身心俱為清淨品<sup>55</sup>

<sup>51</sup> 「若有中根求戒者，一心勇猛懺諸罪」大正藏及麗藏本有，永樂北藏及龍藏本則無。

<sup>52</sup> 大正藏：涕

<sup>53</sup> 「能感三寶靈異相，是名中品大懺悔」大正藏及麗藏本有，永樂北藏及龍藏本則無。

<sup>54</sup> 大正藏：起

<sup>55</sup> 大正藏：器

諸善男子汝當知 已說淨觀諸懺悔  
於其事理無差別 但以根緣應不同  
若於<sup>56</sup>修習觀正理 遠離一切諸散亂  
著新淨衣跏趺坐 攝心正念離諸緣  
常觀諸佛妙法身 體性如空不可得  
一切諸罪性皆如 顛倒因緣妄心起  
如是罪相本來空 三世之中無所得  
非內非外非中間 性相如如俱不動  
真如妙理絕名言 唯有聖智能通達  
非有非無非有無 非不有無離名相  
周徧<sup>57</sup>法界無生滅 諸佛本來同一體  
惟願諸佛垂加護 能滅一切顛倒心  
願我早悟真性源 速證如來無上道  
若有清信善男子 日夜能觀妙理空  
一切罪障自消除 是名最上持淨戒  
若人觀知實相空 能滅一切諸重罪  
猶如大風吹猛火 能燒無量諸草木  
諸善男子真實觀 名為諸佛祕要門  
若欲為他廣分別 無智人中勿宣說  
一切凡愚眾生類 聞必生疑心不信

<sup>56</sup> 大正藏：欲

<sup>57</sup> 大正藏：徧

若有智者生信解 念念觀察悟真如  
十方諸佛皆現前 菩提妙果自然證  
善男子等我滅後 未來世中淨信者  
於二觀門常懺悔 當受菩薩三聚戒  
若欲受持上品戒 應請戒師佛菩薩  
請我釋迦牟尼佛 當為菩薩戒和尚<sup>58</sup>  
龍種淨智尊王佛 當為淨戒阿闍梨  
未來導師彌勒佛 當為清淨教授師  
現在十方兩足尊 當為清淨證戒師  
十方一切諸菩薩 當為修學戒伴侶  
釋梵四王金剛天 當為學戒外護眾  
奉請如是佛菩薩 及以現前傳戒師  
普為報於四恩故 發起清淨菩提心  
應受菩薩三聚戒 饒益一切有情戒  
修攝一切善法戒 修攝一切律儀戒  
如是三聚清淨戒 三世如來所護念  
無聞非法諸有情 無量劫中未聞見  
唯有過去十方佛 已受淨戒常護持  
二障煩惱永斷除 獲證無上菩提果  
未來一切諸世尊 守護三聚淨戒寶  
斷除三障并習氣 當證正等大菩提

<sup>58</sup> 大正藏：上

現在十方諸善逝 俱<sup>59</sup>修三聚淨戒因  
永斷生死苦輪迴 得證三身菩提果  
超越生死深大海 菩薩淨戒為船筏  
永斷貪瞋癡繫縛 菩薩淨戒為利劍  
生死嶮道諸怖畏 菩薩淨戒為舍宅  
息除貧賤諸苦因 淨戒能為如意寶  
鬼魅所著諸疾病 菩薩淨戒為良藥  
人天為王得自在 三聚淨戒作良緣  
及餘四趣諸王身 淨戒為緣獲勝果  
是故能修自在因 當得為王受尊貴  
應先禮敬十方佛 日夜增修清淨戒  
諸佛護念當<sup>60</sup>受持 戒等金剛無破壞  
三界諸天諸善神 衛護王身及眷屬  
一切怨敵皆歸伏 萬姓歡娛感王化  
是故受持菩薩戒 感世出世無為果  
三寶常住化於世 恩德廣大不思議  
過未及現劫海中 功德利生無休息  
佛日千光恒照世 利益羣生度有緣  
無緣不覩佛慈光 猶如盲者無所見  
法寶一味無變易 前佛後佛說皆同

<sup>59</sup> 大正藏：具

<sup>60</sup> 大正藏：常

如雨一味普能霑 草木滋榮大小別  
眾生隨根各得解 草木稟潤亦差殊  
菩薩聲聞化眾生 如大河水流不竭  
眾生無信化不被 如處幽冥日難照  
如來月光甚清涼 能除眾暗亦如是  
猶如覆盆月不照 迷惑眾生亦如是  
法寶甘露妙良藥 能治一切煩惱病  
有信服藥證菩提 無信隨緣墮惡道  
菩薩聲聞常在世 無數方便度眾生  
若有眾生信樂心 各入三乘安樂位  
如來不出於世間 一切眾生入邪道  
永離甘露飲毒藥 長溺苦海無出期  
佛日出現三千界 放大光明照長夜  
眾生如睡不覺知 蒙光得入無為室  
如來未說一乘法 十方國土悉空虛  
發心修行成正覺 一切佛土皆嚴淨  
一乘法寶諸佛母 三世如來從此生  
般若方便無間修 解脫道成登妙覺  
若佛菩薩不出現 世間眾生無導師  
生死嶮難無由過 如何得至於寶所  
以大願力為善友 常說妙法令修行  
趣向十地證菩提 善入涅槃安樂處

大悲菩薩化世間 方便引導眾生故  
內祕一乘真實行 外現緣覺及聲聞  
鈍根小智聞一乘 怖畏發心經多劫  
不知身有如來藏 唯欣寂滅厭塵勞  
眾生本有菩提種 悉在賴耶藏識中  
若遇善友發大心 三種鍊磨修妙行  
永斷煩惱所知障 證得如來常住身  
菩提妙果不難成 真善知識實難遇  
一切菩薩修勝道 四種法要應當知  
親近善友為第一 聽聞正法為第二  
如理思量為第三 如法修證為第四  
十方一切大聖主 修是四法證菩提  
汝諸長者大會眾 及未來世清信士  
如是四法菩薩地 要當修習成佛道  
善男子等應諦聽 如來所說四恩者  
佛寶之恩最為上 為度眾生發大心  
三僧企耶<sup>61</sup>大劫中 具修百千諸苦行  
功德圓滿遍法界 十地究竟證三身  
法身體遍諸眾生 萬德凝然性常住  
不生不滅無來去 不一不異非常斷  
法界遍滿如虛空 一切如來共修證

<sup>61</sup> 大正藏：邪

有為無為諸功德 依止法身常清淨  
法身本性如虛空 遠離六塵無所染  
法身無形離諸相 能相所相悉皆空  
如是諸佛妙法身 戲論言辭相寂滅  
遠離一切諸分別 心行處滅體皆如  
為欲證得如來身 菩薩善修於萬行  
智體無為真法性 色心一切諸佛同  
譬如飛鳥至金山 能使鳥身同彼色  
一切菩薩如飛鳥 法身佛體類金山  
自受用身諸相好 一一遍滿十方刹  
四智圓明受法樂 前佛後佛體皆同  
雖遍法界無障礙 如是妙境不思議  
是身常住報佛土 自受法樂無間斷  
他受用身諸相好 隨機應現無增減  
為化地上諸菩薩 一佛現於十種身  
隨所應現各不同 展轉倍增至無極  
稱根為說諸法要 令受法樂入一乘  
彼獲神通漸增長 所悟法門亦如是  
下地菩薩起智慧 不能了達於上地  
能化所化隨地增 各隨本緣為所屬  
或一菩薩多佛化 或多菩薩一佛化  
如是十佛成正覺 各坐七寶菩提樹

前佛入滅後佛成 不同化佛經劫現  
十佛所坐蓮華臺 周遍各有百千葉  
一一葉中一佛土 即是三千大千界  
一一界中有百億 日月星辰四大洲  
六欲諸天及四禪 空處識處非想等  
其四洲中南瞻部 一一各有金剛座  
及以菩提大樹王 爾所變化諸佛身  
一時證得菩提道 轉妙法輪於大千  
菩薩緣覺及聲聞 隨所根宜成聖果  
如是所說三身佛 最上無比名為寶  
應化二身所說法 教理行果為法寶  
諸佛以法為大師 修心所證菩提道  
法寶三世無變易 一切諸佛皆歸學  
我今頂禮薩婆若 故說法寶為佛師  
或入猛火不能燒 應時即得真解脫  
法寶能摧生死獄 猶如金剛碎萬物  
法寶能照眾生心 如日天子臨空界<sup>62</sup>  
法寶能作堅牢船 能渡愛河超彼岸  
法寶能與眾生樂 譬如天鼓應天心  
法寶能濟眾生貧 如摩尼珠雨眾寶  
法寶能為三寶階 聞法修因生上界

<sup>62</sup> 「法寶能照眾生心，如日天子臨空界」大正藏及麗藏本有，永樂北藏及龍藏本則無。

法寶金輪大聖王 以大法力破四魔  
法寶能為大寶車 能運眾生出火宅  
法寶能為大導師 能引眾生化寶所  
法寶能吹大法螺 覺悟眾生成佛道  
法寶能為大法燈 能照生死諸黑闇  
法寶能為金剛箭 能鎮國界伏諸怨  
三世如來所說法 能利眾生成脫苦縛  
引入涅槃安樂城 是名法寶恩難報  
智光長者汝諦聽 世出世僧有三稱<sup>63</sup>  
菩薩聲聞聖凡眾 能益眾生成福田  
文殊師利大聖尊 三世諸佛以為母  
十方如來初發心 皆是文殊教化力  
一切世界諸有情 聞名見身及光相  
并見隨類諸化現 皆成佛道難思議  
彌勒菩薩法王子 從初發心不食肉  
以是因緣名慈氏 為欲成熟諸眾生  
處於第四兜率天 四十九重如意殿  
晝夜恒說不退行 無數方便度人天  
八功德水妙華池 諸有緣者悉同生  
我今弟子付彌勒 龍華會中得解脫  
於末法中善男子 一搏之食施眾生

<sup>63</sup> 大正藏：種

以是善根見彌勒 當得菩提究竟道  
舍利弗等大聲聞 智慧神通化羣生  
若能成就解脫戒 真是修行正見人  
為佗說法傳大乘 如是福田為第一  
或有一類凡夫僧 戒品不全生正見  
讚詠一乘微妙法 隨犯隨悔障消<sup>64</sup>除  
為諸眾生成佛因 如是凡夫亦僧寶  
如鬱金華雖萎悴 猶勝一切諸妙華  
正見比丘亦如是 四種輪王所不及  
如是四類聖凡僧 利樂有情無暫歇  
稱為世間良福田 是名僧寶大恩德  
如我所說四恩義 是名能造世間田<sup>65</sup>  
一切萬物從是生 若離四恩不可得  
譬如世間諸色塵 能造四大而得生  
有情世間亦復然 由彼四恩得安立

爾時，智光長者及諸子等，聞佛所說四種大恩，得未曾有，歡喜合掌，而白佛言：「善哉！善哉！大慈世尊！為濁惡世不信因果、不孝父母、邪見眾生，說真妙法利樂世間。惟願世尊！說報恩義，我等既悟甚深四恩，而今未知修何善業而

<sup>64</sup> 大正藏：銷

<sup>65</sup> 大正藏：因

報是恩？」

佛告長者：「善男子等，我為五百長者先已廣說，而今為汝略說少分。若善男子、善女人，為得阿耨多羅三藐三菩提，精勤修行十波羅蜜，若有所得未名報恩；若人須臾能行一善，心無所得，乃名報恩。所以者何？一切如來觸無所得，乃成佛道，化諸眾生。若有淨信善男子等，得聞是經，信解受持，解說書寫，以無所得三輪體空，竊為一人說四句法，除邪見心，趣向菩提，是即名為報於四恩。何以故？是人當得無上菩提，展轉教化無量眾生，令入佛道，三寶種子，永不斷絕。」

爾時，智光長者聞是偈已，得忍辱三昧，猷離世間，得不退轉。時，諸子等八千人俱得此三昧，皆發無等等阿耨多羅三藐三菩提心。四萬八千人亦證三昧，遠塵離垢得法眼淨。

大乘本生心地觀經卷第三

# 大乘本生心地觀經卷第四

唐罽賓國三藏般若等譯<sup>66</sup>

## 馱捨品第三

爾時，智光長者承佛威神即從座起，頂禮佛足恭敬合掌，而白佛言：「世尊！我今從佛聞是報恩甚深妙法，心懷踊躍，得未曾有，如飢<sup>67</sup>渴人遇甘露食。我今樂欲酬報四恩，投佛法僧，出家修道，常勤精進，希證菩提。佛大慈悲，於一時中在毗舍離城，為無垢稱說甚深法：『汝無垢稱，以清淨心為善業根，以不善心為惡業根，心清淨故世界清淨，心雜穢故世界雜穢。我佛法中，以心為主，一切諸法無不由心。汝今在家有大福德，眾寶瓔珞無不充足，男女眷屬安隱快樂，成就正見不謗三寶，以孝養心恭敬尊親，起大慈悲給施孤獨，乃至螻蟻尚不加害，忍辱為衣，慈悲為室，尊敬有德，心無憍慢，憐愍一切猶如赤子，不貪財利常修善<sup>68</sup>捨，供養三寶心無馱足，為法捨身而無憊惜。如是白衣雖不出家，已具無量無

<sup>66</sup> 大正藏：大唐罽賓國三藏般若奉詔譯

<sup>67</sup> 大正藏：饑

<sup>68</sup> 大正藏：喜

邊功德。汝於來世萬行圓滿，超過三界證大菩提，汝所修心即真沙門亦婆羅門，是真比丘是真出家。如是之人，此則名為在家出家。』世尊或有一時於迦蘭陀竹林精舍，為其惡性六羣比丘說教誡法，而告之言：『汝等比丘！諦聽諦聽！入佛法海信為根本，渡生死河戒為船筏。若人出家不護禁戒，貪著世樂毀佛戒寶，或失正見入邪見林，引無量人墮大深坑。如是比丘不名出家，非是沙門非婆羅門，形似沙門心常在家，如是沙門無遠離行。遠離之行有其二種：一、身遠離。二、心遠離。身遠離者，若人出家身處空閑，不染欲境名身遠離。身雖離故心<sup>69</sup>貪欲境，如是之人不名遠離。若淨信男及淨信女，身居聚落發無上心，以大慈悲饒益一切，如是修行名真遠離。』於是六羣惡性比丘，聞是法音得柔順忍。

「然今我等雖信佛說，各各懷疑意未決定。善哉！世尊！能斷世間一切疑者、於一切法得自在者、真實語者、無二語者、是知道者、是開道者，惟願如來，為我等輩及未來世一切有情，捨於方便說真實法，永離疑悔，令入佛道。今此會中有二菩薩，一者出家，二者在家，是二菩薩，

<sup>69</sup> 大正藏：若有出家修清淨心，不染欲境名心遠離。身雖出家，心

善能利樂一切有情而無休息，如我惟忖，出家菩薩不及在家修菩薩行。所以者何？昔有金輪轉輪王，發阿耨多羅三藐三菩提心，厭離世間無常苦空，捨輪王位如棄洩唾，清淨出家入於佛道。是時後宮夫人嫫女八萬四千，見王出家各懷戀慕，心生<sup>70</sup>號慟生大逼惱，起愛別離如地獄苦。金輪聖王初受位時，所感寶女及王千子、大臣、眷屬，共傷離別捨位出家，號泣之聲滿四天下。此諸眷屬各作是言：『我王福智無量無邊，如何見棄捨我出家？哀哉苦哉世界空虛，從今已去無依無怙。』若有淨信善男子、善女人，歸佛法僧發菩提心，捨離父母出家入道，父母憐愍思念情深，離別悲哀感動天地，如涸轍魚宛轉于地，愛別離苦亦復如是，如彼輪王眷屬之心。出家菩薩饒益眾生，云何憍害父母、妻子，令無量人受大苦惱？以是因緣，出家菩薩無慈無悲不利眾生，是故非如在家菩薩具大慈悲，憐愍眾生利益一切。」

爾時，佛告智光長者：「善哉！善哉！汝大慈悲勸請我說出家在家二種勝劣。汝今所問，出家菩薩不如在家。是義不然。所以者何？出家菩薩勝於在家，無量無邊不可為比。何以故？出家

<sup>70</sup> 大正藏：拊心

菩薩以正慧力，微細觀察在家所有種種過失，所謂世間一切舍宅，積聚其中不知滿足，猶如大海容受一切大小河水未曾滿足。善男子，香山之南雪山之北有阿耨池，四大龍王各居一角，東南龍王白象頭，西南龍王水<sup>71</sup>牛頭，西北龍王師子頭，東北龍王大馬頭，各從四角涌出大河：一、旃伽河，其水所至白象隨出；二、信渡河，其水所至水牛隨出；三、縛<sup>72</sup>芻河，其水所至師子隨出；四、私陀河，其水所至大馬隨出。如是大河，一一河<sup>73</sup>各有五百中河，中河各有無量小河，是大小一切眾水皆入大海，然此大海未曾滿足。世間眾生所有一切居處舍宅，亦復如是，聚諸珍寶從四方來，悉入宅中未曾滿足，多求積聚造種種罪，無常忽至棄捨故宅，是時宅主隨業受報，經無量劫終無所歸。善男子，所為宅者即五蘊身，其宅主者是汝本識。誰有智者樂有為宅？唯有菩提安樂寶宮，離老病死憂悲苦惱。若有利根淨信深厚善男子等，欲度父母、妻子、眷屬令入無為甘露宅者，須歸三寶出家學道。」

爾時，如來重說偈言：

<sup>71</sup> 大正藏：大

<sup>72</sup> 大正藏：薄

<sup>73</sup> 大正藏：一

出家菩薩勝在家 算分喻分莫能比  
在家逼迫如牢獄 欲求解脫甚為難  
出家閑曠若虛空 自在無為離繫著  
諦觀在家多過失 造諸罪業無有邊  
營生會<sup>74</sup>求恒不足 猶如大海難可滿  
阿耨達池龍王等 四角涌出四大海<sup>75</sup>  
大中小河所有水 晝夜流注無暫歇  
然彼大海未嘗滿 所貪舍宅亦如是  
在家多起諸惡業 未嘗洗懺令滅除  
空知愛念危脆身 不覺命隨朝露盡  
琰<sup>76</sup>魔使者相催逼 妻子屋宅無所隨  
幽冥黑闇長夜中 獨往死門隨業受  
諸佛出現起悲愍 欲令眾生厭世間  
汝今已獲難得身 當勤精進勿放逸  
在家屋宅深可厭 空寂寶舍難思議  
永離病苦及憂惱 諸有智者善觀察  
當來淨信善男女 欲度父母及眷屬  
令入無為甘露城 願求出家修妙道  
漸漸修行成正覺 當轉無上大法輪

「復次，善男子，出家菩薩觀世舍宅，猶如

<sup>74</sup> 大正藏：貪

<sup>75</sup> 大正藏：河

<sup>76</sup> 大正藏：焰

石火深生獸患。何以故？譬如微火能燒一切諸草木等，世間舍宅亦復如是，貪心求覓馳走四方。若有所得，受用不足，於一切時追求無厭；若無所得，心生熱惱日夜追求。是故世間一切舍宅，能生無量煩惱之火，為起貪心恒無知足。世間財寶猶如草木，貪欲之心如世舍宅，以是因緣，一切諸佛說於三界名為火宅。善男子，出家菩薩能如<sup>77</sup>是觀，厭離世間，名真出家。」

爾時，如來重說偈言：

出家菩薩觀世宅	猶如人間微少火
一切草木漸能燒	世宅當知亦如是
眾生所有眾財寶	更互追求常不足
求不得苦恒在心	老病死火無時滅
以是因緣諸世尊	說於三界為火宅
若欲超過三界苦	應修梵行作沙門
三昧神通得現前	自利利他悉圓滿

「復次，善男子，愛樂出家當觀舍宅，如彼深山石窟之中有大寶藏。譬如長者，唯有一子，其家大富，財寶無量，奴婢、僕從、象馬無數。其父於後忽遭重病，名醫良藥不能救療。長者自知將死不久，即命其子而告之言：『凡我所有一

<sup>77</sup> 大正藏：作

切財寶付囑於汝，勤加守護勿令漏失。』既付囑已即便命終。

「時，長者子不順其命，恣行放逸，既損家業，財物散失，僮僕逃逝，而無所依。時，彼老母心懷憂惱，遂得重病，即便終歿。其子貧窮，無所恃怙，遂投山谷，拾薪採菓，貨鬻自給。彼時遇雪，入石窟中，權自憩息。然此窟中，是昔國王藏七寶所，無能知者，經數百千年，迥絕人跡。時彼貧人，業因緣故，偶入窟中，見無量金，心大歡喜，得未曾有。因而分割若干分金，造立舍宅；若干分金，為娶妻財；如是奴婢，如是象馬，隨心所欲，皆如其意。作是計時，有諸羣賊，為趁走鹿，到於窟前，見此貧人，以金分配，遂捨其鹿，殺人取金。愚癡凡夫亦復如是，深著世樂，不樂出離，深山石窟如世舍宅，伏藏金寶猶如善根，琰魔使者即是羣賊，隨業受報墮三惡道，不聞父母三寶名字喪失善根，以是因緣，應當厭離，發於無上大菩提心，出家修道，希成妙覺。」

爾時，如來重說偈言：

愛樂在家諸菩薩 觀於舍宅如寶藏  
譬如長者有一子 其家大富饒財寶  
奴婢僕從及象馬 一切所須無不豐

於後長者身有病 舉世良醫皆拱手  
臨終告命諸親族 付囑家財與其子  
教誨令存孝養心 當勤享祀無斷絕  
是時其子違父命 廣縱愚癡多放逸  
老母懷憂疾病身 又因惡子尋喪逝  
眷屬乖離無所託 拾薪貨鬻以為常  
往彼山中遇風雪 入於石窟而暫息  
窟中往昔藏妙寶 已經久遠無人知  
樵人得遇真金藏 心懷踊躍生希有  
尋時分配真金寶 隨意所欲悉用之  
或以造舍或妻財 奴婢象馬并車乘  
校計未來無能捨 羣賊因鹿到其前  
是彼怨家會遇時 遂殺貧人取金去  
愚癡眾生亦如是 石窟猶如世間宅  
伏藏真金比善根 琰魔鬼使如劫賊  
以是因緣諸佛子 早趣出家修善品  
應觀身命類浮泡 勤修戒忍波羅蜜  
當詣七寶菩提樹 金剛座上證如如  
常住不滅難思議 轉正法輪化羣品

「復次，善男子，世間所有一切舍宅，猶如雜毒甘露<sup>78</sup>飲食。譬如長者，唯有一子，聰慧利

<sup>78</sup> 大正藏：味

根，達迦樓羅祕密觀門，能辯毒藥，善巧方便，父母恩憐，愛念無比。時，長者子為有事緣，往至鄽肆，未及歸家。爾時，父母與諸親族，歡喜宴樂，具設甘饈。時有怨家，密以毒藥致飲食中，無人覺知。是時，父母不知食中有雜毒藥，遂令長幼服雜毒食；其子後來，父母歡喜，所留飲食賜與其子。是長者<sup>79</sup>子，未須飲食，念迦樓羅祕密觀門，便知食中有雜毒藥。其子雖知父母服毒，而不為說悞服毒藥。所以者何？若覺服毒，更加悶亂，毒氣速發，必令人死。即設方便白父母言：『我且不食如是飲食，暫往市中，却來當食。何以故？我先買得無價寶珠，留在櫃中，而忘封閉。』於是父母聞說寶珠，生歡喜心，任子所往。子遂馳走，詣醫王家，求阿伽陀解毒妙藥。既得此藥，疾走還家，乳、酥、粳糖三味合煎，和阿伽陀，作是藥已，白父母言：『惟願父母服是甘露，此是雪山阿伽陀藥。所以者何？父母向來悞服毒藥，我所暫出，本為父母及諸人等，求得如是不死妙藥。』於是父母及眾人等，心大歡喜，得未曾有，即服妙藥，吐諸毒氣，便得不死，更延壽命。出家菩薩亦復如是，過去父母沈淪生死，現在父母

<sup>79</sup> 大正藏：時其

不能出離，未來生死難可斷盡，現在煩惱難可伏除，以是因緣，為度父母及諸眾生，激發同體大慈悲心，求大菩提出家入道。善男子，是名舍宅如雜毒藥入甘美食。」

爾時，如來重說偈言：

世間所有諸舍宅	說名雜毒甘美食
譬如長者有一子	聰明利智復多才
善迦樓羅祕密門	能辯毒藥巧方便
子有事緣往鄜肆	暫時貨易未還家
父母宴樂會諸親	百味珍羞皆具足
有一惡人持毒藥	密來致之於飲食
其子是時不在家	父母為兒留一分
舉家悞服雜毒藥	子念觀門知有毒
即便奔馳到醫所	求得伽陀不死藥
三味和煎藥已成	遂白諸親速令服
如是所服如甘露	差諸雜毒皆安樂
一切信心善男子	出家修道亦如是
為濟父母及眾生	所服煩惱諸毒藥
狂心顛倒造諸罪	永沈生死憂悲海
割愛辭親入佛道	得近調御大醫王
所修無漏阿伽陀	還生父母三界宅
令服法藥斷三障	當證無上菩提果

盡未來際常不滅 能度眾生作歸依

畢竟處於大涅槃 及佛菩提圓鏡智

「復次，善男子，出家菩薩常觀世間一切舍宅，猶如大風不能暫住。何以故？善男子，在家之心恒起妄想，執著外境不能了真，無明昏醉，顛倒觸境，亦常不住，惡覺易起，善心難生。由妄想緣，起諸煩惱，因眾煩惱造善惡業，依善惡業感五趣果，如是如是生死不斷。唯有正見不顛倒心，作諸善業，因三善根及以信等，增長無漏法爾種子，能起無漏三昧神通。如是如是證聖相續，若伏妄想修習正觀，一切煩惱永盡無餘。」

爾時，智光長者白佛言：「世尊！修習正觀有無量門，修何等觀能伏妄想？」

爾時，世尊告長者言：「善男子，應當修習無相正觀。無相能伏妄想，唯觀實性不見實<sup>80</sup>相。一切諸法體本空寂，無見無知是名正觀。若有佛子安住正念，如是觀察，長時修習無為，妄想猛風，寂然不動，聖智現觀，證理圓成。善男子，是名賢聖，是名菩薩，是名如來阿耨多羅三藐三菩提。以是因緣，一切菩薩為伏妄想永不起故，為報四恩成就四德，出家修學息妄想心，經無量

<sup>80</sup> 大正藏：十

劫成就佛道。」

爾時，如來重說偈言：

出家菩薩觀在家	猶如暴風不暫住
亦如妄執水中月	分別計度以為實
水中本來月影無	淨水為緣見本月
諸法緣生皆是假	凡愚妄計以為我
即此從緣法非真	妄想分別計為有
若能斷除於二執	當證無上大菩提
凡情妄想如黑風	吹生死林念念起
四顛倒鬼常隨逐	令造五種無間因
三不善根現為纏	生死輪迴鎮相續
若人聞經深信解	正見能除顛倒心
菩提種子念念生	大智神通三昧起
若能修習深妙觀	惑業苦果無由起
唯觀實相真性如	能所俱亡離諸見
男女性相本來空	妄執隨緣生二相
如來永斷妄想因	真性本無男女相
菩提妙果證皆同	妄計凡夫生異相
三十二相本非相	了相非相為實相
若人出家修梵行	攝心寂靜處空閑
是為菩薩真淨心	不久當證菩提果

「復次，善男子，出家菩薩日夜恒觀世間舍

宅，一切皆是煩惱生處。何以故？如有一人造立舍宅<sup>81</sup>，以諸寶物而自莊嚴。造此宅已而作是念：『今此舍宅，是我所有，不屬他人，唯我舍宅最為吉祥，他人舍宅所不能及。』如是執著，能生煩惱，由煩惱故，我、我所執而為根本，八萬四千諸塵勞門更相競起，充滿宅中。所以者何？在家凡夫，深著五欲，妻子、眷屬、奴婢、僕使悉皆具足，以是因緣，生老病死，憂悲苦惱，怨憎合會，恩愛別離，貧窮諸衰，求不得苦，如是眾苦，如影隨形，如響應聲，世世相續，恒不斷絕。如是眾苦，非無所因，大小煩惱而為根本；一切財寶追求而得，若無先因，不可追求，假使追求，亦無所獲。善男子，以是義故，一切煩惱追求為本，若滅追求，無量煩惱悉皆斷盡。然今是身，眾苦所依，諸有智者，當生厭離，如過<sup>82</sup>去世迦葉如來，為諸禽獸而說偈言：

是身為苦本	餘苦為枝葉
若能斷苦本	眾苦悉皆除
汝等先世業	造罪心不悔
感得不可愛	雜類受苦身

<sup>81</sup> 大正藏：八舍宅

<sup>82</sup> 大正藏：過；永樂北藏：是；龍藏：是

若起殷重心 一念求懺悔  
如火焚山澤 眾罪皆銷滅  
是身苦不淨 無我及無常  
汝等咸應當 深生厭離心

「爾時，無量諸禽獸等，聞此偈已，於一念心至誠懺悔，便捨惡道生第四天，奉覲一生補處菩薩，聞不退法，究竟涅槃。善男子，以是因緣，今此苦身猶如舍宅，一切煩惱即為宅主。是故淨信善男子等，發菩提心出家入道，必得解脫一切眾苦，皆當成就阿耨多羅三藐三菩提。」

爾時，如來重說偈言：

出家菩薩恒觀察 舍宅所生諸煩惱  
如有一人造舍宅 種種珍寶以嚴飾  
自念壯麗無能比 不屬他人唯我有  
工巧所修最殊妙 世間舍宅無能及  
如是分別生執著 以我我所為根本  
八萬四千諸煩惱 充滿舍宅以為災  
世間一切諸男女 六親眷屬皆圓滿  
以是因緣生眾苦 所謂生老及病死  
憂悲苦惱常隨逐 如影隨形不暫離  
諸苦所因貪欲生 若斷追求盡諸苦  
是身能為諸苦本 勤修厭離趣菩提

三界身心如舍宅 煩惱宅主居其中

汝等應發菩提心 捨離凡夫出三界

「復次，善男子，出家菩薩常觀在家，猶如大國有一長者，其家豪富，財寶無量，於多劫中，父子因緣，相襲不斷，修諸善行，名稱遠聞。是大長者，所有財寶皆分為四：一分財寶，常求息利以贍家業；一分財寶，以充隨日供給所須；一分財寶，惠施孤獨以修當福；一分財寶，拯濟宗親往來賓旅。如是四分曾無斷絕，父子相承為世家業。後有一子，愚癡弊惡，深著五欲，恣行放逸，違父母教，不依四業，起諸舍宅七層樓觀，倍於常制眾寶嚴飾，瑠璃為地，寶窗交映，龍首魚形無不具足，微妙音樂晝夜不絕，受五欲樂如忉利天，鬼神憎嫌，人天遠離。於是隣家忽然火起，猛焰熾盛隨風蔓延，焚燒庫藏及諸樓臺。時，長者子見是猛火起大瞋心，速命妻子、奴婢、眷屬，入於重舍，閉樓閣門，以愚癡故，一時俱死。在家凡夫亦復如是，世間愚人如長者子，諸佛如來猶如長者，不順佛教造作惡業，墮三惡道受大苦惱。以是因緣，出家菩薩當觀在家，如長者子，不順父母，為火所燒，妻子俱死。善男子等！應生厭離人天世樂，修清淨行當證菩提。」

爾時，如來重說偈言：

出家菩薩觀在家	猶如長者生愚子
其家富有諸財寶	久遠相承無闕乏
先世家業傳子孫	一切資產為四分
常修勝行無過惡	名稱遍滿諸國土
金銀珍寶數無邊	出入息利遍他國
慈悲喜捨心無倦	惠施孤貧常不絕
長者最後生一子	愚癡不孝無智慧
年齒已邁筋力衰	家財內外皆付子
子違父命行放逸	四業不紹墮於家
造立七層珍寶樓	用紺瑠璃作窓牖
歌吹管絃曾不歇	常以不善師於心
受五欲樂如天宮	一切龍神皆遠離
隣家欻然災火起	猛焰隨風難可禁
庫藏珍財及妻子	層樓舍宅悉焚燒
積惡招殃遂滅身	妻子眷屬同殞歿
三世諸佛如長者	一切凡夫是愚子
不修正道起邪心	命終墮在諸惡趣
長劫獨受焚燒苦	如是展轉無盡期
在家佛子汝當知	不貪世樂勤修證
厭世出家修梵行	山林寂靜離諸緣
為報四恩修勝德	當於三界為法王

盡未來際度眾生 作不請友常說法

永截愛流超彼岸 住於清淨涅槃城

「復次，善男子，出家菩薩觀於世間一切舍宅，猶如大夢。譬如長者有一童女，年始十五，端正殊妙。爾時，父母處三層樓，將其愛女受諸歡樂，於夜分中，母女同宿，在一寶床而共安寢。於是童女夢見父母娉與夫家，經歷多年，遂生一子，端正殊妙，有聰慧相，日漸恩養，能自行步，處在高樓，因危墮落，未至於地，見有餓虎接而食之。是時，童女倍復驚怖，舉聲號哭，遂便夢覺。爾時，父母問其女言：『以何因緣，忽然驚怖？』時，女羞恥不肯說之，其母慙慙竊問其故。時，女為母密說如上所夢之事。善男子，世間生死有為舍宅，長處輪迴未得真覺，爾所分位恒處夢中，生老病死三界舍宅，如彼童女處於夢中，虛妄分別亦復如是。琰魔鬼使忽然而至，如彼餓虎於虛空中接彼嬰孩而噉食之。一切眾生念念無常，老病死苦，亦復如是。誰有智者愛樂此身？以是因緣，觀於生死長夜夢中，發菩提心厭離世間，當得如來常住妙果。」

爾時，如來重說偈言：

佛子至求無上道 當觀舍宅如夢中

譬如富貴大長者 有一童女妙端嚴  
隨其父母上高樓 觀視遊從甚歡樂  
女向樓中作是夢 分明夢見適他人  
後於夫家誕一子 其母愛念心憐愍  
子上樓臺耽喜樂 因危墜墮於虎口  
遂乃失聲從夢覺 方知夢想本非真  
無明闇障如長夜 未成正覺如夢中  
生死世間常不實 妄想分別亦如是  
唯有四智大圓明 破闇稱為真妙覺  
無常念念如餓虎 有為虛假難久停  
宿鳥平坦各分飛 命盡別離亦如是  
往來任<sup>83</sup>業受諸報 父母恩情不相識  
哀哉凡夫生死身 輪轉三塗長受苦  
若知善惡隨業感 應當懺悔令消滅  
一切人天妙樂果 慚愧正見為所因  
應發堅固菩提心 被精進甲勤修學

「復次，善男子，出家菩薩觀於舍宅，如牝馬口海出於猛焰吞納四瀆，百川眾流無不燒盡。譬如往昔羅陀國中，有一菩薩名妙得彼岸，然是菩薩有慈悲心，常懷饒益。有諸商人入海採寶，將是菩薩同載船舶，皆達寶洲度於嶮難，而無所

<sup>83</sup> 大正藏：住

礙到於彼岸。後時菩薩，年漸衰老，已經百歲，起坐扶策，力不能前。有一商主詣菩薩所，禮拜供養，白菩薩言：『我欲入海，求諸珍寶，永離貧窮，得大富貴。今請菩薩與我同往。』爾時，菩薩告商主言：『我今衰老，筋力微弱，不能入海。』商主復言：『惟願大士不捨慈悲，哀受我請，於我舶中，但自安坐，是我所願。』爾時，菩薩受商人請，乘大舶船入於大海，向東南隅詣其寶所。時遇北風，漂墮南海，猛風迅疾，晝夜不停，經於七日。見大海水變為金色，猶如鎔金。爾時，眾商白菩薩言：『以何因緣，水變金色有如是相？』菩薩告言：『汝等當知，我今已入黃金大海，無量無邊紫磨真金充滿大海，金寶交映有如是相。汝等既能<sup>84</sup>超過正路墮此海中，各自勤求設諸方便，還歸北方。』復經數日，見大海水變為白色，猶如珂雪，菩薩告言：『汝等當知，我今已入真珠大海，白玉真珠充滿海中，珠映水色有如是相。汝當盡力設諸方，便還歸北方。』復經數日，大海之水變為青色，如青瑠璃，菩薩告言：『我及汝等已入青玻瓈海，無量無邊青玻瓈寶，充滿大海，玻瓈之色交映如是。』復經數日，大海之水

<sup>84</sup> 大正藏：相

變為紅色，猶如血現，菩薩告言：『我及汝等已入紅玻瓈海，無量無邊紅玻瓈寶充滿大海，寶<sup>85</sup>色紅赤交映如是。』復經數日，水變黑色，猶如墨汁，遙聞猛火爆裂之聲，猶如大火燒乾竹林，熾然燄焯<sup>86</sup>甚可怖畏，如是相貌曾未見聞。又見大火起於南方，猶如攢峯高逾百丈，焰勢飛空或合或散，光流掣電，如是之相未曾見聞。『我等身命實難可保！』於是菩薩告眾人言：『汝等今者，甚可怖畏。何以故？我等已入牝馬口海，皆被燒盡。所以者何？由諸眾生業增上力，自然天火能燒海水。若是天火不燒海水，一日夜中，一切陸地變成大海，所有眾生悉皆漂沒。然今我等遇大黑風，漂流如是牝馬口海，我今眾人餘命無幾。』爾時，船舶<sup>87</sup>有千餘人，同時發聲悲號啼哭，或自拔髮，或自投身，作如是言：『我等今者，為求珍寶，入於大海遇此險難，哀哉苦哉！以何方便得免是難？』時，千人等至誠歸命，或稱悲母，或稱慈父，或稱梵天，或稱摩醯首羅天王，或稱大力那羅延天，或有歸命得岸菩薩，敬禮大士而作是言：『惟願菩薩濟我等輩。』爾時，菩薩為是

<sup>85</sup> 大正藏：寶

<sup>86</sup> 大正藏：燄；永樂北藏：烽；龍藏：烽

<sup>87</sup> 大正藏：船舶

眾人離諸恐怖，而說偈言：

世間最上大丈夫 雖入死門不生畏  
汝若憂悲失智慧 應當一心設方便  
若得善巧方便門 離諸八難超彼岸  
是故安心勿憂懼 應當懇念大慈尊

「於是菩薩說此偈已，燒眾名香，禮拜供養十方諸佛，發是願言：『南無十方諸佛，南無十方諸佛，諸大菩薩摩訶薩眾，四向四果一切賢聖，有天眼者、有天耳者、知他心者、眾自在者，我為眾生運大悲心，棄捨身命濟諸苦難。然今我身有一善根，受持如來不妄語戒，無量生中未曾缺犯。若我一生有妄語者，今此惡風轉加增盛；如是戒德非虛妄者，願以此善迴施一切，我與眾生當成佛道。若實不虛，願此惡風應時休息，如意便風隨念而至，然諸眾生即是我身，眾生與我等無差別。』是大菩薩發起如是同體大悲無礙願已，經一念頃，惡風尋止，便得順風解脫眾難，得至寶所獲諸珍寶。爾時，菩薩告商人言：『如是珍寶難逢難遇，汝等先世廣行檀施，得值如是眾妙珍寶，昔修施時心有悋惜，以是因緣遇是惡風。汝諸商人所得珍寶，須知限量無使多取，以縱貪心後招大難。汝等當知，眾寶之中命寶為最，若

存其命是無價寶。』時，商人等蒙菩薩教，生知足心，不敢多取。爾時，眾人得免災難，獲大珍寶，遠離貧窮，到於彼岸。

「諸善男子，出家菩薩亦復如是，親近諸佛、善友、知識，如彼商人得遇菩薩，永離生死，到於彼岸，猶如商主獲大富貴。世間所有有為舍宅，如牝馬口海能燒眾流。出家菩薩亦復如是，審諦觀察在家過失。汝善男子不染世間諸五欲樂，猷離三界生死苦難，得入清涼安樂大城。」

爾時，如來重說偈言：

出家菩薩觀舍宅 如牝馬海燒眾流  
譬如往昔羅陀國 有一菩薩名得岸  
具大富<sup>88</sup>智巧方便 無緣慈悲攝有情  
得是菩薩乘舶船 商人獲寶超彼岸  
然是大士年衰老 不樂利佗好禪寂  
有一商主請菩薩 欲入大海求珍寶  
唯願大士受我請 令我富饒無闕乏  
於是菩薩運大悲 即便受請乘舶船  
時張大帆遇順風 直往東南詣寶所  
忽遇暴風吹舶船 漂墮南海迷所往  
經過七日大海水 悉皆變作黃金色

<sup>88</sup> 大正藏：福

紫磨黃金滿海中 寶映光現真金色  
復經數日大海水 變為白色如珂雪  
真珠珍寶滿海中 所以海水成白色  
又經數日大海水 變作紺青如瑠璃  
青玻瓈珠滿大海 所以水作紺青色  
又經數日大海水 悉皆變作紅赤色  
紅玻瓈珠滿海中 故變水色同於彼  
復經數日大海水 變為黑水<sup>89</sup>如墨汁  
如是天火所焚燒 海水盡皆如墨色  
此海名為牝馬口 吞納四海及眾流  
一切船舶若經過 有人到此多皆死  
天火熾盛如山積 爆裂之聲如雷震  
眾人遙見心驚怖 號叫搥霄白大師  
於是菩薩起慈悲 不惜身命垂救護  
暴風尋止順風起 渡於險難至寶所  
各獲珍琦達彼岸 永離貧窮受安樂  
出家菩薩亦如是 親近諸佛如商主  
永離火宅超<sup>90</sup>真覺 猶如商人歸本處  
世間所有諸宅舍 如彼牝馬大口海  
出家常馱於在家 不染世間離五欲

<sup>89</sup> 大正藏：色

<sup>90</sup> 大正藏：趣

樂住空閑心不動 善達甚深真妙理  
或處人間聚落中 如蜂採華無所損  
四威儀中恒利物 不貪世樂及名聞  
口中常出柔輒音 麤鄙惡言斷相續  
知恩報恩修善業 自佗俱得入真常

爾時，智光及諸長者一萬人俱，異口同音而白佛言：「善哉！世尊！希有！善逝！如是如是。世尊所說微妙第一，善巧方便饒益有情。如佛所說我今悉知，世間宅舍猶如牢獄，一切惡法從舍宅生，出家之人實有無量無邊勝利。由是我等深樂出家，現在當來恒受法樂。」

爾時，世尊告諸長者：「善哉！善哉！汝等發心樂欲出家，若善男子、善女人，發阿耨多羅三藐三菩提心，一日一夜出家修道，二百萬劫不墮惡趣，常生善處受勝妙樂，遇善知識永不退轉，得值諸佛受菩提記，坐金剛座成正覺道。然出家者持戒最難，能持戒者是真出家。」

時，諸長者白佛言：「世尊！我等持戒修諸梵行，願我速出生死苦海，願我速入常樂寶宮，願我廣度一切眾生，願我疾證於無生智。」

爾時，世尊告彌勒菩薩及文殊師利：「如是長者付囑汝等，勸令出家，受持淨戒。」

時，九千人於彌勒前，出家修道，受持佛戒。七千人俱於文殊前，出家修道，受佛禁戒。如是人等，既得出家，成就法忍，入於如來祕密境界，不復退轉。無量萬人，發菩提心，至不退轉位<sup>91</sup>，無數人天，遠塵離垢，得法眼淨。

大乘本生心地觀經卷第四

---

<sup>91</sup> 大正藏：退位

# 大乘本生心地觀經卷第五

唐罽賓國三藏般若等譯

## 無垢性品第四

爾時，智光及諸長者既出家已，齊整法服，五輪著地，禮如來足，合掌恭敬，白佛言：「世尊！我等從佛聞所未聞在家所有種種過失，發菩提心，厭離世間，剃除鬚髮，而作比丘。惟<sup>92</sup>願如來、應、正等覺，為我等類及諸眾生，演說出家殊勝功德，令得聞者，發清淨心，樂遠離行，不斷佛種。世尊大恩，無緣慈悲，憐愍眾生如羅睺羅！出家菩薩應云何住？云何修習無垢之業？云何調伏有漏之心？」

爾時，世尊讚歎智光諸比丘等：「善哉！善哉！是真佛子，能為未來一切眾生，問於如來如是大<sup>93</sup>事。如是如是，如汝所說，如來世尊憐愍眾生，平等無二猶如一子。汝今諦聽，善思念之，吾當為汝分別演說，出家菩薩如是住，如是修行無垢之業，如是調伏有漏之心。」

<sup>92</sup> 大正藏：唯

<sup>93</sup> 大正藏：大；永樂北藏：此；龍藏：此

「唯然，世尊！願樂欲聞。」

爾時，佛告智光比丘：「出家菩薩住如是心，常作是觀：我得人身，諸根具足，從何處沒，來生此間？我於三界中，當生何界？於四大洲，復生何處？六道之中，受生何道？以何因緣，得離父母、妻子、眷屬，出家修道，免八難身？莊嚴劫中，過去千佛皆已涅槃；星宿劫中，未來千佛未出於世；賢劫之中，現在千佛，幾佛如來出現於世，化緣將盡入般涅槃？幾佛世尊未出於世？是諸眾生，根緣未熟，未聞正法，復於何時，當來彌勒從兜率天下生人間，現成佛道？於我身中，有何善業？戒、定、慧學，當有何德？過去諸佛皆已不遇，當來世尊得見不耶<sup>94</sup>？我今現在諸凡夫地，三業煩惱何最為重？一生已來，造何罪業？於何佛所，曾種善根？我此身命能得幾時？是日已過，命隨減少，猶如牽羊，詣彼屠所，漸漸近死，無所逃避，身壞命終生於何處？三惡道苦如何脫免？然我此身，愛樂長養，念念衰老，無時暫停，誰有智者愛樂此身？智光當知，出家菩薩常於晝夜如是觀察，勿貪世間受五欲樂，精勤修

<sup>94</sup> 大正藏：邪

習未嘗暫捨，如去頂石，如救頭然<sup>95</sup>，心常懺悔過去先罪，安住如是四無垢性，一心修行十二頭陀，調伏其心如旃陀羅，如是佛子是名出家。

「智光比丘，以何義故，說名真實修沙門行如旃陀羅？其旃陀羅每遊行時，手執錫杖，不敢當路，若人逼近，振錫令聞。於大眾中，心行謙下，不敢輕慢；被呵責時，心無怨恨，未嘗加報；罵辱鞭撻，默然受之。何以故？自知下性，不階眾流，以是因緣，無<sup>96</sup>瞋無報。智光當知，出家菩薩亦復如是，剃除鬚髮形同嬰兒，執持應器依他活命，身著袈裟如被甲冑，杖錫而行如持鉞稍，執智慧劍，破煩惱賊，修嬰兒行饒益一切。是故一切三毒利箭，不入真實沙門之身。出家菩薩以三觀門修忍辱行，名真出家。觀諸眾生是佛化身，觀於自身為實愚夫；觀諸有情作尊貴想，觀於自身為僮僕想；又觀眾生作父母想，觀自己身如男女想。出家菩薩常作是觀，或被打罵，終不加報，善巧方便，調伏其心。

「智光比丘，汝等諦聽！云何名為四無垢性？衣服、卧具、飲食、湯藥，如是四事隨，有

<sup>95</sup> 大正藏：燃

<sup>96</sup> 大正藏：無；永樂北藏：被；龍藏：被

所得，麤細稱心，遠離貪求，是無垢性。諸比丘等，以何因緣，如是四行名無垢性？智光當知，諸佛如來三十七品菩提分法，皆從此生，佛法僧寶常不斷絕，是故得名為無垢性。」

爾時，世尊而說偈言：

智光比丘汝諦聽 出家菩薩所應作  
無緣大慈攝眾生 猶如一子皆平等  
發菩提心求正覺 應作三種成佛法  
心常住四無垢性 當修十二頭陀行  
下心猶如旃陀羅 四威儀中作是念  
十方無量諸菩薩 剎那剎那趣聖道  
彼既修證我亦爾 如何流轉三界中  
恒居生死無量苦 我今是身住何界  
六道輪迴處何道 胎卵濕化受何生  
身口意業於何修 所造罪中何者重  
三性之心何心多 如是微細觀察已  
大慈大悲恒相續 大喜大捨為先心  
為有緣者說妙法 晝夜修心不暫停  
如去頂石救頭燃 念三觀門常不離  
觀諸有情是佛身 唯我獨處於凡類  
一切眾生等尊貴 我為僮僕居卑賤  
世間眾生同父母 我如男女行孝養

被佗打罵不瞋嫌 勤修忍辱無怨嫉  
四事供養心不著 是則名為無垢性  
三十七品菩提分 及以如來果報身  
如是殊勝無漏法 四無垢性為根本  
不放逸行常修習 是名出家真佛子  
菩提智種念念增 無漏聖道皆成就  
速得超於無量劫 端坐華王法界中  
福智二嚴皆圓滿 無邊劫海利羣生  
由無垢性皆成熟<sup>97</sup> 證獲如來常住果

「復次，智光比丘，出家菩薩於所著衣不應貪著，若細若麤隨其所得，恒<sup>98</sup>於施者為生福田，勿嫌麤惡；不得為衣廣說法要，起諸方便與貪相應。世間凡夫為衣服故，非法貪求，造不善業，墮於惡道，經無量劫，不遇諸佛，不聞正法，受苦畢已，復生人間，貧窮困苦，求不得苦晝夜逼迫，衣不蔽形，食不支命。如是眾苦，皆由先世為衣服故，多殺生命，造種種罪。出家菩薩即不如是，隨其所得不嫌麤惡，但懷慚愧以充法衣，得十勝利：一者，能覆其身遠離羞恥，具足慚愧修行善法。二者，遠離寒熱及以蚊虻、惡獸、毒

<sup>97</sup> 大正藏：就

<sup>98</sup> 大正藏：但

蟲，安隱修道。三者，示<sup>99</sup>現沙門出家相貌，見者歡喜，遠離邪心。四者，袈裟即是人天寶幢之相，尊重敬禮，得生梵天。五者，著袈裟時，生寶塔<sup>100</sup>想，能滅眾罪，生諸福德。六者，本制袈裟染<sup>101</sup>令壞色，離五欲想，不生貪愛。七者，袈裟是佛淨衣，永斷煩惱，作良田故。八者，身著袈裟，罪業消除，十善業道念念增長。九者，袈裟猶如良田，能善增長菩薩道故。十者，袈裟猶如甲冑，煩惱毒箭不能害故。智光當知，以是因緣，三世諸佛、緣覺、聲聞，清淨出家，身著袈裟，三聖同坐解脫寶床，執智慧劍，破煩惱魔，共入一味諸涅槃界。」

爾時，世尊而說偈言：

智光比丘應善聽 大福田衣十勝利  
世間衣服增欲染 如來法服不如是  
法服能遮世羞恥 慚愧圓滿生福田  
遠離寒暑及毒蟲 道心堅固得究竟  
示現出家離貪欲 斷除五見正修持  
瞻禮袈裟寶幢相<sup>102</sup> 恭敬生於梵王福  
佛子披衣生塔想 生福滅罪感人天

<sup>99</sup> 大正藏：示；永樂北藏：亦；龍藏：亦

<sup>100</sup> 大正藏：塔；永樂北藏：幢；龍藏：幢

<sup>101</sup> 大正藏：染

<sup>102</sup> 大正藏：想

肅容致敬真沙門 所為不染諸塵俗  
諸佛稱讚為良田 利樂羣生此為最  
袈裟神力不思議 能令修植菩提行  
道芽增長如春苗 菩提妙果類秋實  
堅固金剛真甲冑 煩惱毒箭不能害  
我今略讚十勝利 歷劫廣說無有邊  
若有龍身披一縷 得脫金翅鳥王食  
若人渡海持此衣 不怖龍魚諸鬼難  
雷電霹靂天之怒 披袈裟者無恐畏  
白衣若能親捧持 一切惡鬼無能近  
若能發心求出家 猷離世間修佛道  
十方魔宮皆振動 是人速證法王身

「復次，智光菩薩，出家佛子常行乞食，應捨身命不斷是心。所以者何？一切有情皆依食住，是以乞食利益無窮。汝等當知，出家菩薩常行乞食有十勝利。云何為十？一者，常行乞食，以自活命，出入自由不屬佗故。二者，行乞食時，先說妙法，令起善心，然後自食。三者，為不施人發大悲心，為說正法，令起捨心，而生勝福。四者，依佛教行，增長戒品，福德圓滿，智慧無窮。五者，常行乞食，於七九慢自然消滅，眾所恭敬，是良福田。六者，於乞食時，當得如來無

見頂相，應受世間廣大供養。七者，汝等佛子隨學此法，住持三寶，饒益有情。八者，於乞食時，不得為求飲食<sup>103</sup>，起希望心，讚歎一切男子女人。九者，行乞食時，須依次第，不應分別貧富之家。十者，常行乞食，諸佛歡喜，得一切智最為良緣。智光菩薩，我為汝等略說如是十種利益，若廣分別，無量無邊。汝等比丘及未來世求佛道者，應如是學。」

爾時，世尊而說偈言：

智光菩薩汝諦聽 出家大士應離貪  
當發出世修行心 乞食頭陀為根本  
凡夫住於有漏食 聖者悉依無漏食  
有漏無漏諸聖凡 一切無不依食住  
我為汝等諸佛子 開演出世二利行  
三世如來所稱讚 乞食功德有十利  
偏稱此行最為勝 出入自在無繫縛  
先令施主發初心 令趣菩提然後食  
為除慳貪說妙法 能起<sup>104</sup>大捨無量心  
依大師教行乞食 增長無量諸梵行  
七九種慢自除滅 為諸人天所尊敬

<sup>103</sup> 大正藏：食故

<sup>104</sup> 大正藏：起；永樂北藏：趣；龍藏：趣

如來頂相不可見 轉妙法輪化十方  
盡未來際傳此法 令不斷絕三寶種  
若為飲食起妄心 不應讚歎諸男女  
起大慈悲平等意 不生分別貧與富  
清淨乞食佛所讚 一切種智從此生  
三世如來出于世 為諸眾生說四食  
段觸思識為其四 皆是有漏世間食  
唯有法喜禪悅食 乃是聖賢所食者  
汝等厭離世間味 當求出世無漏食

「復次，智光菩薩，出家佛子於諸醫藥不應貪著，若有病時，佗煎藥已所棄捨藥，訶梨毗梨及阿摩勒，取是等藥即應服之，乃至一生服所棄藥，於諸藥等常生知足，如是名為真實沙門。出家佛子恒服棄藥，是人獲得十種勝利。云何為十？一者，為求藥草，不近佗人，永息貪求，安住正念。二者，不淨觀門易得成就，出世之心能得堅固。三者，於諸珍味，恒不貪著，速證正智，餐<sup>105</sup>禪悅味<sup>106</sup>。四者，於諸世間一切財物，常能知足，早得解脫。五者，不近世間一切凡夫，親近出世清淨善友。六者，由不嫌惡諸棄藥等，於

<sup>105</sup> 大正藏：飧

<sup>106</sup> 大正藏：食

羸飲食亦得解脫。七者，於所重藥永不希望，一切世間無不尊故。八者，速能調伏諸煩惱病，證得如來常住法身。九者，永斷三界一切煩惱，能療眾生身心重病。十者，能順佛教修菩薩行，福智圓滿得大菩提。智光當知，我為汝等略說棄藥十種勝利，如是妙行，去、來、現在出家菩薩皆共修學，汝等應當為諸眾生演說流布，無令斷絕，即為如來廣設供養，世間所有財敬供養所不能及，於菩薩行不復退轉，速證無上正等菩提。」

爾時，世尊重說偈言：

智光比丘汝善聽	出家所服無垢藥
菩薩妙行此為先	眾生有病如己病
以大悲恩救眾苦	復用慈心施安樂
最上妙藥與佗人	前人所棄而自服
菩薩不擇貴賤藥	但療眾病令安隱
取佗所棄之餘藥	飲服以充治所疾
取佗棄藥有十利	三世如來共稱讚
雖求醫藥不近佗	永息追求住正念
不淨觀門易成熟	而能遠作菩提因
不著甘味離諸貪	當求法喜禪悅食
於世財寶能知足	獲得無漏七聖財
捨彼凡愚不共住	親近聖賢為良友

由是不嫌眾棄藥 亦於飲食斷貪求  
珍膳妙藥不希望 世間所以咸尊重  
能療身心煩惱病 悟得真如法性身  
永斷三界諸習氣 證得無上真解脫  
能順佛教趣菩提 福智圓成報身果  
汝等佛子皆修學 當坐金剛真道場

「復次，智光，出家菩薩遠離喧鬧，住阿蘭若修攝其心，無量千歲以求佛道，三世如來離諸喧鬧，寂然閑居，萬行增修，證菩提果，緣覺、聲聞一切賢聖，證得聖果亦復如是。其阿蘭若有十種德，能令證得三菩提果。云何名為十種勝德？一者，為得自在住阿蘭若，四威儀中不屬佗故。二者，離我、我所名阿蘭若，於樹下時，無執著故。三者，於卧具等無所愛著，由斯當卧四無畏床。四者，阿蘭若處三毒微薄，離貪瞋癡所緣境故。五者，樂阿蘭若修遠離行，不求人天五欲樂故。六者，能捨喧鬧，住閑寂處，修習佛道，不惜軀命。七者，愛樂寂靜，離世言詞，棄捨凡愚，無散亂故<sup>107</sup>。八者，世出世間，一切事業易得成就，無障礙故<sup>108</sup>。九者，阿蘭若處是三昧室<sup>109</sup>，

<sup>107</sup> 大正藏及麗藏：七者，愛樂寂靜，離世言詞，棄捨凡愚，無散亂故；永樂北藏及龍藏：七者，愛樂寂靜，世間一切事業易得成就，無障礙故

<sup>108</sup> 大正藏及麗藏：八者，世出世間，一切事業易得成就，無障礙故；永樂北藏及龍藏：經本元少第八段（缺八者）

能得百千大三昧故。十者，清淨如空以為舍宅，心無障礙得大智故。智光當知，阿蘭若處有如是等無量功德，以是因緣，出家佛子，誓捨身命，不離山林。若為聽法，供養病人、師僧、父母，出阿蘭若，入聚落中，宜速還歸於蘭若處。若有因緣未得歸者，應作是想：『今此聚落猶如山林，所得財物虛假如夢，若有所得，不應貪著。』如是佛子是摩訶薩。」

爾時，世尊而<sup>110</sup>說偈言：

智光汝等善諦聽 無煩惱人所住處<sup>111</sup>  
遠離喧鬧處寂靜 此是神仙所居處  
三世菩薩求菩提 於蘭若中成正覺  
緣覺聲聞諸聖眾 亦於此處證菩提  
住阿蘭若獲十利 能令證得三乘果  
自在遊行如師子 四威儀中無繫縛  
山林樹下聖所樂 無我我所名蘭若  
衣服卧具無繫著 坐四無畏師子座  
離諸煩惱名蘭若 一切貪愛無所著  
常居物外厭塵勞 不樂世間五欲樂  
遠離憤鬧寂靜者 棄身捨命<sup>112</sup>求佛道

<sup>109</sup> 大正藏：室；永樂北藏：空；龍藏：空

<sup>110</sup> 大正藏：重

<sup>111</sup> “智光汝等善諦聽，無煩惱人所住處”句，大正藏及麗藏有；永樂北藏及龍藏則無

<sup>112</sup> 大正藏：棄捨身命

能住寂靜無人聲 於諸散亂心不起  
世出世間諸善業 心無障礙皆成就  
由是蘭若為根本 能生百千諸三昧  
以大空寂為虛室<sup>113</sup> 行者身心無障礙  
具足如是十勝利 是故眾聖常居止  
智光汝等諸佛子 若欲速成一切智  
乃至夢中莫捨離 阿蘭若處菩提道  
我滅度後發心者 而能住於蘭若處  
不久當坐寶華王 證得法身常樂果

爾時，世尊說是法時，無量百千初發心者，於無上道，得不退轉。時，智光等諸菩薩眾，得陀羅尼，具大神通，百萬人天發菩提意，悟三解脫。爾時，如來告諸大眾：「若有淨信善男子、善女人，得聞如是四無垢性甚深法門，受持讀習，解說書寫，如是人等，所生之處，遇善知識，修菩薩行，永不退轉，不為一切諸業煩惱之所擾亂，而於現世獲大福智，住持三寶得自在力，紹繼佛種使不斷絕，命終必生知足天宮，奉觀彌勒，證不退位，龍華初會得聞正法，受<sup>114</sup>菩提記速成佛道。若欲願生十方佛土，隨其所願而得往生，見

<sup>113</sup> 大正藏：室；永樂北藏：空；龍藏：空

<sup>114</sup> 大正藏：授

佛聞法，究竟不退阿耨多羅三藐三菩提。」

## 阿蘭若品第五

爾時，會中有一菩薩摩訶薩，名常精進，承佛威神，即從座起，偏袒右肩，右膝著地，合掌恭敬，而白佛言：「世尊！如佛所說，阿蘭若處是菩提道場，若有發心求菩提者，不應捨離阿蘭若處。是蘭若中，有多眾生，虎豹豺狼<sup>115</sup>，毒蟲惡獸，乃至飛鳥及與獵師，不識如來，不聞正法，又不敬僧。此諸有情，無復善根，遠離解脫。何故如來令修學人住阿蘭若，速得成佛？惟願世尊為諸眾生分別解說，決疑令喜，發菩提心使不退轉。」

爾時，佛告常精進菩薩：「善哉！善哉！善男子，汝以大慈問於如來清淨解脫，饒益未來諸修行者，功德無量。諦聽諦聽，善思念之，我今為汝分別演說阿蘭若處種種功德。」

「唯然，世尊！願樂欲聞。」

爾時，佛告常精進菩薩：「如汝所說，阿蘭若處得成聖者，山林之中多諸眾生，以何因緣不得成佛？是義不然。所以者何？彼諸眾生，不識

<sup>115</sup> 大正藏：狼；永樂北藏：狼；龍藏：狼

三寶，不知馱足，不識善惡，於山林中，雖有世間種種珍寶，而不能知伏藏之處，菩薩摩訶薩即不如是。善男子，菩薩能知佛法、僧、寶是出世寶，七珍伏藏是世間寶，悉能辯<sup>116</sup>其種種色相，知其所在而不貪求，亦不樂見，何況取乎<sup>117</sup>？菩薩出家，發堅固心，不惜身命，捨離父母、六親眷屬，樂住山林，常作是念：『假使三千大千世界劫盡之時，七日並出，火災熾然，焚燒萬物，日月星辰、妙高山王及七金山、鐵圍山等，時至皆散。三界之頂非非想天，八萬劫盡，還生下地。轉輪聖王千子圍遶，七寶眷屬四洲咸伏，壽命報盡須臾不停。我今亦爾，假使壽年滿一百歲，七寶具足，受諸快樂，琰魔使至不免無常。』作是思惟：『我今不如代其父母及諸眾生修菩薩行，當得金剛不壞之身，還來三界救度父母。』作是願已，住阿蘭若，為諸眾生發弘誓願。上根菩薩發是願言：『願我未得成佛已來，常於露地長坐不卧。』中根菩薩發是願言：『願我未得成佛已來，於樹葉中常坐不卧。』下根菩薩發是願言：『願我未得成佛已來，於石室中常坐不卧。』如是三根

<sup>116</sup> 大正藏：辨

<sup>117</sup> 大正藏：手取

出家菩薩，坐三種座，各作是念：『過去菩薩坐於此座，而能證得陀羅尼門功德自在。過、現、未來諸菩薩等皆於此座，得陀羅尼修證自在。我亦如是今坐此處，必當成就於陀羅尼而得自在。若未成就得自在者，終不捨離阿蘭若處。』

「或有菩薩，未得圓滿四無量心，終不捨離阿蘭若處。或有菩薩，未得圓滿五通神力，終不捨離阿蘭若處。或有菩薩，未得圓滿六波羅蜜，終不捨離阿蘭若處。或有菩薩，未得圓滿善巧方便，終不捨離阿蘭若處。或有菩薩，未能調伏一切有情，終不捨離阿蘭若處。或有菩薩，未得圓滿四種攝法，終不捨離阿蘭若處。或有菩薩，未能修習六念之法，終不捨離阿蘭若處。或有菩薩，未能成就多聞智慧，終不捨離阿蘭若處。或有菩薩，未能成就堅固信力，終不捨離阿蘭若處。或有菩薩，未能斷除六十二見，終不捨離阿蘭若處。或有菩薩，未能修習八種正道，終不捨離阿蘭若處。或有菩薩，未能永斷二障習氣，終不捨離阿蘭若處。或有菩薩，未能圓滿隨病與藥微妙智慧，終不捨離阿蘭若處。或有菩薩，未能圓滿大菩提心，終不捨離阿蘭若處。或有菩薩，未能圓滿恒沙三昧，終不捨離阿蘭若處。或有菩薩，未能成

就無量神通，終不捨離阿蘭若處。或有菩薩，以定通力見十八空而心不驚，如是大事若未成就，終不捨離阿蘭若處。或有菩薩，未能圓滿一切智智，終不捨離阿蘭若處。或有菩薩，未得圓滿一切種智，終不捨離阿蘭若處。或有菩薩，未得修習三十七種菩提分法，終不捨離阿蘭若處。或有菩薩，未得圓滿十地萬行，終不捨離阿蘭若處。或有菩薩，於百劫中未能修行相好之業，終不捨離阿蘭若處。或有菩薩，未得圓滿如來四智，終不捨離阿蘭若處。或有菩薩，未能圓滿證大涅槃，終不捨離阿蘭若處。或有菩薩，坐金剛座未能證得阿耨多羅三藐三菩提，常坐不起，是名菩薩阿蘭若行。善男子，出家菩薩發菩提心入於山林，坐三種座鍊磨身心，經三大劫而修萬行，證得無上正等菩提。」

爾時，世尊重說偈言：

昔諸如來因地時 住阿蘭若離塵處  
伏斷煩惱所知障 超過三界證菩提  
過去菩薩修行願 以阿蘭若為舍宅  
阿僧祇劫修福智 十地究竟證三身  
未來菩薩求佛果 入於深山修妙行  
斷除二障生死因 當證三空真解脫

現在十方諸菩薩 修持萬行住空閑  
不惜身命求菩提 念念證得無生智  
若欲速證深三昧 因修妙定超<sup>118</sup>神通  
阿蘭若處心無諍 能變大地為七寶  
若欲遊戲十方國 往來自在運神通  
供養諸佛利羣生 住阿蘭若無畏處  
欲證有無如幻智 了達諸法本來空  
住阿蘭若菩提場 令眾亦入真解脫  
若欲速得如如智 證會諸法如如性  
盡大劫海利羣生 當住蘭若空寂處  
若人欲得難思智 妙高山王納芥子  
山王芥子不壞相 入於蘭若神通室  
若人欲得無礙智 以一妙音演說法  
隨類眾生各得解 當住蘭若修妙觀  
若欲無生及無滅 應現十方諸國土  
放光說法利羣生 莫離蘭若空寂室  
若以足指按大地 令十方界皆振動  
覩相發心除邪見 當住蘭若觀自心  
若欲諸佛出現時 最初獻於微妙供  
檀波羅蜜皆圓滿 住阿蘭若修妙行  
若人於佛涅槃時 最後供養成檀義

<sup>118</sup> 大正藏：起

永斷貧窮及八難 誓願住於蘭若中  
若欲福智皆圓滿 未來諸佛臨涅槃  
受佛付囑廣弘願<sup>119</sup> 住阿蘭若修六念  
若於諸佛涅槃後 結集遺法度眾生  
助於諸佛讚真乘 住阿蘭若空寂舍  
人天大師薄伽梵 難見難遇過優曇  
若欲奉觀修供養 當住蘭若弘悲願  
眾寶之尊法為最 成佛化利皆由此  
如人欲得常聽法 住阿蘭若修梵行  
始從今身至佛身 常願發心弘正教  
乃至未得大菩提 念念不捨阿蘭若  
若人欲報父母恩 代於父母發誓願  
入阿蘭若菩提場 晝夜常修於妙道  
若欲現世增福智 當來不墮八難中  
如是有情發善心 住阿蘭若修悲願  
三世菩薩求真覺 得道涅槃蘭若中  
是故名為大道場 三乘聖眾皆同處  
菩薩猷苦入山林 為度羣生求聖道  
自未成佛先度佗 六道四生皆悲愍  
上根菩薩居露地 中根菩薩居葉中  
下根菩薩居石室 未成佛道常不卧

<sup>119</sup> 大正藏：宣

三世菩薩住蘭若 得陀羅尼自在力  
今我誓同菩薩<sup>120</sup> 心未得總持恒止此  
得大菩提<sup>121</sup> 在蘭若 入大圓寂由住處  
菩薩起於金剛智 斷惑證真成妙覺  
廣化眾生遊聚落 為求寂滅樂山林  
萬行因滿果亦圓 盡未來時度羣品

爾時，世尊，演說如是出家菩薩阿蘭那行，無量菩薩證極喜地；恒河沙等無數菩薩，永離相用微細煩惱，證不動地；不可說不可說菩薩摩訶薩，斷一切障入妙覺地；無邊有情發無等等阿耨多羅三藐三菩提心；九萬七千眾生，遠塵離垢，得法眼淨。

大乘本生心地觀經卷第五

<sup>120</sup> 大正藏：薩；永樂北藏：提；龍藏：提

<sup>121</sup> 大正藏：提；永樂北藏：薩；龍藏：薩

# 大乘本生心地觀經卷第六

唐罽賓國三藏般若等譯

## 離世間品第六

爾時，會中有一菩薩摩訶薩名樂遠離行，承佛威力，從坐而起，於大眾中，為諸菩薩說阿蘭若行，普告一切諸菩薩言：「出家菩薩住阿蘭若，應作是念：『以何因緣遠離世間，修阿蘭若清淨妙行？』諸佛子等，一心諦聽，我承佛力，今為汝等分別演說阿蘭若行。」

諸菩薩言：「善哉！大士！為我等輩及未來世求菩提<sup>122</sup>者，惟<sup>123</sup>願說之，我等樂聞。」

是時，樂遠離行菩薩告諸大眾：「一切世間多諸恐怖，出家菩薩為厭世間種種恐怖，捨離父母及諸眷屬，住阿蘭若修遠離行。云何名為種種恐怖？或有菩薩而作是念：『我為恐怖，一切煩惱從我生故。』或有菩薩而說：『我所是為恐怖，一切煩惱我所生故。』或有菩薩而說：『七慢是為恐怖，種種慢不敬善人故。』或有菩薩，以彼三

<sup>122</sup> 大正藏：提；永樂北藏：薩；龍藏：薩

<sup>123</sup> 大正藏：唯

毒而為恐怖，造無量罪墮惡道故。或有菩薩，以彼五欲而為恐怖，耽著世樂墮八難故。譬如世間有七步蛇，當<sup>124</sup>害人時，毒力熾盛，出過七步，即便命終。一蛇毒力尚能損人，何況五蛇共為傷殺，毒力轉盛命難得全。世間五欲亦復如是，一一欲樂各能引起八萬四千微細塵勞，迷惑愚夫，令墮地獄、餓鬼、畜生及餘難處受大苦惱，何況具足貪著諸塵？如恒河沙無數諸佛，出興於世說法教化，隙光迅疾終不得見，常在惡道猶於自家，處無暇<sup>125</sup>中如戲園觀。過去有佛，欲令眾生厭捨五欲，而說偈言：

譬如飛蛾見火光 以愛火故而競入  
不知焰炷<sup>126</sup>燒然力 委命火中甘自焚  
世間凡夫亦如是 貪愛好色而追求  
不知色欲染著人 還被火燒來眾<sup>127</sup>苦  
譬如羣鹿居林藪 食<sup>128</sup>於豐草而自養  
獵師假作母鹿聲 尋聲<sup>129</sup>中箭皆致死  
世間凡夫亦如是 貪著種種可意聲  
不知聲能染著人 還受三塗諸苦報

<sup>124</sup> 大正藏：若

<sup>125</sup> 大正藏：暇

<sup>126</sup> 大正藏：炷；永樂北藏：性；龍藏：性

<sup>127</sup> 大正藏：來眾；永樂北藏：眾來；龍藏：眾來

<sup>128</sup> 大正藏：食；永樂北藏：貪；龍藏：貪

<sup>129</sup> 大正藏：尋聲；永樂北藏：羣鹿；龍藏：羣鹿

譬如蜜蜂能飛遠 遊於春林採眾花  
為愛醉象頰上香 象耳因之而掩死  
世間凡夫亦如是 愛著一切受用香  
不知香能染著心 生死輪迴長夜苦  
譬如龍魚處於水 游泳沈浮而自樂  
為貪芳餌遂吞鈎 愛味忘生皆致死  
世間凡夫亦如是 舌根耽味以資身  
殺佗自活心不平 感得三塗極重苦  
譬如白象居山澤 自在猶如師子王  
欲心醉亂處昏迷 追尋母象生貪染  
一切凡夫亦如是 趣彼妙觸同狂象  
恩愛纏縛<sup>130</sup>不休息 死入地獄苦難量  
世間男女互貪求 皆由樂著諸色欲  
人天由此故<sup>131</sup>纏縛 墮墜三塗黑闇中  
若能捨離貪欲心 住阿蘭若修梵行  
必得超於生死苦 速入無為常樂宮

「或有菩薩，以貪多財而為恐怖。自己財寶恒求積聚而不受用，何況能施貧乏眾生？於己財寶深生貪著，於佗財寶欲令損減，以是因緣，命終之後，墮大地獄，受無量苦，如是苦報，名為

<sup>130</sup> 大正藏：綿

<sup>131</sup> 大正藏：被

第一正感之果。從地獄出，受畜生身，身常勞苦，水草不足，經多時中，酬損他財，如是眾苦，名為第二正感之果。受是罪已，生餓鬼中，因<sup>132</sup>飢渴苦，無量千劫不聞漿水飲食之名，其咽如針，其腹如山，縱得飲食，隨變為火，如是苦身，名為第三正感之果。畢是罪已，來生人間，貧窮下賤，為他所使，於諸財寶，所求難得，於一切時，而不自在，如是餘報名相似果。一切菩薩分明知見如是因果，常生恐怖，欲求解脫，由是恐怖，遠離眷屬，住阿蘭若。或有菩薩，以渴愛心而為恐怖，於諸未得一切財寶，日夜追求生渴愛故。或有菩薩，我、我所見而為恐怖，為諸煩惱作依止故。或有菩薩，以諸法見而為恐怖，與所知障作依止故。或有菩薩，六十二見而為恐怖，入邪見林難出離故。或有菩薩疑為恐怖，於真正法生疑惑故。或有菩薩，以彼斷見而為恐怖，執無後世，撥無因果，生大邪見入地獄故。或有菩薩，以彼常見而為恐怖，執五趣身恒常決定，隨善惡業無變易故。或有菩薩，以彼嫉妬而為恐怖，不耐佗榮懷惡心故。或有菩薩，常以掉舉而為恐怖，心不寂靜生散亂故。或有菩薩，以不信心而為恐

<sup>132</sup> 大正藏：困

怖，如人無手，雖至寶山，終無所得，無信手者，雖遇三寶，無所得故。或有菩薩，以彼無慚而為恐怖，內無羞恥，常造諸惡，業障無明難見佛故。或有菩薩，以無愧心而為恐怖，外無羞恥，棄恩背德，生死輪迴，墮三塗故。或有菩薩，以忿恨等而為恐怖，能損自佗，互為怨結，於多劫中，障佛道故。或有菩薩，以彼忘失而為恐怖，於所聞法不能憶持，忘失文義增愚癡故。或有菩薩，乃至一切不善黑業而為恐怖。何以故？一切不善是生死因，輪轉三界不得出離，於是無量無邊恐怖，皆能障礙出世勝法。或有菩薩，以五種蓋而為恐怖，五種煩惱覆蓋菩薩菩提心故。或有菩薩，以憎惡心而為恐怖，於諸眾生無憐愍心，修菩提行多退轉故。或有菩薩，以破戒垢而為恐怖，污穢聖法難得果故<sup>133</sup>。或有菩薩，以彼憂惱而為恐怖，妄想熾然失善業故。或有菩薩，以惡作心而為恐怖，於所修善生追悔故。或有菩薩，而說狂醉是為恐怖，不識善惡無尊卑故。或有菩薩，以非時死而為恐怖，不住正念歸無常故。或有菩薩，以妄語業而為恐怖，生生世世所有言說，一切眾生不信受故。或有菩薩，以四顛倒而為恐怖，由

<sup>133</sup> 大正藏：故；永樂北藏：報；龍藏：報

四顛倒輪迴生死，起煩惱業不求佛故。或有菩薩，而說惡友是為恐怖，隨不善友造惡業故。或有菩薩，以五蘊魔而為恐怖，是五蘊身從煩惱生，生已即起無量煩惱，因諸煩惱造不善業，由諸惑業墮大深坑，以是因緣而生恐怖。或有菩薩，以煩惱魔而為恐怖，大小煩惱能續生死，退菩提心墮惡道故。或有菩薩，獸患死魔而為恐怖，發菩提心未得不退，身壞命終生退轉故。或有菩薩，以諸天魔而為恐怖，天<sup>134</sup>魔眷屬充滿欲界，障修道人退菩提故。或有菩薩，以無記心而為恐怖，於諸善法不能進修，空過長時退善業故。或有菩薩，以彼八難而為恐怖，墮八難者從冥入冥，生死長夜難遇明故。或有菩薩，觀彼地獄而為恐怖，一墮地獄經無量劫，受大苦惱，難解脫故。或有菩薩，墮<sup>135</sup>畜生道而為恐怖，傍生界中受愚癡報，經無量劫難出離故。或有菩薩觀<sup>136</sup>餓鬼道而為恐怖，於恒沙劫受飢渴苦，難可值遇佛法僧故。或有菩薩，想欲界生而為恐怖，煩惱雜起，造諸惡業，墮三塗故。或有菩薩，以彼色界而為恐怖，有覆煩惱能障定故。或有菩薩，以無色界而為恐

<sup>134</sup> 大正藏：天；永樂北藏：天；龍藏：大

<sup>135</sup> 大正藏：觀

<sup>136</sup> 大正藏：觀

怖，三界之中最為寂靜猶如涅槃，有情妄執而為究竟，劫盡命終墜<sup>137</sup>地獄故。或有菩薩，數數生死而為恐怖，生邪見家難出離故。或有菩薩，厭離生死而為恐怖，死此生彼常受苦惱，障菩薩行求涅槃故。或有菩薩，以世間語是為恐怖，心常散亂妨善業故。或有菩薩，以心意識而為恐怖，所緣行相不可知故。若在俗家，由斯恐怖晝夜相續，擾亂善心，不能證得無恐怖法。過去菩薩住阿蘭若，皆能證得無恐怖法，即是阿耨多羅三藐三菩提；未來菩薩住阿蘭若，悉皆當得無恐怖法阿耨多羅三藐三菩提；現在十方諸大菩薩住阿蘭若，斷一切障，得無恐怖阿耨多羅三藐三菩提。汝等當知，隨應修學三世菩薩，攝念身心住阿蘭若，調伏妄想永無恐怖，究竟阿耨多羅三藐三菩提。

「復次，出家菩薩住阿蘭若，當作何業？作何等念？日夜常作如是思惟：『世間所有一切恐怖皆從我生，一切恐怖著我生故，一切恐怖我為根本故，一切恐怖我愛生故，一切恐怖我想生故，一切恐怖我見生故；一切恐怖我為住處，一切恐怖因我生故，一切恐怖分別生故，一切恐怖煩惱

<sup>137</sup> 大正藏：墮

生故，一切煩惱我愛生故。若我住在阿蘭若處，不能捨離我、我所執，不應住是阿蘭若中，不如還住白衣屋舍。何以故？若有我想，不應住止阿蘭若處。若有補特伽羅相者，不應住止阿蘭若處。若人具有我、我所執，不應住止阿蘭若處。若有法見，不應住止阿蘭若處。若有具此四顛倒執，不應住止阿蘭若處。』汝等諦聽！若有修行依<sup>138</sup>涅槃相，不應住止阿蘭若處，何況更起諸煩惱相？

「汝等諦聽！若有不著一切相，應當安住阿蘭若處，是名當坐無著道場，一切諸法皆不可得。若心調柔無有諍論，應當安住阿蘭若處。於世因緣都無所著，應當安住阿蘭若處。於色、聲、香、味、觸等法無依止者，應當安住阿蘭若處。於一切法有平等見，應當安住阿蘭若處。於四威儀能調自心，應當安住阿蘭若處。能捨一切諸恐怖者，應當安住阿蘭若處。諸佛子等，以要言之，於諸煩惱得解脫者，應當安住阿蘭若處。若得成就涅槃因者，應當安住阿蘭若處。能善修行四無垢性，應當安住阿蘭若處。若有少欲能知足者，應當安住阿蘭若處。具足多聞有智慧者，應當安住阿蘭若處。若能修行三解脫者，應當安住阿蘭若處。

<sup>138</sup> 大正藏：作

永斷能縛煩惱結者，應當安住阿蘭若處。能審觀察十二因緣，應當安住阿蘭若處。所作已辦者，應當安住阿蘭若處。捨諸重擔者，應當安住阿蘭若處。證悟真如深妙理者，應當安住阿蘭若處。

「汝等當知，阿蘭若處，種種藥草、大小樹木生阿蘭若，曾無恐怖，亦無分別。菩薩摩訶薩住阿蘭若亦復如是，觀自身心猶如枯樹，牆壁瓦礫等無有異，於一切法無有分別。我觀身心猶如幻夢，中無有實，念念衰老，其息出已更不復入，由善惡因隨業受報。是身無常，速起速滅；是身虛假，終不久停。如是身中無我、我所，無有情，無命者，無養育者，無士夫者，無補特伽羅者，無作業者，無有見<sup>139</sup>者。如是等相本來空寂，猶如虛空，亦如泡沫，常應念念作如是觀，一切恐怖皆得解脫，如彼樹木無有恐怖。時，諸菩薩得大安樂無畏生<sup>140</sup>處，是名菩薩住阿蘭若求阿耨多羅三藐三菩提。

「復次，出家菩薩住阿蘭若，晝夜相續應如是觀：是阿蘭若，善能修習四無垢性安樂之處。是阿蘭若，善能修習知足之處。是阿蘭若，於諸

<sup>139</sup> 大正藏：童兒

<sup>140</sup> 大正藏：坐

煩惱得解脫處。是阿蘭若，具足多聞智慧之處。  
是阿蘭若，伏斷煩惱所知障處。是阿蘭若，能入  
三種解脫門處。是阿蘭若，善能證得八解脫處。  
是阿蘭若，善能觀察十二緣處。是阿蘭若，善能  
斷除業障之處。是阿蘭若，能得初果預流之處。  
是阿蘭若，能得第二一來果處。是阿蘭若，能得  
第三不還果處。是阿蘭若，得第四果阿羅漢處。  
是阿蘭若，證得辟支佛果之處。是阿蘭若，已辦  
所作得自在處。是阿蘭若，捨諸重擔得輕安處。  
是阿蘭若，證得二空真如之處。是阿蘭若，能修  
無量大慈心處。是阿蘭若，修證無量大悲心處。  
是阿蘭若，能善修習喜無量處。是阿蘭若，善能  
修習捨無量處。是阿蘭若，能發菩提心處。是阿  
蘭若，菩薩修持到十信處。是阿蘭若，復次進修  
到十住處。是阿蘭若，展轉增修到十行處。是阿  
蘭若，展轉修行十迴向處。是阿蘭若，善能修習  
四善根處。是阿蘭若，修行六度波羅蜜處。是阿  
蘭若，修行初地至十地處。是阿蘭若，證得六根  
清淨之處。是阿蘭若，善能證得天眼通處。是阿  
蘭若，得天耳通及宿住智、生死智、明神境、他  
心如是通處。是阿蘭若，有慚愧處。是阿蘭若，  
不放逸處。是阿蘭若，修五根處。是阿蘭若，證

得無量無邊三昧之處。是阿蘭若，能得恒沙陀羅尼門證自在處。是阿蘭若，悟無生忍。是阿蘭若，永出三界斷生死處。是阿蘭若，得不退轉。是阿蘭若，降伏一切眾魔怨敵，銷除業障見佛聞法如是之處。是阿蘭若，得佛不共最上法門。是阿蘭若，修習戒蘊清淨之處。是阿蘭若，出生無漏三摩地處。是阿蘭若，能生般若證解脫處。是阿蘭若，能生解脫知見之處。是阿蘭若，得三十七菩提分法。是阿蘭若，善能修攝十二頭陀。是阿蘭若，智能分別諦理住處。是阿蘭若，永離有漏五蘊生處<sup>141</sup>。是阿蘭若，能得解脫十二入處。是阿蘭若，永離有漏十八界處。是阿蘭若，微妙觀察十八空處。是阿蘭若，容受一切諸法空處。是阿蘭若，增長十善法生之處。是阿蘭若，增長堅固菩提心處。是阿蘭若，三世諸佛讚歎之處。是阿蘭若，一切菩薩恭敬讚歎如是之處。是阿蘭若，毗婆尸佛於尼俱陀樹下成道。是阿蘭若，尸棄如來於尸利沙樹下成道。是阿蘭若，毗舍如來阿尸婆多樹下成道。是阿蘭若，俱留孫佛無憂樹下成等正覺。是阿蘭若，俱那含牟尼如來優曇樹下成

<sup>141</sup> “是阿蘭若，善能修攝十二頭陀。是阿蘭若，智能分別諦理住處。是阿蘭若，永離有漏五蘊生處”句，大正藏及麗藏有，永樂北藏及龍藏則無

等正覺。是阿蘭若，迦葉如來娑<sup>142</sup>陀樹下成等正覺。是阿蘭若，釋迦如來於畢鉢羅樹下成道之處。汝等當知，阿蘭若處有如是等無量無邊功德勝利。」

爾時，樂遠離行菩薩為諸大眾，而說偈言：

出家菩薩住蘭若	當作何念及何業
世間所有諸恐怖	皆從我見我所生
若能斷除我我所	一切恐怖無所依
若有能執我見心	畢竟不成菩提道
涅槃常住皆無相	何況煩惱非法相
不著諸法及眾生	心無諍論修正念
四威儀中調伏心	應住蘭若常寂靜
能斷煩惱心知足	住於蘭若空寂舍
入三解脫無相門	住於蘭若離塵垢
能觀十二因緣法	四諦二空真妙理
世間八法不傾動	如是大士住蘭若
能觀自身如枯木	亦如水沫及幻夢
不著二邊平等相	如是薩埵住蘭若
罪業纏縛無常身	本來虛假元無實
我法二執及罪相	於三世中不可得
自身他身無有二	一切諸法亦如是

<sup>142</sup> 大正藏：娑

諦觀法性無去來 如是菩薩住蘭若  
栴檀塗身及讚歎 以刀屠割并罵辱  
於此二人無愛憎 如是菩薩住蘭若  
出家樂住阿蘭若 晝夜應作如是觀  
阿蘭若處真道場 一切如來成正覺  
阿蘭若處妙法空 出世正法之所生  
阿蘭若處聖所尊 能生三乘聖道故  
阿蘭若處聖所宅 一切聖賢常住故  
阿蘭若處如來宮 十方諸佛所依故  
阿蘭若處金剛座 三世諸佛得道故  
阿蘭若處涅槃宮 三世如來圓寂故  
阿蘭若處大慈室 菩薩住此修慈故  
阿蘭若處是悲田 三世諸佛修悲故  
阿蘭若處六通室 菩薩於此遊戲故  
阿蘭若處大無畏 能斷一切恐怖故  
阿蘭若處三摩地 諸求道者得定故  
阿蘭若處陀羅尼 諸持呪人神力故  
阿蘭若處善法堂 增長一切善法故  
阿蘭若處菩提室 菩薩修道得忍故  
若欲永超三界苦 菩提涅槃當修證  
遍周法界利羣生 應居蘭若菩提室  
所修六度四攝法 迴施三有及四恩

自他俱入甘露城 同證一如真法界

爾時，樂遠離行菩薩摩訶薩，為諸大眾說是法已，佛言：「善哉！善哉！善男子，汝為大眾及未來世求佛道者，分別演說阿蘭若處殊勝功德，利益安樂現在未來一切眾生，趣向菩提正真覺道。汝所成就無量功德，千佛共說不能窮盡。」

爾時，會中智光菩薩、無量阿僧祇菩薩大眾，聞阿蘭若最勝功德，即得聞持陀羅尼門；無量眾生發無等等阿耨多羅三藐三菩提心，得不退轉；千億眾生遠塵離垢，得法眼淨。

## 猷身品第七

爾時，彌勒菩薩摩訶薩，即從座起，偏袒右肩，右膝著地，合掌恭敬，而白佛言：「世尊！我等既悟出家菩薩摩訶薩猷離世間住阿蘭若，調伏其心修無垢行。然此菩薩住空閑處，自於是身應作何觀？」

爾時，佛告彌勒菩薩言：「善哉！善哉！善男子，汝為眾生起大悲心，請問如來入聖智觀妙行法門。汝當善聽，今為汝說。」

「唯然，世尊！願樂欲聞。」

「善男子，出家菩薩住阿蘭若，求阿耨多羅

三藐三菩提時，四威儀中，微細觀察，是有漏身三十七種不淨穢惡，是不可愛，是不堅牢。當觀此身猶如坏器，外以雜彩金銀七寶巧飾莊嚴，內以糞穢種種不淨填塞充滿，兩肩擔負，隨器<sup>143</sup>而行，其有見者，皆生愛樂，不知器中盛滿不淨，有六黑蛇常在此器，一蛇隨動，器即破壞，毒害臭惡，竟無所堪。世間之人，莊嚴其身，如彼彩畫盛不淨器。貪瞋癡三，名為心病；風黃痰癘，名為身病。內外六病能害身心，如彼六蛇居於器內，一一蛇動，器即破壞，一一病發，身即無常。善男子，出家菩薩處於空閑觀察是身，名為第一不淨觀相。出家菩薩，於日夜中，又觀自身，臭穢不淨，猶如死狗。何以故？彼身亦是父母不淨為生緣故。出家菩薩又觀自身，如蟻子臺安住眾蟻。時，有白象來至臺邊，以身觸臺，臺即崩碎。善男子，此臺所謂五蘊之身，白象是為琰魔羅使，身歸後世，如象壞臺。出家菩薩又觀自身，而作是念：『我今此身，從頂至足，皮肉骨髓，共相和合，以成其身，猶如芭蕉，中無實故。』出家菩薩又觀自身，無有強力，皮肉薄覆如塗附牆，億萬毛髮如草生地，微細風大出入毛孔，誰有智

<sup>143</sup> 大正藏：途

者當樂此身？剎那剎那衰敗轉故。出家菩薩又觀自身，如養毒蛇而取其害。我今雖以飲食衣服資長是身，而不識恩，畢竟還令墮於惡道。出家菩薩又觀自身，譬如怨家，詐作親友，伺求其便，而將毒藥斷彼命根。我身如是，本非真實，終致無常，非聖愛故。出家菩薩又觀自身，如水上泡，雖復妙好瑠璃珠色，剎那因緣起滅無恒，有為念念不久住故。出家菩薩又觀自身，如乾闥婆城，雖現相狀，而不實有，今者我身，亦復如是。出家菩薩又觀自身，猶如影像，我身亦爾，雖有非真。出家菩薩又觀自身，譬如外國強盛怨敵，今者我身亦復如是，煩惱怨敵侵掠善根。出家菩薩又觀自身，如朽舍宅，雖加修葺，當必崩壞，我身亦爾，雖加愛念，當必無常。出家菩薩又觀自身，如近怨國城邑人民，常懷恐怖，今者我身，亦復如是，於念念中，畏無常怨。出家菩薩又觀自身，如無量薪為火燒熟，然是猛火曾無厭足，我身亦爾，以貪愛火燒五欲薪，其心增長亦復如是。出家菩薩又觀自身，如新生子，慈母憐愍，恒加守護，我身亦爾，若不守護，病之身心，即便不能有所修證。出家菩薩又觀自身，本性不淨，譬如有人，厭患炭色，設諸方便，以水洗之，經

無量時，黑色仍舊，乃至炭盡，終無所益；我身亦爾，有漏不淨，假使海水盡未來際洗之無益，亦復如是。出家菩薩又觀自身，如油沃薪以火焚燒，又遇大風勢不可止，是身亦爾，名五蘊薪，沃貪愛油縱瞋恚火，愚癡風力無有休息。出家菩薩觀於自身，猶如惡疾，四百四病所住處故。亦如大腸，八萬四千蟲所住故。是無常處，出息不還即無常故。亦如非情，神識易脫同瓦石故。亦如河水，剎那前後不暫住故。亦如壓油，於一切事受勞苦故。無所依者，猶如嬰兒失父母故。無救護者，猶如蝦蟆蛇所吞故。如穴無底，心心所法不可知故。恒不知足，於五欲樂心無厭故。恒不自在，斷常二見所繫縛故。不生慚愧，雖蒙眷屬<sup>144</sup>養育棄捨生<sup>145</sup>故。亦如死屍，於日夜分近滅壞故。唯受諸苦，於一切處無真樂故。為苦所依，一切眾苦依身住故。如空聚落，於是身中無主宰故。畢竟空寂，遍計所執妄構畫故。如谷中響，皆是虛妄所顯現故。亦如船舶，若無船師即漂沒故。亦如大車運載財寶。何以故？乘於大乘到菩提故。善男子，出家菩薩日夜觀察，非不愛惜如

<sup>144</sup> 大正藏：蒙

<sup>145</sup> 大正藏：主

是之身，欲令眾生出生死海到彼岸故。」

爾時，世尊說是法已，告彌勒菩薩摩訶薩言：「善男子，修如是行，此則名為出家佛子所觀法要。若有佛子發菩提心，為求阿耨多羅三藐三菩提住阿蘭若，修習如是三十七觀，亦教佗修如是法要，解說書寫，受持讀習，遠離一切我、我所執，永斷貪著五欲世樂，速能成熟<sup>146</sup>不壞信心，求大菩提不惜軀命，何況世間所有珍寶？現身必得究竟成滿一切如來金剛智印，於無上道，永不退轉，六度萬行速得圓滿，疾成阿耨多羅三藐三菩提。」

爾時，會中八萬四千新發意菩薩，深厭世間，得大忍力，不復退轉於無上道；百千婆羅門發菩提心，成熟信根，得不退轉；三萬六千善男子、善女人，遠離塵垢，得法眼淨。

大乘本生心地觀經卷第六

<sup>146</sup> 大正藏：就

# 大乘本生心地觀經卷第七

唐罽賓國三藏沙門般若等譯

## 波羅蜜多品第八

爾時，彌勒菩薩摩訶薩白佛言：「世尊！以何因緣，殷勤<sup>147</sup>稱讚住阿蘭若修菩薩行，而不稱讚住於餘處修菩薩行？如來一時在靈鷲山，為諸菩薩廣說法要，而作是言：『菩薩或時止婬女家，親近屠者，示教利喜，無數方便，饒益眾生，為說妙法，令入佛道。』世尊今日為新發意所說妙法，而不如是。然我等類，親於佛前，得聞深法，無有疑惑。惟<sup>148</sup>願如來為未來世求佛道者，演說甚深微妙真理，令菩薩行無復退轉。」

爾時，佛告彌勒菩薩摩訶薩：「善男子，發阿耨多羅三藐三菩提心求菩提道有二菩薩：一者在家，二者出家。在家菩薩為欲化導婬室屠肆，皆得親近，出家菩薩則不如是。然此菩薩各有九品，上根三品皆住蘭若，無間精進，利益有情；中下二根諸菩薩等，隨宜所住，方處不定，或住

<sup>147</sup> 大正藏：慇懃

<sup>148</sup> 大正藏：唯

蘭若，或居聚落，隨緣利益安隱眾生，如是行門汝應觀察。

「復次，善男子，出家菩薩修習佛道，已得無漏真實之法，隨緣利樂一切有情。若有佛子未得真智住於蘭若，要當親近諸佛菩薩；若有值遇真善知識，於菩薩行必不退轉。以是因緣，諸佛子等，應當至心求見一佛及一菩薩。善男子，如是名為出世法要，汝等咸當一心修學。

「復次，善男子，出家菩薩厭離世間住阿蘭若，省用功力得圓滿八萬<sup>149</sup>四千波羅蜜行，速證阿耨多羅三藐三菩提。所以者何？若捨名利住山林者，於身命財，必無憊惜，永無繫屬，自然易滿三種波羅蜜多。」

彌勒菩薩白佛言：「世尊！住阿蘭若出家菩薩不畜財寶，以何因緣，能得圓滿檀波羅蜜？」

佛告彌勒菩薩摩訶薩：「善男子，住阿蘭若出家菩薩，入於聚落所乞之食，先以少分施於眾生，又以餘分施於所欲，即得名為檀波羅蜜。以自身命供養三寶，頭目髓腦施來求者，即得名為親近波羅蜜。為求法者說出世法，令發無上菩提心故，即得名為真實波羅蜜。善男子，是名出家

<sup>149</sup> 大正藏：…得圓八萬…

菩薩成就布施波羅蜜多。

「復次，善男子，出家菩薩住阿蘭若，故修十二頭陀之行，若行步時，看二肘地，不損眾生，即得名為持戒波羅蜜。堅持禁戒，不惜軀命，即得名為親近波羅蜜。為求出世，說法教化，令發無上菩提之心，即得名為真實波羅蜜。善男子，是名出家菩薩成就持戒波羅蜜多。

「復次，善男子，出家菩薩住阿蘭若，能滅瞋恚得慈心三昧，亦無毀辱一切眾生，即得名為忍辱波羅蜜。若為一人說一句法，令發阿耨多羅三藐三菩提心，即得名為真實波羅蜜。善男子，是名出家菩薩成就忍辱波羅蜜多。

「復次，善男子，出家菩薩為令眾生得成佛故，修精進行。未得成佛，福智羸弱，不貪安樂，不造眾罪，於昔菩薩行苦行中深生歡喜，翹敬宗仰，常無休息，以是因緣，即得名為精進波羅蜜。棄捨身命如捐涕唾，一切時中未嘗懈怠，即得名為親近波羅蜜。遇有緣者說最上道，令趣無上正等菩提，即得名為真實波羅蜜。由精進心，如是十行，過去不退，現在堅固，未來速滿。善男子，是名出家菩薩摩訶薩成就精進波羅蜜多。

「復次，善男子，出家菩薩住阿蘭若修習三

昧，為攝諸<sup>150</sup>法令不散失，入諸解脫永斷邊見，現於神通，化彼眾生，令得正智，斷煩惱本，入真法界，悟如實道，當趣菩提，以是因緣即得名為禪定波羅蜜。欲令眾生，如我無異，悉得滿足，調伏有情不捨三昧，不惜身命修此三昧，即得名為親近波羅蜜。為諸眾生說深妙法，皆令趣向無上菩提，即得名為真實波羅蜜。善男子，是名出家菩薩成就禪定波羅蜜多。

「復次，善男子，出家菩薩處於空閑，親近供養諸佛菩薩一切智者，常樂聽聞甚深妙法，心生渴仰，恒無厭足，善能分別二諦真理，斷除二障，通達五明，說諸法要能決眾疑，以是因緣即得名為般若波羅蜜。為求半偈棄捨身命，不憚眾苦志求<sup>151</sup>菩提，即得成就親近波羅蜜。於大會中為人說法，於深妙義無所祕惜，能令發起大菩提心，於菩薩行得不退轉，常能觀察我身、蘭若及菩提心、真實法身，如是四種無有差別，如是如是觀妙理故，即得名為真實波羅蜜。善男子，是名出家菩薩成就般若波羅蜜多。

「復次，善男子，出家菩薩住空閑處，常能

<sup>150</sup> 大正藏：善

<sup>151</sup> 大正藏：志求；永樂北藏：至大；龍藏：至大

修習方便勝智波羅蜜多，以佗心智能了有情意樂煩惱心行差別，應病與藥悉令除差，自在遊戲神通三昧，發大悲願成熟眾生，諸佛之法無不通達，以是因緣即得名為方便善巧波羅蜜多。為欲饒益諸眾生故，於身命財都不固惜，即得名為親近波羅蜜多。為諸眾生怨親平等，說微妙法令入佛智，即得名為真實波羅蜜多。善男子，是名出家菩薩成就方便善巧波羅蜜多<sup>152</sup>。

「復次，善男子，出家菩薩入於山林，為諸眾生常能修習願波羅蜜，心恒觀察諸法真性，非有非空中道妙理，於世俗事悉能辦了，為化有情恒修慈悲，以是因緣，即得名為願波羅蜜。以四弘願攝受眾生，乃至捨身不壞悲願，即得名為親近波羅蜜。說微妙法辯才無礙，若有聽聞畢竟不退，即得名為真實波羅蜜。善男子，是名出家菩薩成就願波羅蜜多。

「復次，善男子，出家菩薩住阿蘭若，以正智力善了有情心行黑白，能為眾生說相應法，令入大乘甚深妙義，即能安住究竟涅槃，以是因緣，即得名為力波羅蜜。以正智眼照見五蘊空寂之理，能捨身命利眾生故，即得名為親近波羅蜜。以妙

<sup>152</sup> 大正藏：波羅蜜；永樂北藏：波羅蜜多；龍藏：波羅蜜多

智力化邪見眾，令斷輪迴生死惡業，趣向常樂究竟涅槃，即得名為真實波羅蜜。善男子，是名出家菩薩成就力波羅蜜多。

「復次，善男子，出家菩薩住阿蘭若，於一切法了知善惡，遠離邪見，攝受正法，不厭生死，不樂涅槃，即得名為智波羅蜜。不愛自身，憐愍眾生，於身命財恒修大捨，即得名為親近波羅蜜。以微妙智為諸眾生說一乘法，令入阿耨多羅三藐三菩提，以是因緣，即得名為真實波羅蜜。善男子，是名出家菩薩成就智波羅蜜多。

「善男子，如是等波羅蜜多，以何義故，說為八萬四千差別？汝等當知！為多貪者，分別演說二千一百波羅蜜多；為多瞋者，分別演說二千一百波羅蜜多；為多癡者，分別演說二千一百波羅蜜多；為等分者，分別演說二千一百波羅蜜多。善男子，於如是等二千一百波羅蜜多以為根本，轉增十<sup>153</sup>倍遂成八萬四千波羅蜜多，如是等法皆利他行。善男子，若有眾生，其性難調，聞是法已，心未調伏，即為宣說八萬四千諸三昧門，如是妙法皆自利行。若有眾生，其性難調，聞是法已，心未調伏，即為宣說八萬四千陀羅尼門，如

<sup>153</sup> 大正藏：十；永樂北藏：上；龍藏：上

是妙法皆利他行。善男子，我為調伏一切有情，說如是法及以無數善巧方便，現種種相教化眾生。善男子，以是義故，一切人、天普稱如來名為導師。善男子，未來現在諸佛世尊，悉皆修習八萬四千波羅蜜門，八萬四千諸三昧門，八萬四千陀羅尼門，永斷八萬四千微煩惱障，八萬四千微所知障，皆詣蘭若菩提樹下<sup>154</sup>，坐金剛座，入金剛定，降伏一切天魔怨已，證得阿耨多羅三藐三菩提。」

爾時，世尊欲重宣此義，而說偈言：

超過三界大法王 出現世間化羣品  
恒河沙等諸菩薩 入佛甘露智慧門  
歷劫得道慈氏尊 以大悲心而啟問  
善哉無垢法王子 智慧能問<sup>155</sup>真佛乘  
我以師子無畏辯 說大乘中趣覺路  
汝等一心善諦聽 轉授未來所應授  
十方世界可使空 無令斷盡出世道  
將求解脫出世道 不過三根九品類  
上根三品居蘭若 中下隨緣化世間  
所求道果等無差 同證<sup>156</sup>真如佛性海

<sup>154</sup> 大正藏：王

<sup>155</sup> 大正藏：問；永樂北藏：開；龍藏：開

<sup>156</sup> 大正藏：證；永樂北藏：說；龍藏：說

已獲無漏真大士 隨宜應現濟羣生  
開示有空不二門 自利利他無間斷  
未得無漏諸佛子 應正勤修三種學  
善根迴向施眾生 一心專念佛菩薩  
願我常覩佛菩薩 無邊莊嚴功德身  
若使恒聞法雨音 普得同霑心不退  
以身常處於地獄 非不親近大慈尊  
以身常處於輪迴 非不親聞微妙法  
以是因緣諸佛子 繫心常念天人師  
若有佛子修聖道 發起無上菩提心  
猷世住於蘭若中 亦得名修三種度  
每日自食先布施 兼將法寶施眾生  
三輪清淨是檀那 以此修因德圓滿  
當知證獲波羅蜜 唯由心淨不由財  
若有染心施珍財 不如淨心施少分  
財施即得名檀度 此波羅蜜非二三  
能施身命及妻子 如是得名親近度  
若有求法善男女<sup>157</sup> 為說一切大乘經  
令發無上菩提心 乃名真實波羅蜜  
慈悲淨信具慚愧 攝受眾生離於貪  
願成如來無上智 財法二施名初度

<sup>157</sup> 大正藏：子

堅持菩薩三聚戒 開發菩提離生死  
擁護佛法住世間 能悔誤犯真持戒  
伏瞋恚心慈悲觀 當念宿因對怨害  
不惜軀命救眾生 是名忍辱波羅蜜  
能行難行不暫捨 三僧祇劫常增進  
不共染污恒鍊心 為度有情求解脫  
出入<sup>158</sup>三昧得自在 變化神通遊十方  
為斷眾生煩惱因 三摩地門求解脫  
若欲成就真智慧 親近菩薩及如來  
樂聞出世妙理門 修達三明斷二障  
能知眾生心差別 隨病與藥令服行  
慈悲善巧應根宜 方便利生度羣有  
觀一切法真句義 不著中邊離有無  
淨智無間會真如 二利均平周法界  
智力能了眾生性 為說相應種種法  
智力能入眾生心 令斷輪迴生死本  
智力能分黑白法 隨應取捨各了知  
生死涅槃本平等 成就有情離分別  
如是十種殊勝行 攝入八萬四千中  
隨其品類勝法門 乃名菩薩波羅蜜  
八萬四千三摩地 能滅眾生散亂心

<sup>158</sup> 大正藏：入出

八萬四千總持門 能除惑障銷魔眾  
大聖法王方便力 三種法要化眾生  
教網垂於生死海 置彼人天安樂處

爾時，世尊說是法時，八萬四千忉利天子，斷諸<sup>159</sup>界障，證歡喜地；無數百千六欲天子，悟無生忍，得陀羅尼；十六大國王，得聞持陀羅尼；無量四眾聞菩薩行，或得不退地，或得三昧門，或得陀羅尼，或得大神通；或有菩薩證得<sup>160</sup>三地乃至十地，踊躍歡喜；無量百千諸人天等，發阿耨多羅三藐三菩提心，不復退轉；八千人天，遠塵離垢，得法眼淨。

## 功德莊嚴品第九

爾時，彌勒菩薩摩訶薩白佛言：「世尊！如佛所說住阿蘭若功德成就當得作佛。菩薩云何修諸功德，而能住是阿蘭若中？惟<sup>161</sup>願世尊為我解說。」

爾時，佛告彌勒菩薩摩訶薩言：「汝善男子，當修學者，但有一德，是人應住阿蘭若處求無上道。云何為一？謂觀一切煩惱根源即是自心，了

<sup>159</sup> 大正藏：三

<sup>160</sup> 大正藏：二

<sup>161</sup> 大正藏：唯

達此法，堪能住止阿蘭若處。所以者何？譬如狂犬被人驅打，但逐瓦石不逐於人。未來世中住阿蘭若新發心者，亦復如是，若見色、聲、香、味、觸、法，其心染著，是人不知煩惱根本，不知<sup>162</sup>五境從自心生，即此名為未能善住阿蘭若處，以是因緣，樂住寂靜求無上道。一切菩薩摩訶薩等，若五欲境現前之時，觀察自心，應作是念：『我從無始至于今日，輪迴六趣無有出期，皆自妄心而生迷倒，於五欲境貪愛染著。』如是菩薩名為堪住阿蘭若處。若有人問：『何等有情於未來世當得作佛？』應指是人於當來世，出三界苦，破四魔軍，速成菩提，入佛智慧，一切世間天龍八部、阿蘇羅等皆應供養。若善男子及善女人，以清淨心供養如是住阿蘭若真善佛子，所獲福德無量無邊。若復有人以眾珍寶供養悲母，所獲功德亦無差別。何以故？是人當得阿耨多羅三藐三菩提，轉正法輪度人天眾，紹三寶種使不斷絕，當為眾生作歸依故。

「復次，善男子，有二種法繫縛行者，令不堪任住阿蘭若：一者，愛樂斷見邪法；二者，愛樂財寶樂具。又，善男子，有二種人，不堪居住

<sup>162</sup> 大正藏：知；永樂北藏：因；龍藏：因

阿蘭若處：一者，具足憍慢；二者，惡大乘法。又，善男子，有二種人，不應居住阿蘭若處：一者，邪見不信佛語；二者，身自破戒，策役持戒。如是等人，不應居住阿蘭若處求無上道。

「復次，善男子，具四種德，應當安住阿蘭若處。云何為四？一者，多<sup>163</sup>聞總持不忘；二者，分明能解妙義；三者，正念常不放逸；四者，隨順如來教行<sup>164</sup>。善男子，若有佛子成就如是四種勝德，應當安住阿蘭若處，修菩薩行，求無上道。

「復次，善男子，出家菩薩復有四德莊嚴自身，住阿蘭若求佛智慧。云何為四？一者，大慈；二者，大悲；三者，大喜；四者，大捨。善男子，如是四法，能生一切福德智慧，利益安樂無量眾生，速證無上大菩提法。

「復次，善男子，出家菩薩復有四德，持戒清淨能至菩提。云何為四？一者，恒住四無垢性；二者，常行十二頭陀；三者，遠離在家出家；四者，永離諂誑嫉妬。善男子，一切菩薩依此四法，永離生死，得大菩提。

「復次，善男子，出家菩薩復有四法永離生

<sup>163</sup> 大正藏：多；永樂北藏：名；龍藏：名

<sup>164</sup> 大正藏：隨順如來教行；永樂北藏：隨順如教而行；龍藏：隨順如教而行

死得大菩提<sup>165</sup>；復次，善男子，出家菩薩復有四法攝一切善。云何為四？一者，淨持禁戒復有多聞；二者，入諸三昧能具智慧；三者，得六神通兼修種智；四者，善巧方便又不放逸。善男子，如是四法，三世菩薩共所修學，汝等佛子亦應修習，疾證廣大無上菩提。

「復次，善男子，出家菩薩具四種法，於菩薩行得不退轉。云何為四？一者、布施；二者、愛語；三者、利行；四者、同事。善男子，如是四行，趣菩提路利生根本，一切菩薩皆應修學。

「復次，善男子，出家菩薩復具四德，住於蘭若，持戒清淨，莊嚴自身。云何為四？一者，觀察自無本性，伏斷二執，證無我故；二者，他身亦無本性，於怨親所，離憎愛故；三者，身心快樂，心心所法無分別故；四者，得平等智，生死涅槃無差別故。善男子，如是四法，一切菩薩所應修習，汝等佛子亦當修習，速<sup>166</sup>趣無上正等菩提。

「復次，善男子，一切菩薩復有四願，成熟有情住持三寶，經大劫海終不退轉。云何為四？

<sup>165</sup> “復次，善男子，出家菩薩復有四法永離生死得大菩提”句，大正藏及麗藏無，永樂北藏及龍藏則有

<sup>166</sup> 大正藏：速；永樂北藏：遠；龍藏：遠

一者，誓度一切眾生；二者，誓斷一切煩惱；三者，誓學一切法門；四者，誓證一切佛果。善男子，如是四法，大小菩薩皆應修學，三世菩薩所學處故。

「復次，善男子，出家菩薩復有四法，住阿蘭若持戒清淨。云何為四？一者，愛樂空性，空所顯故；二者，得無恐怖，證三昧故；三者，於諸眾生起大悲願；四者，於二無我無厭背心。善男子，如是四法，一切菩薩入聖要門，依此四法斷二障故。

「復次，善男子，出家菩薩復有四法，住阿蘭若，善持禁戒，莊嚴其身。云何為四？一者，永捨我見；二者，捨我所見；三者，離斷常見；四者，深能悟解十二因緣。善男子，如是四法，能除毀禁，守護淨戒，莊嚴其身。

「復次，善男子，出家菩薩住阿蘭若，又觀四法，能護禁戒妙行增修趣求佛智。云何為四？一者，觀察五蘊生滅；二者，觀十二處如空聚落；三者，觀十八界性同法界；四者，於俗諦法無捨無著。善男子，如是四法，一切菩薩所應修學，是故佛子住阿蘭若，一心修習求無上道。

「復次，善男子，出家菩薩住阿蘭若，具足

四種持戒清淨莊嚴自身。云何為四？一者，成就不見身觀；二者，成就不見語<sup>167</sup>觀；三者，成就不見意觀；四者，遠離六十二見善能成就一切智觀。善男子，若有佛子，成就如是四種清淨，現身證獲正性離生，乃至速證無上菩提。以是因緣，汝等佛子，觀如是等四種法門，斷四惡道，證四涅槃，盡未來際度諸有情，令證阿耨多羅三藐三菩提。

「復次，善男子，出家菩薩住阿蘭若，具足八種三昧清淨莊嚴自身。云何為八？一者，獨坐阿蘭若三昧清淨；二者，遠離綺語三昧清淨；三者，遠離五欲三昧清淨；四者，調伏身心三昧清淨；五者，飲食知足三昧清淨；六者，遠離惡求三昧清淨；七者，遠離因聲起愛三昧清淨；八者，為眾說法不求利養三昧清淨。善男子，如是八種三昧清淨，能生百千諸三昧門，汝等佛子<sup>168</sup>，應當修習，速證無上正等菩提。

「復次，善男子，出家菩薩住阿蘭若，復有八種智慧清淨。云何為八？一者，五蘊善巧智慧清淨；二者，十二處善巧智慧清淨；三者，十八

<sup>167</sup> 大正藏：語；永樂北藏：諸；龍藏：諸

<sup>168</sup> “如是八種三昧清淨，能生百千諸三昧門，汝等佛子”句大正藏及麗藏有；永樂北藏及龍藏則無

界善巧智慧清淨；四者，二十二根善巧方便智慧清淨；五者，三解脫門善巧方便智慧清淨；六者，能滅一切煩惱善巧方便智慧清淨；七者，能滅隨煩惱善巧方便智慧清淨；八者，能滅六十二見善巧方便智慧清淨。善男子，如是八種智慧清淨，汝等菩薩當勤修習，速證無上正等菩提。

「復次，善男子，出家菩薩住阿蘭若，復有八種神通清淨莊嚴自身。云何為八？一者，於諸色法，得無障礙天眼善巧方便神通清淨；二者，於諸聲境，得無障礙天耳善巧方便神通清淨；三者，於諸眾生心心所法，得無障礙他心智善巧方便神通清淨；四者，憶念過去生處死處，得無障礙宿住智善巧方便神通清淨；五者，能往十方無數佛刹，得無障礙神境智善巧方便神通清淨；六者，能知眾生漏盡未盡，得無障礙漏盡智善巧方便神通清淨；七者，能滅一切煩惱，得無障礙無漏智善巧方便神通清淨；八者，現見自身一切善根迴向眾生善巧方便神通清淨。善男子，如是八種神通清淨，十方菩薩同所修學，汝等菩薩亦應修習，速證無上正等菩提。

「復次，善男子，出家菩薩住阿蘭若，現身獲得八種清淨。云何為八？一者，身業清淨；二

者，語業清淨；三者，意業清淨；四者，正性清淨；五者，正念<sup>169</sup>清淨；六者，頭陀清淨；七者，離諂清淨；八者，一念不忘菩提心清淨。善男子，若有佛子住阿蘭若，具足如是八種清淨，現身成就無邊善根，不復退轉阿耨多羅三藐三菩提。

「復次，善男子，出家菩薩復有八種多聞清淨莊嚴自身。云何為八？一者，尊敬和尚<sup>170</sup>阿闍梨多聞清淨；二者，遠離憍慢生謙下心多聞清淨；三者，精進勇猛多聞清淨；四者，安住正念多聞清淨；五者，為求法者說甚深義多聞清淨；六者，不愛自讚<sup>171</sup>毀他多聞清淨；七者，常能觀察一切善法多聞清淨；八者，聽聞正法如說修行多聞清淨。善男子，如是八種多聞清淨，汝等菩薩皆應修習，速證無上正等菩提。」

爾時，世尊說如是等菩薩行已，告彌勒菩薩摩訶薩言：「善男子，我涅槃後，後五百歲，法欲滅時，無量眾生，厭離世間，渴仰如來，發阿耨多羅三藐三菩提心，入阿蘭若為無上道，修習如是菩薩願行，於大菩提得不退轉。如是發心無量眾生，命終上生覩史天宮，得見汝身無邊福智

<sup>169</sup> 大正藏：命

<sup>170</sup> 大正藏：上

<sup>171</sup> 大正藏：讚；永樂北藏：護；龍藏：護

之所莊嚴，超越生死證不退轉，於當來世大寶龍華菩提樹下，得阿耨多羅三藐三菩提。」

爾時，世尊說是法時，二萬五千新發意菩薩，於菩提行將欲退轉，聞如是法發堅固心，超十信位至第六位<sup>172</sup>；三萬八千淨行婆羅門，永斷邪見，得大法忍及陀羅尼；七萬六千人，皆發無等等阿耨多羅三藐三菩提心。

大乘本生心地觀經卷第七

<sup>172</sup> 大正藏：住

# 大乘本生心地觀經卷第八

唐罽賓國三藏般若等譯

## 觀心品第十

爾時，文殊師利菩薩摩訶薩，即從座起，整衣服，偏袒右肩，右膝著地，曲躬合掌，白佛言：「世尊！如佛所說，告妙德等五百長者，我為汝等敷演心地微妙法門，而此道場無量無邊人天大眾，皆生渴仰。我今為是啟問如來，云何為心？云何為地？惟<sup>173</sup>願世尊無緣大慈無礙大悲，為諸眾生，分別演說。未離苦者，令得離苦；未安樂者，令得安樂；未發心者，令得發心；未證果者，令得證果。同於一道，而得涅槃。」

爾時，薄伽梵以無量劫中，修諸福智所獲清淨決定勝法大妙智印，印文殊師利言：「善哉！善哉！汝今真是三世佛母，一切如來在修行地，皆曾引導，初發信心，以是因緣，十方國土成正覺者，皆以文殊而為其母。然今汝身，以本願力，現菩薩相，請問如來不思議法。諦聽諦聽，善思念之，吾當普為分別解說。」

<sup>173</sup> 大正藏：唯

「唯然，世尊！我等樂聞。」

爾時，薄伽梵，妙善成就一切如來最勝住持平等性智種種希有微妙功德，已能善獲一切諸佛決定勝法大乘智印，已善圓證一切如來金剛祕密殊勝妙智，已能安住無礙大悲，自然救攝十方有情，已善圓滿妙觀察智，不觀而觀，不說而說。是薄伽梵告諸佛母無垢大聖文殊師利菩薩摩訶薩言：「大善男子，此法名為十方如來最勝祕密心地法門，此法名為一切凡夫入如來地頓悟法門，此法名為一切菩薩趣大菩提真實正路，此法名為三世諸佛自受法樂微妙寶宮，此法名為一切饒益有情無盡寶藏。此法能引諸菩薩眾到色究竟自在智處，此法能引詣菩提樹後身菩薩真實導師，此法能雨世出世財，如摩尼寶滿眾生願。此法能生十方三世一切諸佛功德本源，此法能銷一切眾生諸惡業果。此法能與一切眾生所求願印，此法能度一切眾生生死險難，此法能息一切眾生苦海波浪，此法能救苦惱眾生而作急難<sup>174</sup>，此法能竭一切眾生老病死海。此法善能出生諸佛因緣種子，此法能與生死長夜為大智炬，此法能破四魔兵眾而作甲冑。此法即是正勇猛軍戰勝旌旗，此法即

<sup>174</sup> 大正藏：而作急難；永樂北藏：而作急難；龍藏：一切急難

是一切諸佛無上法輪，此法即是最勝法幢，此法即是擊大法鼓，此法即是吹大法螺，此法即是大師子王，此法即是大師子吼。此法猶如國大聖王善能正治，若順王化獲大安樂，若違王化尋被誅滅。

「善男子，三界之中，以心為主；能觀心者，究竟解脫；不能觀者，究竟沈淪。眾生之心猶如大地，五穀五果從大地生<sup>175</sup>。如是心法，生世出世善惡五趣、有學無學、獨覺菩薩及於如來。以是因緣，三界唯心，心名為地。一切凡夫，親近善友，聞心地法，如理觀察，如說修行，自作教佗，讚勵慶慰，如是之人，能斷三<sup>176</sup>障，速圓眾行，疾得阿耨多羅三藐三菩提。」

爾時，大聖文殊師利菩薩白佛言：「世尊！如佛所說，唯將心法為三界主。心法本無<sup>177</sup>，不染塵穢，云何心法染貪瞋癡？於三世法誰說為心？過去心已滅，未來心未至，現在心不住。諸法之內性不可得，諸法之外相不可得，諸法中間都不可得。心法本來無有形相，心法本來無有住處；

<sup>175</sup> 大正藏及麗藏：不能觀者，究竟沈淪。眾生之心猶如大地，五穀五果從大地生；永樂北藏：不能觀者地生；龍藏：不能觀者永處纏縛，譬如萬物皆從地生

<sup>176</sup> 大正藏：三；永樂北藏：二；龍藏：二

<sup>177</sup> 大正藏：無；永樂北藏：元；龍藏：元

一切如來尚不見心，何況餘人得見心法？一切諸法從妄想生，以是<sup>178</sup>因緣，今者世尊，為大眾說三界唯心。願佛哀愍，如實解說。」

爾時，佛告文殊師利菩薩言：「如是如是，善男子，如汝所問，心心所法本性空寂，我說眾喻以明其義。善男子，心如幻法，由遍計生，種種心想，受苦樂故。心如水流<sup>179</sup>念念生滅，於前後世不暫住故。心如大風，一剎那間歷方所故。心如燈焰，眾緣和合而得生故。心如電光，須臾之頃不久住故。心如虛空，客塵煩惱所覆障故。心如猿猴，遊五欲樹不暫住故。心如畫師，能畫世間種種色故。心如僮僕，為諸煩惱所策役故。心如獨行，無第二故。心如國王，起種種事得自在故。心如怨家，能令自身受大苦故。心如埃塵，坌污自身生雜穢故。心如影像，於無常法執為常故。心如幻夢，於無我法<sup>180</sup>執為我故。心如夜叉，能噉種種功德法故。心如青蠅，好穢惡故。心如殺者，能害身故。心如敵對，常伺過故。心如盜賊，竊功德故。心如大鼓，起鬪戰故。心如飛蛾，愛燈色故。心如野鹿，逐假聲故。心如羣豬，樂

<sup>178</sup> 大正藏：是；永樂北藏：是；龍藏：何

<sup>179</sup> 大正藏：流水

<sup>180</sup> 大正藏：於無我法；永樂北藏：於我法相；龍藏：於我法相

雜穢故。心如眾蜂，集蜜味故。心如醉象，耽牝觸故。善男子，如是所說心心所法，無內無外亦無中間，於諸法中求不可得，去、來、現在亦不可得，超越三世非有非無，常懷染著從妄緣現，緣無自性心性空故。如是空性，不生不滅，無來無去，不一不異，非斷非常，本無生處，亦無滅處，亦非遠離非不遠離，如是心等不異無為，無為之體不異心等。心法之體本不可說，非心法者亦不可說。何以故？若無為是心即名斷見，若離心法即名常見。永離二相不著二邊，如是悟者名見真諦，悟真諦者名為賢聖。一切賢聖性本空寂，無為法中戒無持犯，亦無大小，無有心王及心所法，無苦無樂。如是法界自性無垢，無上、中、下差別之相。何以故？是無為法性平等故。如眾河水流入海中，盡同一味無別相故。此無垢性，是無等等，遠離於我及離我所<sup>181</sup>。此無垢性，非實非虛。此無垢性是第一義，無盡滅相體本不生。此無垢性，常住不變，最勝涅槃，我所<sup>182</sup>淨故。此無垢性，遠離一切平等不平等<sup>183</sup>，體無異故。

<sup>181</sup> “此無垢性，是無等等，遠離於我及離我所”句，大正藏及麗藏有；永樂北藏及龍藏則無

<sup>182</sup> 大正藏：樂

<sup>183</sup> 大正藏及麗藏：一切平不平等；永樂北藏及龍藏：一切平等不平等

若有善男子、善女人，欲求阿耨多羅三藐三菩提者，應當一心修習如是心地觀法。」

爾時，世尊欲重宣此義，而說偈言：

三世覺母妙吉祥 請問如來心地法  
我今於此大會眾 開演成佛觀行門  
此法難遇過優曇 一切世間應渴仰  
十方諸佛證大覺 無不從此法修成  
我是無上調御師 轉正法輪周世界  
化度無量諸眾生 當知由悟心地觀  
一切有情聞此法 欣趣菩提得授記  
一切有緣得記人 修此觀門當作佛  
諸佛自受大法樂 住心地觀妙寶宮  
受職菩薩悟無生 觀心地門遍法界  
後身菩薩坐覺樹 入此觀行證菩提  
此法能雨七聖財 滿眾生願摩尼寶  
此法名為佛本母 出生三世三佛身  
此法名為金剛甲 能敵四眾諸魔軍  
此法能作大舟船<sup>184</sup> 令渡中流至寶所  
此法最勝大法鼓 此法高顯大法幢  
此法金剛大法螺 此法照世大法炬  
此法猶如大聖主 賞功罰過順人心

<sup>184</sup> 大正藏：航

此法猶如沃潤田 生成長養依時，候  
我以眾喻明空義 是知三界唯一心  
心有大力世界生 自在能為變化主  
惡想善心更造集 過現未來生死因  
依止妄業有世間 愛非愛果恒相續  
心如流水不暫住 心如飄風過國土  
亦如猿猴依樹戲 亦如幻事依幻成  
如空飛鳥無所礙 如空聚落人奔走  
如是心法本非有 凡夫執迷謂非無  
若能觀心體性空 惑障不生便解脫

爾時，如來於諸眾生起大悲心，猶如父母愛  
念一子，為滅世間大力邪見，利益安樂一切有情，  
宣說觀心陀羅尼曰：

「唵（一）室佉（二）波羅（二合）底（三）吠憚（四）  
迦盧弭（五）」

爾時，如來說真言已，告文殊師利菩薩摩訶  
薩：「如是神呪具大威力，若有善男子、善女人，  
持此呪時，舉清淨手，左右十指更互相叉，以左  
壓右<sup>185</sup>，更相堅<sup>186</sup>握，如縛著形，名金剛縛印。  
成此印已，習前真言，盈滿一遍，勝於讀習十二

<sup>185</sup> 大正藏：右押左

<sup>186</sup> 大正藏：堅；永樂北藏：豎；龍藏：豎

部經，所獲功德無有數量，乃至菩提不復退轉。」

## 發菩提心品第十一

爾時，薄伽梵已能善獲一切如來灌頂寶冠超過三界，已得圓滿陀羅尼自在，已善圓證三摩地自在，妙善成就<sup>187</sup>一切智智、一切種智，能作有情種種差別。時<sup>188</sup>，薄伽梵為諸眾生宣說觀心妙門已，告文殊師利菩薩摩訶薩言：「大善男子，我為眾生已說心地，亦復當說發菩提心大陀羅尼，令諸有情發阿耨多羅三藐三菩提心速圓妙果。」

爾時，文殊師利菩薩白佛言：「世尊！如佛所說，過去已滅，未來未至，現在不住，三世所有一切心法，本性皆空，彼菩提心，說何名發？善哉！世尊！願為解說斷諸疑網，令趣菩提。」

佛告文殊師利：「善男子，諸心法中起眾邪見，為欲除斷六十二見種種見故，心心所法我說為空，如是諸見無依止故。譬如叢林蒙密茂盛，師子、白象、虎狼、惡獸潛住其中，毒發害人，迥絕行跡。時，有智者以火燒林，因林空故，諸大惡獸無復遺餘。心空見滅，亦復如是。又，善

<sup>187</sup> 大正藏：就；永樂北藏：熟；龍藏：熟

<sup>188</sup> 大正藏：時；永樂北藏：是；龍藏：是

男子，以何因緣立空義耶<sup>189</sup>？為滅煩惱從妄心生，而說是空。善男子，若執空理為究竟者<sup>190</sup>，空性亦空，執空作病亦應除遣。何以故？若執空義為究竟者，諸法皆無因無果，路伽耶<sup>191</sup>陀有何差別？善男子，如阿伽陀藥能療諸病，若有病者服之必差，其病既愈藥隨病除，無病服藥藥還成病。善男子，本設空藥為除有病，執有成病執空亦然，誰有智者服藥取病？善男子，若起有見勝起空見，空治有病，無藥治空。善男子，以是因緣，服於空藥除邪見已，自覺悟心能發菩提，此覺悟心即菩提心，無有二相。善男子，自覺悟心有四種義。云何為四？謂諸凡夫有二種心，諸佛菩薩有二種心。善男子，凡夫二心其相云何？一者，眼識乃至意識，同<sup>192</sup>緣自境名自悟心；二者，離於五根心心所法，和合緣境名自悟心。善男子，如是二心能發菩提。善男子，賢聖二心其相云何？一者，觀真實理智；二者，觀一切境智。善男子，如是四種名自悟心。」

爾時，文殊師利菩薩白佛言：「世尊！心無

<sup>189</sup> 大正藏：邪

<sup>190</sup> 大正藏：者；永樂北藏：有；龍藏：有

<sup>191</sup> 大正藏：邪

<sup>192</sup> 大正藏：同；永樂北藏：因；龍藏：因

形相亦無住處，凡夫行者最初發心，依何等處？觀何等相？」

佛言：「善男子，凡夫所觀菩提心相，猶如清淨圓滿月輪，於宵臆上明朗而住。若欲速得不退轉者，在阿蘭若及空寂室，端身正念，結前如來金剛縛印，冥目觀察臆中明月，作是思惟：是滿月輪五十由旬無垢明淨，內外澄澈最極清涼，月即是心，心即是月。塵翳無染妄想不生，能令眾生身心清淨，大菩提心堅固不退。結此手印持念觀察。大菩提心微妙章句，一切菩薩最初發心清淨真言：

「唵 (一) 菩地 (二) 室多 (三) 牟致波 (四) 陀耶<sup>193</sup> (五) 弭 (六)」

「此陀羅尼具大威德，能令行者不復退轉，去來現在一切菩薩，在於因地初發心時，悉皆專念持此真言，入不退地速圓正覺。善男子，時彼行者，端身正念，都不動搖，繫心月輪成熟觀察，是名菩薩觀菩提心成佛三昧。若有凡夫修此觀者，所起五逆、四重、十惡及一闡提，如是等罪盡皆消滅，即獲五種三摩地門。云何為五？一者，剎那三昧；二者，微塵三昧；三者，白縷三昧；四

<sup>193</sup> 大正藏：邪

者，起伏三昧；五者，安住三昧。云何名為剎那三昧？謂暫想念滿月而住。譬如獼猴，身有所繫，遠不得去，近不得停，唯困飢渴須臾住止。凡夫觀心亦復如是，暫得三昧名為剎那。云何名為微塵三昧？謂於三昧少分相應。譬如有人，常自食苦，未曾食甜，於一時中，得一許<sup>194</sup>蜜到於舌根，增勝歡喜，倍生踊躍，更求多蜜。如是行者，經於長劫，食眾苦味，而今得與甘甜三昧少分相應，名為微塵。云何名為白縷三昧？謂凡夫人，自無始時，盡未來際，今得此定。譬如染皂多黑色中見一白縷，如是行者，於多生死黑闇夜中，而今方得白淨三昧，名之為縷。云何名為起伏三昧？所謂行者觀心未熟，或善成立、未善成立，如是三昧猶稱低昂，名為起伏。云何名為安住三昧？修前四定，心得安住，善能守護，不染諸塵。如人夏中，遠涉沙磧，備受炎毒，其心渴乏，殆無所堪，忽得雪山甘美之水、天酥陀等，頓除熱惱，身意泰然，是故三昧名為安住。入此定已，遠離惑障，發生無上菩提之芽，速登菩薩功德十地。」

爾時，會中無量人天，聞此甚深諸菩薩母不可思議大陀羅尼已，九萬八千諸菩薩等，證歡喜

<sup>194</sup> 大正藏：塵

地；無量眾生，發阿耨多羅三藐三菩提心。

## 成佛品第十二

爾時，薄伽梵能善安住清淨法界，三世平等無始無終，不動凝然常無斷盡，大智光明普照世界，善巧方便變現神通，化十方土靡不周遍，是薄伽梵，告文殊師利菩薩摩訶薩言：「瑜伽行者觀月輪已，應觀三種大祕密法。云何為三？一者，心祕密；二者，語祕密；三者，身祕密。云何名為心祕密法？瑜伽行者，觀滿月中出生金色五鈷金剛，光明煥然猶如鎔金，放於無數大白光明，以是觀察名心祕密。云何名為語言祕密？

「唵（一）地室多（二合）婆爾羅（二合二）

「此陀羅尼具大威力，一切菩薩成佛真跡<sup>195</sup>，是故名為語言祕密。云何名為身祕密法？於道場中端身正念，手結引導無上菩提最第一印，安置胷臆心月輪中。善男子，我當為汝說其印相，先以左右二大拇指，各入左右手掌之內，各以左右頭指、中指及第四指，緊<sup>196</sup>握拇指作於手拳，即是堅牢金剛拳印。次不改拳舒左頭指，直豎<sup>197</sup>虛

<sup>195</sup> 大正藏：跡；永樂北藏：言；龍藏：言

<sup>196</sup> 大正藏：堅

<sup>197</sup> 大正藏：豎

空，以其左拳著於心上，右拳小指緊握左拳頭指一節。次以右拳頭指之頭，即指右拳拇指一節，亦著心前，是名引導無上菩提第一智印，亦名能滅無明黑闇大光明印。以結此印加持力故，十方諸佛摩行者頂，授<sup>198</sup>大菩提勝決定記，是大毗盧遮那如來無量福聚大妙智印。

「爾時，行者結此印已，即作此觀：『一切有情共結此印，持念真言，十方世界無三惡道、八難苦果，同受第一清淨法樂。我今首上有大寶冠，其天冠中五佛如來結跏趺坐，我是毗盧遮那如來，圓滿具足三十二相、八十種好，放大光明照十方界，利益安樂一切眾生。』如是觀察，名入毗盧遮那如來最勝三昧。譬如有人悟迦盧微妙觀門，自作是觀：我身即是金翅鳥王，心意語言亦復如是。以此觀力能消毒藥，一切惡毒不能為害。凡夫行者亦復如是，作降伏坐身不動搖，手結智印，密念真言，心入此觀<sup>199</sup>，能滅三毒，消除業障，增長福智，世出世願速得圓滿，八萬四千諸煩惱障不能現起，恒河沙等所知重障漸漸消滅，無漏大智能斷金剛般若波羅蜜現前圓滿，速

<sup>198</sup> 大正藏：受

<sup>199</sup> 大正藏：入此觀時

得阿耨多羅三藐三菩提。」

爾時，文殊師利菩薩白佛言：「希有世尊！希有善逝！如來出世過優曇華，假使出世說是法難，如是心地三種祕密無上法輪，實能利樂一切眾生，入如來地及菩薩地真實正路，若有眾生，不惜身命，修行此法，速證菩提。」

爾時，佛告文殊師利菩薩言：「若有善男子、善女人，欲得修習三種祕密成佛妙門，早獲如來功德身者，當著菩薩三十二種大金剛甲，修此妙觀，必證如來清淨法身。云何名為三十二甲？一者，於無量劫為眾生故不厭生死受苦大甲。二者，誓度無量有情乃至螻蟻不捨大甲。三者，覺悟眾生生死長夢安置三種祕密大甲。四者，擁護佛法於一切時，猶如響應護法大甲。五者，永滅能起有無二見一切煩惱金剛大甲。六者，頭目髓腦妻子珍寶有來求者能捨大甲。七者，家中所受一切樂具永不貪著能施大甲。八者，能持菩薩三聚淨戒及<sup>200</sup>不捨離頭陀大甲。九者，著忍辱衣遇諸違緣毀罵鞭打不報大甲。十者，教化所有一切緣覺聲聞令趣一乘迴心大甲。十一者，譬如大風晝夜不歇度諸有情精進大甲。十二者，身心寂靜口無

<sup>200</sup> 大正藏：終

過犯修行解脫三昧大甲。十三者，生死涅槃無有二見饒益眾生平等大甲。十四者，無緣大慈利益羣品恒無厭捨與樂大甲。十五者，無礙大悲救攝一切無有限量拔苦大甲。十六者，於諸眾生無有怨結恒作饒益大喜大甲。十七者，雖行苦行不憚劬勞恒無退轉大捨大甲。十八者，有苦眾生來菩薩所代彼受苦不厭大甲。十九者，如觀掌中阿摩勒果如是能見解脫大甲。二十者，見五蘊身如旃陀羅損害善事無著大甲。二十一者，見十二入如空聚落常懷恐怖厭捨大甲。二十二者，見十八界猶如幻化無有真實大智大甲。二十三者，見一切法同於法界不見眾相證真大甲。二十四者，掩佗人惡不藏己過厭離三界出世大甲。二十五者，如大醫王應病與藥菩薩隨宜演化大甲。二十六者，見彼三乘體本不異究竟迴心歸一大甲。二十七者，紹三寶種使不斷絕轉妙法輪度人大甲。二十八者，佛於眾生有大恩德為報佛恩修道大甲。二十九者，觀一切法本性空寂不生不滅無垢大甲。三十者，悟無生忍得陀羅尼樂說辯才無礙大甲。三十一者，廣化有情坐菩提樹令證佛果一味大甲。三十二者，一剎那心般若相應悟三世法無餘大甲，是名菩薩摩訶薩三十二種金剛大甲。

「文殊師利菩薩！若有善男子、善女人，身被如是金剛甲冑，當勤修習三種祕密，於現世中具大福智，速證無上正等菩提。」

爾時，大聖文殊師利菩薩摩訶薩及諸大眾，聞佛所說三種祕密心地妙法，及三十二金剛甲冑一切菩薩所應學處，各脫無價瓔珞寶衣，供養毗盧遮那如來及十方尊，而讚佛言：「善哉！善哉！薄伽梵演說無邊菩薩行願，利益安樂一切眾生，捨凡夫身使入佛地。今者我等海會大眾，為報佛恩不惜身命，為諸眾生遍諸佛土，分別演說此微妙法，受持讀誦，書寫流布，令不斷絕。惟<sup>201</sup>願如來遙垂護念。」

爾時，大會聞此妙法得大饒益，不可稱計無數菩薩，各得證悟不退轉位；一切人天，皆獲勝利，乃至五趣一切有情，斷諸重障，得無量樂，悉皆當得阿耨多羅三藐三菩提。

### 囑累品第十三

爾時，釋迦牟尼如來告文殊師利菩薩等阿僧祇海會大眾言：「我於無量那庾多百千大劫，不惜身命、頭目、手足、血肉、骨髓、妻子、國城、

<sup>201</sup> 大正藏：唯

一切珍寶，有來求者，悉用布施，修習百千難行苦行，獲證大乘心地觀門。今以此法付囑汝等，汝等當知<sup>202</sup>，此甚深經，十方三世無上十力之所宣說。

「如是經寶最極微妙，能為有情一切利樂。於此三千大千世界十方諸佛國土之中，所有無邊諸有情類，傍生、餓鬼、地獄眾生，由此《大乘心地觀經》殊勝功德威神之力，令離諸苦，得受安樂。如是經力福德難思，能令所在國土豐樂，無諸怨敵。

「譬如有人，得如意珠，置於家中，能生一切殊妙樂具；此妙經寶亦復如是，能與國界無盡安樂。亦如三十三天末尼天鼓，能出種種百千音聲，令彼天眾受諸快樂；此經法鼓亦復如是，能令國界最勝安樂。

「以是因緣，汝等大眾住大忍力，流通此經。」

爾時，文殊師利菩薩白佛言：「世尊！希有如來！希有善逝！乃說甚深大乘微妙心地觀經，能廣利益大乘行者。唯然，世尊！實為深妙，若有善男子、善女人，能持此經乃至一四句偈，如是之人得幾所福？」

<sup>202</sup> 大正藏：汝等當知；永樂北藏：汝等當知；龍藏：當知

爾時，薄伽梵告文殊師利菩薩言：「若有善男子、善女人，於恒河沙三千大千世界，滿中七寶，以用供養十方諸佛，為一一佛造立精舍，七寶莊嚴，安置供養佛及菩薩滿恒沙劫；彼諸如來所有無量聲聞弟子，亦以供養一切所須，如供養佛等無差別。如是諸佛及聲聞等般涅槃後，起大寶塔供養舍利。若善男子、善女人，暫聞信解此心地經一四句偈，發菩提心，受持讀念，解說書寫，乃至極少為一人說。以彼種種供養功德，比此說經所獲功德，十六分中不及其一，乃至算數譬喻所不能及；況能具足受持讀習、廣為人說，所得福利不可限量。若有女人發菩提心，受持、讀習、書寫、解說此心地經，如是女人為最後身，更不復受，不墮惡道八難之處，於現身中感得十種勝利之福：一者，增益壽命；二者，除眾病惱；三者，能滅業障；四者，福智倍<sup>203</sup>增；五者，不乏資財；六者，皮膚潤澤；七者，為人愛敬；八者，得孝養子；九者，眷屬和睦；十者，善心堅牢。

「文殊師利，在在處處，若讀，若諷，若解說，若書寫，經卷所住之處，即是佛塔，一切天、

<sup>203</sup> 大正藏：皆

人、非人等，應以人中、天上上妙珍寶而供養之。所以者何？若此經典所在之處，即為有佛及諸菩薩、緣覺、聲聞。何以故？一切如來修行此經，捨凡夫已，得阿耨多羅三藐三菩提，一切賢聖皆從此經得解脫故。文殊師利，我涅槃後，後五百歲，法欲滅時，若有法師受持、讀習、解說、書寫此心地經眾經中王，如是法師與我無異。若有善男子、善女人，供養尊重此法師者，即為供養十方三世一切諸佛，所得福德平等無二，是名真法供養如來，如是名為正行供養。所以者何？是大法師在無佛時，為濁惡世邪見有情，演說甚深心地經王，使離惡見，趣菩提道，廣宣流布，令法久住，如是名為無相好佛，一切人天所應供養。若有善男子、善女人，合掌恭敬此法師者，我授無上大菩提記，是人當得阿耨多羅三藐三菩提。若人得聞此心地經，為報四恩發菩提心，若自書，若使人書，若讀念通利，如是人等，所獲福德，以佛智力，籌量多少，不得其邊，是人名為諸佛真子。一切諸天梵王、帝釋、四大天王、訶利帝<sup>204</sup>母五百眷屬、儼羅跋多大鬼神王、龍神八部一切聽法，諸鬼神等晝夜不離，常當擁護如是佛子，

<sup>204</sup> 大正藏：底

增長念慧，與無礙辯，教化眾生，令種佛因。

「文殊師利，如是善男子、善女人，臨命終時，現前得見十方諸佛，三業不亂，初獲十種身業清淨。云何為十？一者，身不受苦；二者，目睛不露；三者，手不掉動；四者，足無伸縮；五者，便溺不遺；六者，體不汗流；七者，不外捫摸；八者，手拳舒展；九者，顏容不改<sup>205</sup>；十者，轉側自如。由經力故有如是相。次獲十種語業清淨。云何為十？一者，出微妙語；二者，出柔輒語；三者，出吉祥語；四者，出樂聞語；五者，出隨順語；六者，出利益語；七者，出威德語；八者，不背眷屬；九者，人天敬愛；十者，讚佛所說。如是善語皆由此經。次獲十種意業清淨。云何為十？一者，不生瞋恚；二者，不懷結恨；三者，不生慳心；四者，不生妬心；五者，不說過惡；六者，不生怨心；七者，無顛倒心；八者，不貪眾物；九者，遠離七慢；十者，疾<sup>206</sup>欲證得一切佛法圓滿三昧。文殊師利，如是功德，皆由受持讀習、通利解說、書寫深妙經典難思議力。此心地經，於無量處，於無量時，不可得聞，何

<sup>205</sup> 大正藏：故

<sup>206</sup> 大正藏：樂

況得見具足修習？汝等大會，一心奉持，速捨凡夫，當成佛道。」

爾時，文殊師利法王子等無量大菩薩，智光菩薩等新發意菩薩，阿若憍陳如等諸大聲聞，天龍八部、人、非人眾，各各一心，受持佛語，皆大歡喜，信受奉行。

大乘本生心地觀經卷第八

## ● 結誦儀

### 補闕真言

(三編)

南無喝囉怛那. 哆囉夜耶. 佉囉佉囉. 俱住俱住.  
摩囉摩囉. 虎囉. 吽. 賀賀. 蘇怛那. 吽. 潑抹拏. 娑  
婆訶.

### 發願文

(一編)

志心懺悔。我(某甲)與一切衆生，從無始來，  
迷失真心，流轉生死，六根罪障，無量無邊，圓  
妙佛乘，無以開解，一切所願，不得現前。我今  
讀誦《大乘本生心地觀經》，以此善根，發露黑  
惡，過、現、未來三業所造無邊重罪，皆得消滅，  
身心清淨，惑障蠲除，福智莊嚴，淨因增長，自  
他行願速得圓成。

願諸如來常在說法，所有功德起隨喜心，迴  
向菩提，證常樂果。命終之日，正念現前，面見  
彌陀及諸聖衆，一剎那頃，生蓮華中。

普願衆生，俱成佛道。

南無佛 南無法 南無僧 (合掌三稱)

南無一切如來、應、正等覺 (合掌三稱)

南無本師釋迦牟尼佛 (合掌三稱)

## 迴向偈

(一編)

誦經功德殊勝行 無邊勝福皆迴向  
普願沉溺諸有情 速往無量光佛刹  
十方三世一切佛 一切菩薩摩訶薩  
摩訶般若波羅蜜

## 迴向偈

(一編)

願以此功德 莊嚴佛淨土  
上報四重恩 下濟三途苦  
若有見聞者 悉發菩提心  
盡此一報身 同生極樂國

## 三皈依

(一編)

自皈依佛，當願眾生，體解大道，發無上心；  
自皈依法，當願眾生，深入經藏，智慧如海；自  
皈依僧，當願眾生，統理大眾，一切無礙。和南  
聖眾。



此咒置經書中可滅誤跨之罪

南无护法韦驮尊天菩萨

